

ጎዳ ዩሱስ ኪሪስቶስ ዛሎ" ማቲዎስ ፃጕፔ ኮዡ ሓይሶ

ዓይያ ካሮ"

ማቲዎስ ፃጕፔ ኮዡ ሓይሳ' ዩሱስ ሙካንዳያ ማዔሢ ቤርታዲ ዒዛ ዛሎ" ኬኤዚንቲ ዳቂሻያ ማዔሢና ሚናኣ ጫክቁሞ ማፃኣፖይዳ ፆኦሲ ፔኤኮ ደሮ"ሞ ዒንጌ ሓጊ ማዓንዳ ዎዞ ቃኣሎ" ኩንሣሢ ዒዛ ዛሎ"ና ማዒያ ኬኤዛ ኮሺ ሓይሴ ዓርቂያኬ። ዩይ ኮዡ ሓይሳ' ዩሱስ ዔያቶኮ ባኣኮ"ይዳ ሾይንቲ፥ ዲጩ ዓይሁዶ ዓሶሞ ሌሊቱዋንቲ ዓጮ" ቢያሞ ማዓያኬ።

ማቲዎስ ፃጕፔ ኮዡ ሃይሳ ኮሺ" ዛጊ ጊኢጊሺንቲ ማፃኣፔኬ፤ ዩሱሴኮ ሾይንታፓ ዓርቃያ ዒዛኮ ዋኣያና ማሰቲያንታ ፃላሄ ዒዛ ዳቢሻኑዋያ ጌሼ ጌሺያ ዛሎ" ኬኤዚሢኮ ጊንፃ ጌለላይዳ ዒዛኮ ቃኣሎ" ኬኤዚያንታ ዒ ዔርዜ ዔርዚያንታ ሃርጊንቲ ዓሶ ፓሣሢያ ኬኤዛኔ፤ ዩካፓ ሄሊ"ሳያ ዒዚ ጌለላፓ ዩሩሳላሜ ዴንዴሢና ዒዛኮ ሳያይዳ ናንጎኮ ጋፒንያ ቃልሾ ኬሎ" ጋራ ማዲንቲ ባኮ ኬኤዛኔ፤ ዩይያ ዒዛኮ ሱዲንቲ ሃይሶ"ና ሃይባ"ፓ ዔቂያ ዛሎ"ንታኬ።

ሃይ ኮዡ ሃይሳ' ዩሱሴ፥ ፆኦሲኮ ዎጎ ዔርዛጊ ቢታንቶ ዓኣያና ፆኦሲ ካኣቱሞ ዛሎ" ዔርዛ ዴኤፒ ዔርዛ ዓሲ ማዔሢ ኬኤዛኔ፤ ዒዛኮ ዔርዚያኮ ባሼሢ ዴማ ዴማ ጎይሢና ጊኢጊንቲ ዶንጎ ቤሲ ፓቂንታኔ፡-

1. ፆኦሲ ዓሲኮ ናንጊ፥ ማዶ፥ ሓሣ ዔያታ ማዲኒ ዳንዳዓ ባኣዚንታ ጋፒንፃ ዔያቶሞ ጊኢጊንቲ ባካ ዴካ" ኬኤዚንቲሢ (ዓይ. 5-7)

2. ታጰ ላሞያ ዒዛኮ ጊንፆ ሃንታዘንሢ ኮዡ ሃይሶ ኬኤዞሞ ዳኪንቲ ዎዶ"ና ዔያቶሞ ዒንጊንቲ ዎጎ (ዓይ. 10)

3. ፆኦሲ ካኣቱሞ ዛሎ" ኬኤዚንቲ ዴማ ዴማ ኮኣኪንሢ (ዓይ. 13)

4. ዩሱሴ ጊንሢ ሃንቲሢ ጌይያኮ ቡሊ"ያ ኬኤዛ ዔርዚያ (ዓይ. 18)

5. ፆኦሲ ካኣቱሞኮ ሙኪያና ሓያ ዓጮኮ ጋፒንፆ ዛሎ" (ዓይ. 24-25)

ሃና ማፃኣፓ ዓርቂ ዴማ ዴማ ባኮ

ዩሱሴኮ ሾይንቶ ፃጰና ዒዛኮ ሾይንቲያና (1፥1—2፥23)

ማሰካ ዮሓንሴ ማዴ ማዶ" (3፥1-12)

ዩሱፊስ ዋኦያና ማስቲያና ፃላሄ ዒዛ ወይታቴያ ዛጋኒ ጌሼሢ
(3፡13—4፡11)

ዩሱፊስ ማድ"ና ጌሊላይዳ ዓሶ ቤርታ ፔጋዲያ (4፡12—
18፡35)

ጌሊላይዳፓ ዩሩሳላሜ ሄላ"ንዳኣና (19፡1—20፡34)

ፓፒንያ ቃልሾ ኬሎ"ና ዩሩሳላሜይዳ ሃሣ ኮይሎ" ዓጮ"ናይዳ
(21፡1—27፡66)

ጎዳኮ ሃይባ"ፓ ዔቂያና ሼምፔና ዓኣያ ማዒ ጴዲያና ዛሎ"
(28፡1-20)

ዩሱፊስ ሾይንቶ ዜርያ
(ሉቃ. 3፡23-38)

¹ ዓብራሃሜና ዳውቴናኮ ፃጳሢ ማዒ ዩሱስ ኪሪሰቶሴኮ ሾይንቶ
ዜርያ ሂዚኬ፡-

² ዓብራሃሜ ዩሳኣቄ፤ ዩሳኣቄ ያይቆኦቤ፤ ያይቆኦቤ ዩሁዳና
ጌርሲንሢና ሾዔኔ። ³ ዩሁዳ ቲዒማሮ ጎያ ላኣሌሎይዳፓ ፓርሴና
ዛራሄና ሾዔኔ፤ ፓርሴ ሄዲሮኔ፤ ሄዲሮኔና ራማ ሾዔኔ። ⁴ ራማ
ዓምናኣዳኣቤ፤ ዓምናኣዳኣቤና ናያሴ፤ ናያሴ ሴልሞኔ ሾዔኔ።
⁵ ሴልሞኔ ራባ ጎያ ላኣሌሎይዳፓ ቦዔዜ ሾዔኔ፤ ቦዔዜና ሩኡቴ ጎያ
ላኣሌሎይዳፓ ዒዮቤዴ፤ ዒዮቤዴና ዒሴዬ ሾዔኔ። ⁶ ዒሴዬ ካኣቲ
ዳውቴ ሾዔኔ።

ካኣቲ ዳውቴያ ያሪዮ ማቸይዳፓ ሴሎሞኔ ሾዔኔ። ⁷ ሴሎሞኔ
ሮቢዓሜ፤ ሮቢዓሜ ዓቢያ፤ ዓቢያ ዓሳኣፔ ሾዔኔ። ⁸ ዓሳኣፔ
ዒዮሳፒፄ፤ ዒዮሳፒፄ ዒዮራሜ፤ ዒዮራሜ ያዚያ ሾዔኔ። ⁹ ያዚያ
ዒዮዓታሜ፤ ዒዮዓታሜ ዓካኣዜ፤ ዓካኣዜ ሂዚቂያሴ ሾዔኔ።
¹⁰ ሂዚቂያሴ ሚናኣሴ፤ ሚናኣሴ ዓሞኦኔ፤ ዓሞኦኔ ዒዮሲያሴ
ሾዔኔ። ¹¹ ዒዮሲያሴ ዒሰራዔኤሌ ዴራ" ባብሎኔ ዓጮ" ዲዒንቲ
ዒውቴ ዎዶ"ና ዮባኬና ጌርሲንሢና ሾዔኔ።

¹² ባብሎኔ ዓጮ" ዲዒንቶኮ ጊንፃፓ ዮዓኬ ሳላቲያሌ፤
ሳላቲያሌ ዜሬባቡሌ ሾዔኔ። ¹³ ዜሬባቡሌ ዓብዲዮዴ፤ ዓብዲዮዴ
ዔኤሊያቄሜ፤ ዔኤሊያቄሜ ዓዘሬ ሾዔኔ። ¹⁴ ዓዘሬ ሳዶቄ፤ ሳዶቄ
ዓከሜ፤ ዓከሜ ዔኤሊያዴ ሾዔኔ። ¹⁵ ዔኤሊያዴ ዓላዜሬ፤ ዓላዜሬ

ማእታኣኔ፤ ማእታኣኔ ያይቆኑቤ ሾዔኔ። 16 ያይቆኑቤ ዮሴፔ ሾዔኔ፤ ዬይ ዮሴፔ ሜሲሄ * ጌይንቱ፤ ዬሱሴኮ ዒንዶ ማይራሞ ዔኬሢኬ።
 17 ዓካሪ ዓብራሃ ማይዳፓ ዳውቱ ሄላ"ንዳኣና ታጾ ያይዶ ሾይንቲ፤ ዳውቱይዳፓ ባብሎኔ ዓጮ" ዲዒንቶ ሄላ"ንዳኣና ታጾ ያይዶ ሾይንቲ፤ ባብሎኔ ዓጮ" ዲዒንቶይዳፓ ሜሲሄ ሄላ"ንዳኣና ታጾ ያይዶ ሾይንቲኬ።

ዬሱስ ኪሪስቶስኮ ሾይንቶ
 (ሉቃ. 2፡1-7)

18 ዬሱስ ኪሪስቶስኮ ሾይንቶ ጎይፃ ያደከ፤ ዒዛኮ ዒንዳ፤ ማይራሞ ዮሴፔና ያክጨነቲ ዔያታ ዋሊ ዔኩዋንቱ ዓያና ጌኤሺዳፓ ዒዛ ጎጲ ዔኪ ጴዳኔ። 19 ዒዛ ያክጨሢ ዮሴፔ ጋዓንቱ ኮሺ ዓሲ ማዔሢሮ ዓሲ ቤርቲዳ ዒዛ ዳውሲሳኒ ኮዒባኣሢሮ ዴሜና ሃሻ"ኒ ማሌኔ። 20 ዬኖ ማሊያና ዒ ዓኣንቱ፤ ያኦሲኮ ኪኢታንቶ ዓውቲና ዒዛሞ ጴዳ፡- «ዳውቱ ናዓሃ፤ ዮሴፔ! ኔኤኒ ያክጨዛ፤ ማይራሞ ጎጲዳሢ ዓያና ጌኤሺዳፓ ማዔሢሮ ማሊ ሂርጉዋዖ ዒዛ ዔዔኬ። 21 ዒዛ ዓቲንቁ ናይ ሾዓንዳኔ፤ ዒዚ ዴሮ" ጎሞይዳፓ ዳቂሻንዳሢሮ ሱንዖ ዒዛኮ ኔ «ዬሱሴ» ጌይ ጌሢ» ጌዔኔ።

22 ዬይ ቢያ ያደረ ማዔሢ ያኦሲ፤ ፔ ማሊያ ኬኤዛ ዒሲያሴ ዛሎ"ና፡- 23 «ሓይሾ ዓቲንቁ ዔሩዋ ኩሙሢ ዉዱሮ ናይ ጎጲ ዔኪ፤ ዓቲንቁ ናይ ሾዓንዳኔ፤ ሱንዖ ዒዛኮ «ዓማኑዔኤሌ» ጌይንቲ ጌሢንታንዳኔ» ጌዒ ኬኤዛሢ ኩማንዳጉዲኬ። (ዓማኑዔኤሌ ጌይፃ፡- ያኦሲ ኦኡና ዋላ"ኬ ጌይሢኬ።)

24 ዮሴፔ ዒማ"ና ጊንዓሰካፓ ጴጫዖ ያክዛሢኮ ኪኢታንቶሢ ዒዛ ዓይሢ ጎይፃ ዒ ያክጨ፤ ማይራሞ ዔኬኔ። 25 ማዔቶዋ ናዖ ዒዛ ሾዓንዳፃ ሄላ"ንዳኣና ዒዛና ዒ ላሂባኣሴ፤ ዬካፓ ዮሴፔ ሾይንቲ ናዓሢኮ ሱንዖ «ዬሱሴ» ጌዒ ጌሢኔ።

2

ዓባ" ኬሰካ ዛላ"ፓ ሙኬ ዦኦፓሢ ዛጋ ዔሮ" ዓሶ

1 ካኣቲ ሂሮዲሴ ዋዶ"ና ዬሱሴ ዪሁዳ ዓጫ"፤ ቤኤቲሌሃሜ ካታሞይዳ ሾይንቲኔ፤ ዬካፓ ዓባ" ኬሰካ ዛላ"ፓ ዦኦፓሢ ዛጊ ዔራ ዔሮ"ንሢ ዬሩሳላሜ ሙኪ፡- 2 «ሾይንቱ፤ ዓይሁዳ ዓሶ ካኣቲ

* 1:16 ሜሲሄ፡- ጌሪኬ ሙኤቺና ኪሪስቶስ ጌይሢ ማዓዛ ቡሊ"ፃ፡- «ካኣቲሞሞ ዓርቆና» ጌይሢኬ። 1:18 ሉቃ. 1፡27። 1:21 ሉቃ. 1፡31። 1:23 ዒሲ. 7፡14። 1:25 ሉቃ. 2፡21።

ዓንካዳይ? ዓባ" ከሰካ ዛሎ"ይዳ ዠኦጋህ ዴንቂ ዒዛሞ ኑ ዚጋኒ ሙኬኔ» ጌዔኔ።

³ ካኣቲ ሄሮዲሴ ዬያ ዋይዜ ዋደ"ና ዲቃቲኔ፤ ዲቃቲህ ዒዛ ሌሊቱዋንቲ ዬሩሳሌም ዓፍ" ዓሶ ቢያህኒ። ⁴ ዒዚያ ቄኤሶኮ ሱኡጎና ዓይሁዶ ዓሶኮ ዋጎ ዔርዛ ዓሶ ቢያ ዔኤሊ"፡- «ሜሲሔ ሾይንታንዳህ ዋካዳይ?» ጌይ ዔያቶ ያኦፎኔ።

⁵ ዔያታ ማሃዖ፡- «ሜሲሔ ሾይንታንዳህ ዪሁዳ ዓፍ"ይዳ ቤኤቴሌሄሜ ካታማ"ኬ፤ ዓይጎሮ ጌዔቶ ያኦሲ ማሊያ ኬኤዛህ ዛሎ"ና።

⁶ <ዪሁዳ ዓፍ"ይዳ ዓኣ ቤኤቴሌሄሜ ካታሜሌ!

ዪሁዳ ዓፍ" ዓኣ ዴኤፖ ዴኤፖ ካታማ"ፓ ኔ ዳካዓኬ።

ዓይጎሮ ጌዔቶ ታኣኮ ዴሮ"፤ ዒሰራዔኤሌ ሄንቃንዳያና

ዋይሃንዳይ ኔጊዳፓ ኬሰካንዳኔ» ጌይንቲ ፃኣፒንቲሂሮኬ።

⁷ ዬካፓ ሄሮዲሴ ዬንህ ዔሮ" ዓሶንህ ዴሜና ዔኤሊ"ሲ ዠኦጋህ ዔያቶም ጴዴ ዋደ" ኮሺ" ያኦፎ ዔሬኔ፤ ⁸ ዬካፓ፡- «ሃህ ዴንዲጋፓ ናዓህ ዛጊ ኮዑዋቲ፤ ታኣኒያ ሃህ ዴንዲ ዒዛሞ ዚጋንዳጉዲ፤ ዒንህ ዒዛ ዴዴንቃዖ ታ ባንህ ሙኪ ዒዚ ዋካ ዓኣቲያ ታኣም ኬኤዙዋቲ» ጌይ ቤኤቴሌሄሜ ዳኬኔ።

⁹ ዔያታ ካኣቲ ጌዔህ ዋይዜህኮ ጊንፃ ኬሰኪ ዓኣዳ ዋደ"ና ዓባ" ኬሰካ ዛሊ" ዔያታ ዴንቂ ዠኦጋህ ዔያቶኮ ቤርታ ቤርታ ማዒ ዔያቶ ዔኪ ዓኣዳህ ላሚ ዔያታ ዴንቄኔ፤ ዬይ ዠኦጋህ ናዓህ ዓኣ ቤዞ ሄሊ"ዖ ዔቄኔ። ¹⁰ ዔያታ ዠኦጋህ ዛጊ ዋደ"ና ሚርጌና ዋዛዴኔ፤ ¹¹ ናዓ ዓኣ ኬኤያ ዔያታ ጌላዖ፤ ናዖና ዒንዶ ማይራሞና ዴንቄኔ፤ ዬካፓ ጉምዓቲ ዒዛሞ ዚጋዖ ሳኣፂኖ ዔያቶኮ ቡሊ" ዋርቄ፤ ዑንጁ፤ ካርቤ ጎዖ ሳውዋ ባኮዋ ዒንጊ ዒኢሺኔ፤ ዬይ ባካ ሚርጌ ሚኢሺ ኬሳ"ያኬ።

¹² ዬካፓ ያኦሲ ዔያቶ ሄሮዲሴ ባንህ፤ ሙኬ ጎይዖና ማዑዋጉዲ ዓ'ውቲና ላኣኬሂሮ፤ ዔያታ ሜሌ" ጎይሂና ፔ ዓፍ" ማዒ ዴንዴኔ።

ዮሴፔንሂኮ ገብፄ ዓፍ" ቤቲያ

¹³ ዔሮ" ዓሶንህ ዓኣዴሰካፓ ጎዳኮ ከኢታንቻ ዮሴፔም ዓውቲና ጴዳዖ፡- «ሃካፓ ዔቁ! ኔኤኒ ማዒ ሙካንዳ ዋደ" ታ ኔኤም ኬኤዛንዳያ ሄሊ"ንዳኣና ናዓሂና ዒንዶና ዔኪ ገብፄ ዓፍ" ቤቲ ዒኢካ ዴዔ፤ ዓይጎሮ ጌዔቶ ካኣቲ ሄሮዲሴ ናዓህ ዋዳኒ ኮዓኔ» ጌዔኔ።

14 ዬሮ የሴፔ ዓቃያ ናዓሢና ዒንደሎና ዓኪ ዲሞና ጊብፄ ዓጮ" ዓኣጴኔ። 15 ዒኢካ ካኣቲ ሄሮዲሴ ሃይቃንዲያ ሄላ"ንዳኣና ናንጌኔ፤ ዬይ ያዲ ማዕሢ' ያኦሲ ፔ ማሊያ ኬኤዛሢ ዛሎ"ና፡- «ታኣኮ ናዓሢ ጊብፄይዳፓ ታ ዓኤሌ"ኔ» ጌዔ ቃኣላ" ኩማ"ንዳጉዲኬ።

ካኣቲ ሄሮዲሴ ዳኮ" ናኣቶ" ዎዲሼሢ

16 ዔሮ" ዓሶንሢ ዒዛ ጌሼሢ ሄሮዲሴ ዔሬ ዎደ"ና ሚርጌና ዳጋዲ፥ ቤኤቴሌሄሜ ካታሞና ኮይሎ"ይዳ ዓኣ ጉርዶ ቢያ ዒዛኮ ፖኦሊሶ ዳኪ፥ ላምዎ ለዔና ያፓ ደማ" ማዕ ዓቲንቆ ናኣቶ" ቢያ ዎዲሼኔ፤ ዬያ ዒ ሂዳሢ ኩኦጋሢ ጴዴ ዎደ" ዔሮ"ንሢዳፓ ያኦጪ ዎይዜ ጎይያናኬ። 17 ያዲ ማዒያና ያኦሲ ማሊያ ኬኤዛ ዔርሚያሴ ዛሎ"ና፡-

18 «ዬኤፒና ሚርጌ ዒላቲ ዑኡሲና ራማ ዓጮ"ይዳ ዎይዚንቴኔ፤

ራሂላኣ ፔ ናኣቶ" ዛሎ"ሮ ዬኤኬኔ፤

ናኣታ" ዒዛኮ ኩዳሢሮ ደዲያ ባሺንቴኔ»

ጌዒ ኬኤዜሢ ኩሜኔ።

የሴፔንሢኮ ጊብፄ ዓጮ'ፓ ማዒያ

19 ሄሮዲሴ ሃይቁሢኮ ጊንዓ ጎዳኮ ከኢታንቻሢ የሴፔሞ ዓ'ውቲና ጴዳዶ፡- 20 «ሃይካፓ ዔቁ! ናዓሢና ዒንደና ዓኪ ጊንሣ ዒሰራዔኤሌ ዓጮ" ማዕ፤ ዓይጎሮ ጌዔቶ ናዓሢ ዎዳኒ ኮዓ ዓሳ ቢያ ሃይቁኔ» ጌዔኔ። 21 ዬካፓ የሴፔ ዔቁ ናዓሢና ዒንደና ዓኪ ዒሰራዔኤሌ ዓጮ" ማዒ ዳንዴኔ።

22 ጋዓንቴ ዓርኬሌዎሴ ፔ ዓዶ ሄሮዲሴ ቤዛ፥ ዪሁዳ ዓጮ"ይዳ ካኣታዴሢ ዎይዜሢሮ ዬካ ዓኣዳኒ የሴፔ ዒጊጨኤ። ዬካፓ ዓ'ውቲ ዒዛሞ ኬኤዜሢሮ ጌሊላ ዓጮ" ዓኣዲ፥ 23 ናዝሬቲ ጌይንታ ካታሞይዳ ናንጌኔ፤ ዬይ ያዲ ማዕሢ' ያኦሲ ማሊያ ኬኤዛ ዓሶ ዛሎ"ና «ናዝራ ዓሲ» ጌይንታንዳኔ ጌይንቴሢ ኩማ"ንዳጉዲኬ።

3

ማሰካ የሐኒሴ ዬሱሴ ዛሎ" ዴ ጊዲ ኬኤዜሢ

(ማር. 1፥1-8፤ ሉቃ. 3፥1-18፤ ዮሐ. 1፥19-28)

1 ዬኖ ዎደ"ና ማሰካ የሐኒሴ ዪሁዳ ዓጮ" ዓሲ ናንጉዎ ዳውሎ"ይዳ ዓሶሞ ኮዦ ሃይሶ ኬኤዚ ኬኤዚ ሙኬኔ። 2 ዒዚ

ከኤዜሢ:- «የኦሲ ካኦቱማ ዑኬኔ፤ ጎሞ ቡኡፀዋቱ» ሂዚ ጌዒኬ።

3 « ሳዳኮ ጎይያ ገኢጊሹዋቱ፤

ሉኦጎ ጎይያዋ ፒዚሱዋቱ» ጌዒ ጌዒ

ዓሲ ናንጉዋ ዳውሎ"ይዳ ዒላታ ዓሲ ዑኡሲ» ጌዒ

የኦሲ ማሊያ ከኤዛ ዒሲያሴ ከኤዜሢ ዬያ የሐኒሴ ዛሎ"ኬ።

4 የሐኒሴኮ ማእዓሢ ጋኦሎ ጋፓኔፓ ኮሾ"ናያኬ፤ ከርኖይዳ ዒ ቃልሾ ቱካ"ኔ፤ ሙዓ ሃሃ ዒዛኮ ዓቢሢና ዑቶ ዒኤሲ"ናኬ፤ 5 ዬኖ ዋዶ"ና ዪሁዳ ዓጮ" ዪሩሳላሜ ካታማ"ፓ፡ የርዳኖሴ ዋሮ ኮይላ" ዓኦ ዓጮ"ፓ ዓሳ ቢያ የሐኒሴ ኮይላ" ሙኪ፤ 6 ጎሞ ፔኤኮ ቡኡዒ ቡኡዒ ዒዛ ኮይላ" የርዳኖሴ ዋሮ ዋኦያ ማስታኔ።

7 የሐኒሴ ሚርጌ ፔርሴ ዓሲንታ ሶዶቄ ዓሲንታ ዋኦያና ማስታኔ ዒዛ ኮራ ሙካሢ ዛጋያ:- «ሃይ ዒንሢ ሾኦዝ! ሙካ የኦሲኮ ጎራ"ንቶይዳፓ ዒንሢ ቶላ"ንዳ ጎይያ የኦኒ ዒንሢም ከኤዜይ?

8 ዓካሪ ሃሢ ዒንሢኮ ጎሞ ቡኡዒያ ዒርዛ ማላታ ማዲዋቱ።

9 «ኦኦኒ ዓብራሃሜ ናኦቶ"ኬ» ጌዒ ጌዒ ሄርሺንቲፖቱ፤ የኦሲ ሃያ ሹጮይዳፓ ዓብራሃሜ ናይ ማሃኒ ዳንዳዓኔ ታ ዒንሢም ጋዓኦኬ።

10 ሃሢ ዓካሪ ሚያ ፃጸፓ ቲቃኒ ሄርጋ ገኢጊንቲ፤ ቃራ ዓኦፒ ዓኦፑዋ ሚሢ ቢያ ቲቂንቲ ታሚዳ ዓጊንታንዳኔ። 11 ሐሢ ታ ዒንሢ ጎሞ ቡኡዒያ ዒርዛያ ማሃ ዋኦሢና ማስካኔ፤ ጋዓንቲ ታኦኮ ጊንያ ሙካሢ ዓያና ጌኤሺና ሃሃ ታሚና ዒንሢ ማስካንዳኔ፤ ዒ ታጊዳፓ ሚርጌና ባሼታሢሮ ታ ዒዛኮ ቶኮ" ዱርዘታያ ከዳኒ ኮይሳ ዓሲቲዋሴ።

12 ዒዛኮ ሃኦኮ ሶኦሪ ጌኤሾ ዓንዳ ዓኦሢሮ፤ ጌኤሹሢ ጊንያ ዓኦንሢ ኮና ዋሃ ዲኢሮ ባይቁዋ ታሚዳ ሚቻንዳኔ» ዒያቶም ጌዒኔ።

ዬሱሴኮ ዋኦያና ማስቲያ

(ማር. 1፡9-11፤ ሉቃ. 3፡21-22)

13 ዬኖ ዋዶ"ና ዬሱሴ የሐኒሴ ኮራ ዋኦያ ማስታኔ ጌለላ ዓጮ"ይዳፓ የርዳኖሴ ዋሮ ሙኬኔ። 14 የሐኒሴ ጋዓንቲ:- «ዬይ ማዓዓኬ፤ ታ ኔ ኮራ ማስታኒ ኮይሳንቲ፤ ኔ ታ ባንሢ ሙካ?» ጌዒ ለኦጊሢ ዓርቄኔ።

15 ዬሱሴ:- «የኦሲ ኮዓ ባኮ ቢያ ሂዲ ኦ ኩንሣንዳያ ኮይሳሢሮ ሃሢ ለኦጊፖ፤ ያዒ ማማያንጎ» ጌዒ ማሃዛ፤ የሐኒሴ ዒ ጌዒሢ

3:2 ማቴ. 4፡17፤ ማር. 1፡15።

3:3 ዒሲ. 40፡3።

3:4 2ካኦቶ. ማ 1፡8፤

ዛካ. 13፡4፤ ሊዊ. ዓኬ 11፡22።

3:7 ማቴ. 12፡34፤ 23፡33።

3:9 የሐ. 8፡33።

3:10 ማቴ. 7፡19።

ዋይዛያ ዩሱሴ ዋኣያና ማስኬኔ። ¹⁶ ዩሱሴ ዋኣፃፓ ማስቲ ኬከሰካኣና ጫሪንጫ ቡሊ"ንቲ፥ ያኦሲኮ ዓያና" ዶኦሌ" ማሊ ኬዲ" ዒዛ ዑፃ ደዓንጉቲ ዒ ደንቄኔ። ¹⁷ ዩማና፦ «ታና ዋዛሳ፥ ታ ዒዛ ናሽካ ናዓሢ ታኣኮ ሃያኬ» ጋዓ ዑኡሲ ጫሪንጫፓ ዋይዚንጉቲ።

4

ፃላሄ ዩሱሴ ዛጋኒ ጌሺ ጌሺያ

(ማር. 1፥12-13፤ ሉቃ. 4፥1-13)

¹ ዩካፓ ጌኤዠ ዓያና" ፃላሄ ዒዛ ዛጋኒ ጌሻንዳጉዲ ዓሲ ናንጉዋ ዳውሎ" ዩሱሴ ዒኪ ዓኣዴኔ። ² ዒኢካ ዒ ያይዲታሚ" ርኦሪና ዋንቲና ሙኡዚ" ሙዑዋያ ደዒሰካፓ ናይዲንጉቲ። ³ ዩማ"ና ጌሻ ፃላሄ ዩሱሴ ኮራ ሙካያ፦ «ሂንዳ ኔ ያኦሲ ናይ ማዕቲ፥ ሃንሢ ሹጮንሢ ካሣ ማሄ» ጌዔኔ።

⁴ ዩሱሴ ማሃያ፦ « <ዓሲ ናንጋሢ ያኦሲ ኬኤዛ ቃኣሎ"ና ማዓንዳፓዓቲም ካሣ ሙዒ ሌሊቱዋሴ> ጌይንቲ ፃኣፒንጉቲ» ጌዔኔ።

⁵ ዩካፓ ሃሣ ፃላሄ ዩሱሴ ያኦሲም ደማዴ ካታዋ፥ ዩሩሳላሚ ዒኪ ዓኣዳያ ጌኤዠ ማኣሮኮ ሄላሰካ ኬሲ" ዒቂሲ፦

⁶ « <ኔና ካፓንዳጉዲ ያኦሲ ፔ ኪኢታንቸ ኔኤም ዓይሣንዳኔ፤

ቶካ" ኔኤኮ ሹጮይዳ ዲይንጉዋጉዲ፥

ዒያታ ፔ ኩጮና ዓርቂ ኔና ቃዛንዳኔ» ጌይንቲ ፃኣፒንጉቲ፤

ዩያሮ ኔ ያኦሲ ናይ ማዕቲ፥ ሂንዳ ሃይፓ ለካ ጰሌ"» ጌዔኔ።

⁷ ዩሱሴ ማሃያ፦ « <ኔ ኅዳ፥ ያኦዛሢም ፒራኒ ማሊፖ> ጌይንቲ ሃሣ ፃኣፒንጉቲ» ጌዔኔ።

⁸ ዩካፓ ጊንሣ ፃላሄ ዩሱሴ ኮሺ" ያደሲ ዲካ ኬሲ" ዓጮ" ካኣቶ" ቢያሢና ዒያቶኮ ቦንቸዋ ዳዋያ፦ ⁹ «ጉምዓቲ ኔ ታኣም ዘጊ ካኣሽኬቲ፥ ሃያ ታ ኔኤም ቢያ ዒንጋንዳኔ» ጌዔኔ።

¹⁰ ዩሱሴ ማሃያ፦ «ኔኤኒ ሓይ ፃላሄ፥ ሴካ ሸኢኬ! <ኔ ኅዳ ያኦዛሢም ዘጊ፤ ሃሣ ዒዛ ሌሊ ካኣሽኬ» ጌይንቲ ፃኣፒንጉቲ» ጌዔኔ።

¹¹ ዩካፓ ፃላሄ ዩሱሴ ሃሺ" ዓኣዳዛ፥ ያኦሲኮ ኪኢታንቸ ሙኪ ዒዛ ማኣዴ"ኔ።

3:17 ማዢ. ማፃ 22፥2፤ ዓይኑ. 2፥7፤ ዒሲ. 42፥1፤ ማቲ. 12፥18፤ 17፥15፤ ማር.

1፥11፤ ሉቃ. 9፥35። **4:1** ዒ.ብ. 2፥18፤ 4፥15። **4:2** ኬሲ. ማፃ 34፥28፤

1ካኣቶ". ማ 19፥8። **4:4** ላሚ. ዋማ 8፥3። **4:5** ኔሄ. 11፥1፤ ዳኣኔ. 9፥24።

4:6 ዓይኑ. 91፥11-12። **4:7** ላሚ. ዋማ 6፥16። **4:10** ላሚ. ዋማ 6፥13።

ዩሱስ ጌሊላይዳ ዔርዚያ ዓርቄሂ

(ማር. 1፡14-15፤ ሉቃ. 4፡14-15)

12 ዮሐንስ ቴሎቴሂ ዩሱስ ዋይዜ ዎዶ"ና ጌሊላ ዓጮ" ዓላዴኔ፤

13 ዒኢካፓ ናዚሬቴ ካታሞ ሃሺ"፥ ቂፒርናሆሜ ካታሞ ዴንዴኔ። ቂፒርናሆሜ' ዛብሎኦኔና ኒፕታኦሌኤሜ ዓጮ"ና ኮይላ" ዓላ ባዚ" ዓቺ ካታማኬ። 14 ዬይ ያዲ ማዔሂ' ያኦሲ ማሊያ ኬኤዛ ዒሲያሴ ዛሎ"ና፡-

15 «ባዘ" ባንሂ ዓላዳ ጎይያና

ዮርዳኖሴ ዎሮ ሱኮናይዳ ዓላ

ዛብሎኦኔንታ ኒፕታኦሌኤሜንታ ዓጮ"

ዓይሁዴ ማዒባኦ ጌሊላ ዓሶ ዓጮ"፤

16 ዬያጉዲ ዲሞይዳ ናንጋ ዴራ"

ዴኤፒ ፖዒ ዴንቃንዳኔ፤

ባይሲንታሞ ጊኢጌ ዓጮ" ዓላ ዓሶሞ

ፖዒ ፖዒንዳኔ»

ጌይንቴሂ ኩማ"ንዳጉዲኬ።

17 ዬካፓ ዓርቃያ ዩሱሴ፡- «ያኦሲ ካኦቴማ ዑኬሂሮ ጎሞ ቡኦፀዋቴ» ጌዒ ጌዒ ዔርዚሂ ዓርቄኔ።

በርታሳ ዩሱሴ ጊንያ ሃንታዘንሂኮ ዔኤሊ"ንቲያ

(ማር. 1፡16-20፤ ሉቃ. 5፡1-11)

18 ዩሱሴ ጌሊላ ባዘ" ኮይሊ"ና ዓላዳያ፡ ላምያ ዎሊኮ ጌርሲ ማዔሰኬንሂ ዴንቄኔ፤ ዔያታ ጳዒርሴ ጌይንታ ሰሞኦኔና ጌርሲ ዒንዲራሴና ማዓዛ ዔያታ ሞሎ ዓርቃያታሂሮ ሞላሂ ዓርቆ ሮኦጮጉዴ ሱዞ ባዘ"ይዳ ዓጋኔ። 19 ዩሱሴ ዔያቶሞ፡- «ሃኒ ታ ጊንያ ሙኩዋቴ፤ ታ ዒንሂ፤ ዓሲ ፒሪ ዓርቃያ ማሃንዳኔ» ጌዔኔ። 20 ዔያታ ቤዘማና ሞላሂ ዓርቆ ሱዞ ሃሺ"፤ ዒዛ ጊንያ ዓላዴኔ።

21 ዬማፓ ዳካ" ዶጫያ ሃሂ ላምያ ዎሊኮ ጌርሲንሂ ማዓያ፡ ዜብዲዮሴ ናይ፡ ያይቆኦቤና ዮሐንሴና ዴንቄኔ። ዔያታ ፔኤኮ ዓዶ ዜብዲዮሴና ዎላ" ዋኦያና ፒንቆ ጎንጎይዳ ሞላሂ ዓርቆ ሱዞ ኮሻ"ንቲ ዩሱሴ ዔያቶ ዔኤሊ"ኔ። 22 ዔያታኦ ቤዘማና ዋኦያና ፒንቆ ጎንጎንታ ዓዶንታ ሃሺ"፤ ዒዛ ጊንያ ዓላዴኔ።

ዩሱሴኮ ሚርጌ ሃርጊንቲ ዓሶ ፖዒሶንታ ዓሶ ዔርዚያንታ

(ሉቃ. 6፡17-19)

23 ዬሱስ ዓይሁድ ዓሶኮ ቡኪንቶ ቤዘይዳ ዔርዚ ዔርዚ ሃሣ ምእሲ ካኣቱሞ ዛሎ" ኮዦ ሃይሶሞ ኬኤዚ ኬኤዚ ጌለላ ዓጮ" ቢያይዳ ሃንታዎ፡ ዴማ ዴማ ዶርዶና ሃርጊንቲ ዓሶ ፖዒሴኔ።
 24 ዬያይዳፓ ዔቄያና ዒዛኮ ሱንፃ ሶኦሪያ ዓጮ"ይዳ ቢያ ዋይዚንቲሢሮ ዓሳ ዴማ ዴማ ዶርዶና ሃርጊንቲ ሜታዳ ዓሶ ቢያ ዒዛ ኮይላ" ዔኪ ሙኬኔ፤ ዬያ ሃርጌ ዓሶ ባኣኮ"ይዳ ፑርታ ዓያና ዓርቄ ዓሲ፡ ዴንሣ ዶርዓ ዓኣ ዓሲና ዋቦ ዓሲያኣ ዓኣኔ። ዬሱስ ጋዓንቲ ቢያሢ ፓሢኔ። 25 ጌለላና ታጾ ካታሞንሢ ጌይንታ ቤዘንሢናይዳፓ ሃሣ ዬራሳላሜና ዪሁዳ ዓጮ"ይዳፓ፡ ዮርዳኖሴ ዋሮ ሱኮይዳፓ ሙኬ ሚርጌ ዓሲ ዬሱስ ጊንዖ ዓኣጴኔ።

5

ዬሱስ ዱኮ"ይዳ ኬኤዜ ቃኣሎ"

(ዓይ. 5-7)

1 ዬሱስ ሚርጌ ዴር" ዛጌ ዋዶ"ና ዱኮ" ኬሰኪ ዴዓዛ፡ ዒዛኮ ጊንዖ ሃንታዘንሢ ዒዛ ኮይላ" ሙኬኔ። 2 ዬካፓ ሂዚ ጌዒ ዔርዚሢ ሳርቄኔ፡-

ጎኔ ዋዛ

(ሉቃ. 6፡20-23)

3 «ምእሲዳ ጉሙርቂዖ ጌሢ ፔና ሂርኪዳዘንሢ
 ምእሲ ካኣቱማ ዔያቶሞ ማዔሢሮ ዋዛዶንጎ።
 4 ምያዘንሢ
 ምእሲ ዔያቶሞ ዶዱሞ ዒንጋንዳሢሮ ዋዛዶንጎ።
 5 ዒኖ" ሼሌዔዘንሢ
 ዓጮ" ዔያታ ዔካንዳሢሮ ዋዛዶንጎ።
 6 ዒሉ"ሞ ካሣጉዲ ናይዲንታዘንሢና
 ዋኣሢጉዲ ዴኤቢንታዘንሢ
 ዒሉ"ሞ ዴንቂ ዔያታ ሃውሻንዳሢሮ ዋዛዶንጎ።
 7 ዳቤ ዓሲሞ ዓቶሞ ጋዓዘንሢ
 ምእሲይፓ ማኣሪሢ ዔያታ ዴንቃንዳሢሮ ዋዛዶንጎ።
 8 ዒኖ" ጌኤዦንሢ
 ምእሲ ዔያታ ዛጋንዳሢሮ ዋዛዶንጎ።
 9 ፑርቲ ዓሲ ዋላ" ቡኩሳዘንሢና ካንሣዘንሢ
 ምእሲ ናይ ዔያታ ጌይንታሢሮ ዋዛዶንጎ።

4:23 ማቴ. 9፡35፤ ማር. 1፡39። 5:4 ዒሲ. 61፡2። 5:5 ዓይኑ. 37፡11።

5:6 ዒሲ. 55፡1-2። 5:8 ዓይኑ. 24፡3-4።

10 ዲሎ"ሞሮ ጌራ ዒዲንቲ ዳኪንታዞንሢና ሜቶ ዔካዞንሢ
 ያኦሲ ካኦቱማ ዔያቶም ማዔሢሮ ዎዛድንጎ።

11 «ዓሳ ዒንሢ ታ ዛሎ"ሮ ጫሽኪ፥ ዒዲ ዳካያ ማዔቴ ሃሣ ፑርታ
 ሉኡዙሞ ዒንሢዳ ጌሰቱቱ ዎዎዛድዎቱ። 12 ጫሪንጮይዳ ዒንሢ
 ዬያ ዛሎ"ሮ ዔካንዳ ባካ ዴኤፒታሢሮ ኮሺ" ዎዛድዎቱ፤ ሃያኮ
 ቤርታ ያኦሲ ማሊያ ኬኤዛዞንሢያ ዬያይዲ ዒዲ ዳኮናኔ።»

ሶኦጌና ፖዔናኮ ኮኦኪንሢ

(ማር. 9፥50፤ ሉቃ. 14፥34-35)

13 ዬካፓ ሃሣ ዬሱሴ፡- «ዒንሢ ዓጮ"ኮ ሶኦጌኬ፤ ጋዓንቱ
 ሶኦጌ ዓኣያ ዒዳቱ ዎይቲ ገንሣ ዓኣዳያ ማዓኒ ዳንዳዓይ? ሴካ
 ካራይዳ ኬኤሪንቲ ዓሲ ቶኪና ሄ'ርቃንዳኔ፤ ዓይጎማኣ ማዓዓኬ።

14 ዒንሢ ሃሣ ዓጮ"ኮ ፖዔኬ፤ ዲኤይዳ ዓኣ ካታማ ዓኣሺንታኒ
 ዳንዳዑዋሴ። 15 ዓሲ ፖዒ ፖዒሳያ ዔኤቢና ጉኡፒ ጌሣ? ጌሣሢ
 ፖዓ ጋርይዳ ዓኣ ዓሶም ቢያ ፖዓንዳጉዲ ዴ"ጌ ቤሲዳኬ።

16 ዬያጉዲ ዓሳ ዒንሢኮ ኮዙ ማድ" ዛጌ ዒንሢኮ ጫሪንጮ ዓዳሢ
 ጋላታንዳጉዲ ፖዓ ዒንሢኮ ዓሲ ቢያም ፖዖንጎ» ጌዔኔ።

ሙሴ ዎጎ ዛሎ"

17 ሃሣ ዬሱሴ፡- «ሙሴ ዎጎና ያኦሲ ማሊያ ኬኤዛ ዓሶና ዔርዛ
 ባኮ ለኣማ"ኒ ታ ዒንሢም ሙኬያ ማሎፓ፤ ታ ሙኬሢ ጌይንቱ
 ጎይያ ኩኩንሢሢ ሙካንዳኣፓዓቱም ለኣማ"ኒ ሙኪባኣሴ። 18 ጎኔ
 ታ ዒንሢም ጋዓኔ፡ ጫሪንጮና ሳዖና ለኣሚ"ንታንዳያ ሄላ"ንዳኣና
 ሙሴ ዎጎይዳፓ ፔቱ"፥ ዳካ" ባኣዚ"ታዖ ለኣሚ"ንታንዳኬ፤ ሙሴ
 ዎጎይዳ ፃኣፒንቱ ባካ ቢያ ኩማ"ንዳኔ። 19 ዬያሮ ዬንሢ
 ዓይሢያንሢዳፓ ዳኮ"ማታዖ ኩንሠዎዖ ሃሸ" ዓሢ፥ ሃንጎ
 ዓሶዎ ዳቢሻያ ማዒ ዔርዜቶ ያኦሲ ካኦቱሞይዳ ቦሂንቱ ዓሲ
 ማዓንዳኔ፤ ጋዓንቱ ዓይሢያንሢ ማዲ ኩንሣሢና ሃንጎ ዓቱ" ዓሶዎ
 ኩንሣንዳጉዲ ዔርዛሢ ያኦሲ ካኦቱሞይዳ ቦንቺንቱያ ማዓንዳኔ።

20 «ዒንሢኮ ዲሎ"ማ ፔርሴ ዓሶና ሙሴ ዎጎ ዔርዛዞንሢ
 ዲሎ"ማፓ ባሺባኣቱ ያኦሲ ካኦቱሞይዳ ማሊ ዒንሢ ጌላኒ
 ዳንዳዑዋሴ።

ዓሲ ዎዲሢ ኮይሱዋያ ማዔሢ

5:10 1ጴጊ. 3፥14። 5:11 1ጴጊ. 4፥14። 5:12 2ካኣቶ". ማ 36፥16፤ ዳኪ.
 ማድ" 7፥52። 5:13 ሉቃ. 14፥34-35። 5:14 ዮሐ. 8፥12፤ 9፥5። 5:15
 ማር. 4፥21፤ ሉቃ. 8፥16፤ 11፥13። 5:16 1ጴጊ. 2፥12። 5:18 ሉቃ. 16፥17።

21 «ቤርታ ዓሶም ጌይንቴሢ ዒንሢ ዋይዜኔ፤ ዬይያ <ዋዲፖቴ፥ ዓሲ ዋዲሢ ፑርታና ዋጊንታንዳኔ> ጋዓንኩ። 22 ታ ዒንሢም ሂዚ ጋዓኔ፡- ዓሲዳ ጎሪ"ንታሢ ቢያ ፑርታና ዋጊንታንዳኔ፤ ሃሣ ዓይጎ ዓሲታቶዋ <ኔኤኒ ፓሡዋኣሢ ሃይ> ጌዒ ጫሽኩቶ ዋጋ ዓሶ ቤርታ ፑርታና ዋጊንታንዳኔ፤ ሃሣ <ኔ ዒና ባይቁሢ ሃይ> ጌዒ ጫሽካሢ ቢያ ባይቁዋ ታዋ ዋጎም ማዓንዳኔ። 23 ዬያር ፆኦሲም ኔ ዒንጋ ባኮ ዒንጎ ቤዘይዳ ዒንጋ ዋዶ"ና ኔ ዒሻሢም ኔ ዳቤ ባኣዚ"ና ኔ ዒሻሢ ፆዬ ባኣዚ" ኔኤም ጳቂቴ፥ 24 ኔ ዒንጋ ባኮ፥ ዒንጎ ቤዘ ኮይላ" ጌሢጋፓ ዴንዲ ዬያ ዓሢና ዋላ" ቡኩ፤ ዬካፓ ሙኪ ኔ ዒንጋ ባኮ ዒንጌ።

25 «ኔ ሞርካሢ ኔና ዋጌና ዓይሢም፥ ኔ ዒዛና ዋላ" ዋጎ ዋጎ ቤዘ ዓኣዲፆይዳ ዓኣቴ፥ ዑኩና ኔ ሞርካሢና ዋላ" ጌኢጌ። ያዲ ማዒባኣታቶ ኔ ሞርካሢ ኔና ዋጎ ዋጋሢም ዓኣሢ ዒንጋንዳኔ፤ ዋጋ ዓሢያ ሃሣ ፖኦሊሳሢም ዒንጋዛ ቱኡዞ ማኣራ ኔ ቱኡታንዳኔ። 26 ጎኔ ታ ኔኤም ጋዓኔ፤ ጨጎንጎ ጎፆና ባኮ ጋፒሲ ኔ ጨጉዋፆ ዬካፓ ኬሰካዓኬ» ጌዒኔ።

ዓኒ ሃሣ ማፍ ማዒባኣ ዓሲና ላሂሢ ዛላ ኬኤዚንቴ ባኣዚ"

27 ዬሱሴ ሃሣ፡- « <ዓኒ ሃሣ ማፍ ማዒባኣ ዓሲና ላሂፓ> ጌይንቴሢ ዒንሢ ዋይዜኔ። 28 ታኣኒ ዒንሢም ጋዓንቴ <ላኣሊ ዛጊ ላሃኒ ማሌ ዓሲ ቢያ፥ ዬማና ፔ ዒኖና ዒዞና ላሂያ ማዓኔ> ጋዓኔ። 29 ዬያር ኔኤኮ ሚዛቆ ዓኣፓ ኔና ዳቢሻያ ማዒቴ ኔጊዳፓ ኬሲ" ኬኤሬ፤ ጉቤ ዑፃ ኔኤኮ ባይቁዋ ታሞይዳ ኬኤሪንታሰካፓ ዑፃኮ ኔኤኮ ፔቴ" ቤሲ ፓጩቶ ኮሺኩ። 30 ሚዛቆ ኩጫ ኔና ዳቢሻያ ማዒቴ ኔጊዳፓ ቲቂ ኬኤሬ፤ ጉቤ ዑፃ ኔኤኮ ባይቁዋ ታሞይዳ ኬኤሪንታሂዳፓ ዑፃኮ ኔኤኮ ፔቴ" ቤሲ ፓጩቴ ኮሺኩ» ጌዒኔ።

ላኣሊ ዓንጃሢ ኮይሱዋያ ማዒያ

(ማቴ. 19፥9፤ ማር. 10፥11-12፤ ሉቃ. 16፥18)

31 ዬሱሴ ሃሣ፡- «ዬያጉዲ <ፔኤኮ ማፍ ዓንጃሢ ቢያ ዒዞ ዓይጎር ዓንጃቶዋ ዔርዛ ባኣዚ" ፃኣፒ ዒንጎንጎ፤ ጌይንቴኔ። 32 ታ ጋዓንቴ ዒንሢም ሂዚ ጋዓኔ፡- ሜሌ" ዓሲና ዒኢቲሢ ዛላና ማዒባኣንቴ ፔ ማፍ ዓንጃሢ ቢያ ዒ'ዛ ዘኣሰካ ኮኣማንዳጉዲ

5:21 ኬሲ. ማፃ 20፥13፤ ላሚ. ዋማ 5፥17፤ 16፥18። 5:27 ኬሲ. ማፃ 20፥14፤ ላሚ. ዋማ 5፥18። 5:29 ማቴ. 18፥9፤ ማር. 9፥47። 5:30 ማቴ. 18፥8፤ ማር. 9፥43። 5:31 ላሚ. ዋማ 24፥1-4፤ ማቴ. 19፥7፤ ማር. 10፥4።

ማሃኔ፤ ዬሮ ዓንጂንቴዞ ዔካሢያ ዒዞና ዞኦስካ ኮኦማያ ማዓኔ»
ጌዔኔ።

ጫክቂሢ ዛላ ዔርዞና ባኣዚ "

33 ዬካፓ ሓሣ ዬሱሴ፦ «ሓያኮ ቤርታ ሚናኣ ዓሶም <ኔኤኒ
ያኦሲም ጫክቂ ባኣዚ" ኩኩንሢ፤ ኔ ጫክቂ ባኮ ሃሺ"ፓ> ጌይንቴሢ
ዒንሢ ዋይዜኔ። 34 ታኣኒ ጋዓንቴ ዒንሢም ሂዚ ጋዓኔ፦ ፔቴ"ታያ
ጫክቂፖቴ፤ ጫሪንቺ ዔኤሊ" ጫክቂፖቴ፤ ዓይጎር ጌዔቶ ጫሪንጫ
ያኦሲ ደዓ ቤዞኔ። 35 ሳዓ ዔኤሊ" ጫክቂፖቴ፤ ዓይጎር ጌዔቶ ሳዓ
ያኦሲ ቶኮ" ጌሣ ቤዞኔ። ዬሩሳላሜ ካታሞ ዔኤሊ"ያ ጫክቂፖቴ፤
ዓይጎር ጌዔቶ ዬሩሳላሜ ጴጌፖ ካኣታሢኮ ካታሞኬ። 36 ኔ ቶኦኮ"
ጋፓኖ ዔኤሊ"ያ ጫክቂፖቴ፤ ዓይጎር ጌዔቶ ኔኤኮ ቶኦኮ" ጋፓናፓ
ፔቴ"ማ ቡኡቂሳኒ ሃሣ ካርሣኒ ኔ ዳንዳዑሞኔ። 37 ዬያር ዒንሢኮ
ጌኤዛ <ሂዮ> ማዔቶ <ሂዮ> <ዔይዔ> ማዔቶ ዔይዔ ማያንጎ። ዬማፓ
ዑሣ ዓኣጳ ጌኤዞማ ፃላሄይዳፓኬ» ጌዔኔ።

ዓሲ ኮሚሢ ኮይሱሞያ ማዒያ

(ሉቃ. 6፡29-30)

38 ሃሣ ዬሱሴ፦ «<ዓኣፒ ዛላር ዓኣፒ፤ ዓቺ ዛላር ዓቺ> ጌይንቴሢ
ዒንሢ ዋይዜኔ። 39 ታ ጋዓንቴ ዒንሢም ሂዚ ጋዓኔ፤ ፑርታ ዒንሢም
ማዳ ዓሶም ኮሚ ማሂፖቴ፤ ጋዓንቴ ሚዛቆ ጋንጋር ባዓሢም ሻውሎ"
ጋንጋር ሺርሺ ቤኤዜ። 40 ፔቴ" ዓሲ ኔኤኮ ደማ" ማይንቶና
ዓፒሎ ዔካኒ ኔና ዋጌና ዓይሢቶ ዑፃ ኔ ማይንቴ ዓፒሎ ቃሲ"
ዔካንዳጉዲ ዒዛም ሃሺ"። 41 ፔቴ" ዓሲ <ታኣኮ ባሶ" ዔኪ ዳካ"
ታኣና ዋላ" ጎይያ ዓኣጳ> ጌዒ ዋልቃዴቶ ዒ ኮዔሢዳፓ ዑሣ ዒዛና
ዋላ" ዓኣጳ። 42 ኔና ሺኢቃሢም ዒንጌ፤ ኔጌዳፓ ታልዓኒ ኮዓሢ
ለኣጊፖ» ጌዔኔ።

ሞርኬ ናሽኪሢ ዛላ

(ሉቃ. 6፡27-36)

43 ዬሱሴ ሃሣ፦ «<ኔ ለጋሢ ናሽኬ፤ ኔ ሞርካሢ ዒፄ> ጌይንቴሢ
ዒንሢ ዋይዜኔ። 44 ታ ዒንሢም ጋዓንቴ ሂዚ ጋዓኔ፦ ዒንሢ ሞርኮ

5:32 ማቴ. 19፡9፤ ማር. 10፡11-12፤ ሉቃ. 16፡18፤ 1ቆር. 7፡10-11። 5:33
ሉዊ. ዓከ 19፡12፤ ፓይ. ማፃ 30፡2፤ ላሚ. ዋማ 23፡21። 5:34 ያይ. 5፡12፤ ዒሲ.
66፡1፤ ማቴ. 23፡22። 5:35 ዒሲ. 66፡1፤ ዓይኑ. 48፡2። 5:37 ሉዊ. ዓከ
19፡12፤ ፓይ. ማፃ 30፡2፤ ላሚ. ዋማ 23፡21። 5:38 ኬሲ. ማፃ 21፡24፤ ሉዊ. ዓከ
24፡20፤ ላሚ. ዋማ 19፡21። 5:42 ላሚ. ዋማ 15፡8፤ ኮኦኪ. 24፡29። 5:43
ሉዊ. ዓከ 19፡18።

ናሽኩዋቱ፤ ዲዲ ዳካዘንሢና ዲንሢ ሜታሳዘንሢናም ሸኢቁዋቱ።
 45 ያእዴ ዲንሢ ማዴቶ ጫሪንጮይዳ ዓኣ ዲንሢ ዓዳሢኩ ናይ
 ዲንሢ ማዓንዳኔ። ዲዚ ፑርቶና ኮፑናም ዓቢ" ኬሳ"ኔ። ዬያጉዲ
 ፑርቶ ዓሶና ኮፑ ዓሶናም ዲሮ ዲ ዋርቁሻኔ። 46 ዲንሢ፡ ናሽካ ዓሶ
 ሌሊ ዲንሢ ናሽኬቶ ዓይጎ ማዓንዳይ? ጎሞ ዓሳ ዬያይዲዋዓዳ?
 47 ዲንሢ ላጎንሢ ሌሊ ዲንሢ ዔኤሌ"ቶ ዓይጎ ባሼ ባኣዚ"
 ዲንሢ ማዴይ? ዓይሁዴ ማዒባኣ ዓሳ ዬያ ማዳያቱዋዓዳ?
 48 ዲንሢኩ ጫሪንጮ ዓዳሢ ፔቱ"ታ? ዳቢንቲባኣያ ማዔሢጉዲ
 ዲንሢያ ዲማዲ ማዑዋቱ» ጌዔኔ።

6

ዲንሢ ዛላ ዔርዘና ባኣዚ"

1 ዬሱሴ ጌኤዘ ጌሰታዎ፡- «ዓሲ ዲንሢኩ ዛጋንዳጉዲ ጌዒ ዲንሢ
 ማዳ ኮፑ ባኮ ዓሲ ቤርታ ፔጌና ማዲሢዳፓ ዲንሢና ካፑዋቱ፤ ያዲ
 ዲንሢ ማዴቶ ጫሪንጮ ዓዳሢ ኮይላ"ፓ ዲንሢ ዔኤሊ ዴንቃዓኬ።

2 ዓሲ ዛጎም ጌዒ ጎይያ ዓጮና ቡከንቶ ቤዘናይዳ ሄርሺንቲም
 ከኤዚ ከኤዚ ሸራ ዓሶጉዲ፤ ማንቆ ዓሶም ዲንሢ ዔኤሊ ዲንጋ
 ዋዶ"ና ዓሲ ዛጎም ጌዒ ማዲፖቱ፤ ዬያይዲ ማዳዘንሢ ዲማ"ና
 ዔያታ ፔኤሲ" ዴንቁ ጋጋፔኔ። 3 ዲንሢ ጋዓንቱ ማንቆ ዓሶም ዲንጋ
 ዋዶ"ና ዲንሢ ዲንጋ ባኮ ዓሲ ዔሮፓ፤ 4 ዲንሢ ዲንጋ ባኮ ዴማና
 ዲንጉዋቱ፤ ዴማና ዲንጊንታ ባኮ ዲንሢኩ ዴንቃ ዓዳሢ ዬያ ዛሎ"
 ማሂ ዲንሢም ዲንጋንዳኔ» ጌዔኔ።

ሸኢጲሢ ዛላ ዔርዘና ባኣዚ"

(ሉቃ. 11፡2-4)

5 ዬሱሴ ሃሣ፡- «ዲንሢ ሸኢቃ ዋዶ"ና ጉሪ ሄርሺንቶሮ ሸኢቃ
 ዓሶጉዲ ማዲፖቱ፤ ዔያታ ዓሲ ኑና ዛጎም ጌዒ ዓሳ ቡካ ቤዘና
 ጎይሢ ዓቺናይዳ ዔቁ ሸኢቃኒ ኮዓኔ። ጎኔ ታ ዲንሢም ጋዓኔ፡- ዔያታ
 ኮዓ ባኮ ቢያ ዬማና ዔከ ጋጋፔኔ። 6 ኔኤኒ ጋዓንቱ ሸኢቃኣና ቆልዖ
 ጋሮ ጌሊ፤ ካሮ" ዋዲጋፓ ጴዲዋ ቤዘይዳ ዓኣ ዓዳሢ ሸኢቁ፤ ዓሲ
 ዔፋዋንቱ ኔ ሸኢቁ ባኮ ዴንቃ ኔ ዓዳሢ ኔኤም ኮይሳሢ ዲንጋንዳኔ።

7 «ዲንሢ ሸኢቃ ዋዶ"ና ፓሁዋ ማለሢ ላሚ ላሚ ጌይሢና
 ሸኢጲያ ዔያቶሲ ዋይዚንታያ ማላ፤ ዓይሁዴ ማዒባኣ ዓሶጉዲ

5:44 ኮኣኪ. 25፡21-22። 5:48 ሊዊ. ዓከ 19፡2፤ 18፤ ላሚ. ዋማ 18፡13።

6:1 ማቴ. 23፡5። 6:5 ሉቃ. 18፡10-14።

በእኪ ውሑቃኒ ዳንዳዑዋ፥ ሎ ጨሪንጮ ማኣሮይዳ ዒንሢኮ ቆሎ" ቡኩሱዋቴ።²¹ ዒንሢኮ ቆላ" ዓኣ ቤዘይዳ ማሊፃኣ ዒንሢኮ ዒኢካ ማዓንዳኔ።

ዑሢ ፖሲ

(ሉቃ. 11፥34-36)

²² «ኔኤኮ ዓኣፓ ዑፆኮ ፆንፔኬ፤ ዬያሮ ዓኣፓ ኔኤኮ ኮሺ ማዔቶ ጉቤ ዑፃ ኔኤኮ ፖዓያ ማዓኔ፤²³ ዓኣፓ ኔኤኮ ሃርጌያ ማዔቶ ጋዓንቴ ጉቤ ዑፃ ኔኤኮ ደሚ" ማዓኔ፤ ዓካሪ ኔጊዳ ዓኣ ፖዓ ደሚ" ማዔቶ ዬይ ደሚ" ዋማጉዲ ሻኔ ደሚ" ማዓንዳይ?

²⁴ «ፔቴ" ዓሲ ላምፆ ጎዳቲም ማዳኒ ዳንዳዑዋሴ፤ ማዳቴ ፔቴ"ሢ ዒደ ባጋሢ ናሽካንዳኔ፥ ማዒባኣቶ ፔቴ"ሢ ቦንቺ ፔቴ"ሢ ቦሃንዳኔ፤ ዬያጉዲ ፆኦሲና ሚኢሼናም ፔቴ"ና ማዳኒ ዳንዳዒንቱዋሴ» ጌዔኔ።

ናንጊ ዛላ ሜታዳኒ ኮይሱዋያ ማዒያ

(ሉቃ. 16፥13፤ 12፥22-31)

²⁵ ዬሱሴ ሃሣ ኬኤዘያ፡- «ዒንሢ ናንጎ ዛሎ" ዓይጎ ኑ ሙዓንዳይ? ዓይጎ ኑ ዑሽካንዳይ? ሃሣ ዓይጎ ኑ ማይንታንዳይ? ጌዒ ማሊ ሜታዲፖቴ። ሼምፓ ሙኡዚ"ዳፓ፥ ዑሢ ማኣፆይዳፓ ባሽቱዋዓዳ? ²⁶ ሂንዳ ካፖ ዛጉዋቴ፤ ጎሽኩዋሴ፥ ሃኣኮ ታይዚ ኮናይዳ ዋሁዋሴ፤ ማዔቶዋ ዒንሢኮ ጨሪንጮ ዓዳሢ ዔያቶ ሙኡዘኔ። ሂዳፆ ዒንሢ ዔያቶይዳፓ ባሽቱዋዓዳ? ²⁷ ጎፆንቴ ዒንሢ ባኣካ"ፓ ሜታዲ ናንጎ ሌፆይዳ ዳካ" ዋዴ * ቃሳ"ኒ ዳንዳዓይ ዓኣ?

²⁸ «ሃሣ ማኣፆ ዛላኣ ዓይጎሮ ዒንሢ ሜታዲ ማለይ? ሂንዳ ካፖ ቡኖ ዛጉዋቴ፥ ዔያታ ሜታዲ ሱኩዋሴ፤ ²⁹ ጋዓንቴ ካኣቲ ሴሎሞኔ ቦንቺንቴታቴያ ዬያ ቡኖይዳፓ ፔቴ"ማጉዲታፆ ማይንቲ ሚዛጰባኣሴ፤ ታ ዒንሢም ጋዓኣኬ። ³⁰ ዓካሪ ዒንሢ ጉሙርቂፆ ዳኬ" ዓሳ! ሃኖ" ኮሽካፆ ዚሮ ታሚዳ ዓገንታ፥ ካፖ ማኣቶ ዬያይዲ ፆኦሲ ፓልሚሴቶ ዒንሢም ዋይቲ ባሽና ዒ ማሊንዲዋይ? ³¹ ዬያሮ ዓይጎ ኑ ሙዒ፥ ዑሽካንዳይ? ሃሣ ኑ ዓይጎ ማይንታንዳይ? ጌዒ ማሊ ሜታዲፖቴ፤ ³² ዓይሁዴ ማዒባኣ ዓሳ ዬንሢ ባኮንሢ ዴንቆሮ ማሊ ሜታዳኔ፤ ዒንሢኮ ጨሪንጮ ዓዳሢ ዬይ ቢያ

* **6:27** ናንጎ ሌፆይዳ ዳካ" ዋዴ ጋዓዘ፡- ፔቴ" ፔቴ" ማፃኣፓ «ፔ ዔጰይዳ ፔቴ" ዋዴ» ጋዓኔ። **6:27** ዓይኑ. 39፥5-7። **6:29** 1ካኣቶ". ማ 10፥4-7፤ 2ፆኦሲ. ዓሃኬ 9፥3-6።

ዲንሢም ኮይሳሢ ዔራኔ። ³³ ቢያይዳፓ ቤርታዲ ጋዓንቴ የኦሲኮ ካኦቱሞና ዒሉ"ሞና ኮዑዋቴ፤ ዬይ ዲንሢ ማላ ባካኦ ቢያ ዲንሢም ዲንጊንታንዳኔ። ³⁴ ዬያሮ ዚራ ባኦዚ"ሮ ማላ ሜታዲፖቴ፤ ዚሮ ማላሳ ባካ ዚራሮ ማዖንጎ፤ ፔቴ" ፔቴ" ኬላ" ፔኤኮ ጊዳ ሜቶና ዓኣያኬ» ጌዔኔ።

7

ዓሲ ዑስካ ዋጊሢ ዛላ (ሉቃ. 6፡37-42)

¹ ዬሱሴ ሃሣ ኬኤዛዖ፡- «የኦሲ ዲንሢዳ ዋጉዋጉዲ ዖናኦ ሩፒ ፑርታኬ» ጌይ ዋጊፖቴ፤ ² ዲንሢ ዋጌ ጎይዖማ ዲንሢም ዋጊንታንዳኔ፤ ዲንሢ ማኬ"ማና ዲንሢም ማኬ"ንታንዳኔ። ³ ኔ ዓኣፖይዳ ዓኣ ዴኤፖ ቡኡሮ ዴንቁዋዖ ኔ ላጋሢኮ ዓኣፖይዳ ዓኣ ዳኮ" ቡኡሮማ ዓይጋ ኔ ዛጋይ? ⁴ ኔ ዓኣፖይዳ ዴኤፒ ቡኡራ ዓኣንቴ፤ «ኔኤኮ ዓኣፓፓ ዳኮ" ቡኡሮማ ታ ኬሉ"ሞ» ዋይቴ ኔ ጋዓኒ ዳንዳዓይ? ⁵ ሃይ ኔ ሄርሺንታሢ ሃይ! ቤርታዲ ኔኤኮ ዓኣፓ ዓኣ ዴኤፖ ቡኡሮ ኬሴ"፤ ዬካፓ ኔ ላጋሢኮ ዓኣፓ ዓኣ ዳኮ" ቡኡሮማ ኔ ዴንቁ ኬሳ"ንዳኔ። ⁶ የኦሲም ዱማዴ፤ ጌኤኸ ባኮ ካናቶም ዓጊፖቴ፤ ሃሣ ሚዛጶ ሹጮ ጉዲንዖ ቤርታ ኬኤሪፖቴ፤ ዓይጎሮ ጌዔቶ ጉዲንዖ ዬያ ሚዛጶ ሹጮ ቶኪና ሄርቃንዳኔ፤ ካናታ ሃሣ ጊንሣ ሺሪ ዲንሢ ዳዓንዳኔ» ጌዔኔ።

ሺኢጲሢ ዋልቁ (ሉቃ. 11፡9-13)

⁷ ዬሱሴ ሃሣ ኬኤዛዖ፡- «ሺኢቁዋቴ ዲንሢም ዲንጊንታንዳኔ፤ ኮዑዋቴ ዲንሢ ዴንቃንዳኔ፤ ካራ" ዔቁ ዔኤሉ"ዋቴ ካራ" ዲንሢም ቡሊ"ንታንዳኔ። ⁸ ሺኢቃሢም ቢያ ዲንጊንታንዳኔ፤ ኮዓሢያ ዴንቃንዳኔ፤ ካራ" ዔቁ ዔኤላ"ሢማኦ ካራ" ቡሊ"ንታንዳኔ።» ⁹ «ዲንሢ ባኦካ"ፓ ናዓ ካሣ ሺኢቃዛ ሹቺ ዲንጋ ዓዴ ዓኣ? ¹⁰ ሃሣ ጊንሣ ዓሽኪ ሺኢቃዛ ሹኦሺ ዲንጋይ ዓኣ? ¹¹ ዓካሪ ዲንሢ ፑርታታዖ ዲንሢ ናኦቶ"ሞ ኮሺ ባኦዚ" ዲንጊ ዔራቶ፤ ዲንሢኮ ጫሪንጮይዳ ዓኣ ዓዳሢ ዒዛ ሺኢቃዛንሢም ኮሺ ባኦዚ" ዲንጋንዳሢ ባሺና ዔራኔ። ¹² ሜሌ" ዓሳ ዲንሢም ማዳንዳጉዲ ዲንሢ ኮዓ ባኮ ዲንሢያ ዔያቶም ማዲዋቴ፤ ሙሴ ዋጎና የኦሲ ማሊዖ ኬኤዛ ዓሰናኮ ዔርዚያ ያዲ ጋዓኔ» ጌዔኔ።

ኩንዖና ዳልጎ ካር"ና

(ሉቃ. 13፥24)

13 ዬሱሴ ሃሣ ኬኤዛዎ፡- «ኩንዖ ካሬ"ሎና ጌሉዋቱ፤ ዓይጎሮ ጌዔቶ ባይሲንቶ ባንሢ ጌልዛ ካራ" ዳልጊ፤ ዔኪ ዓኣዳ ጎይፃኣ ዳልጊኬ። ዬኖ ባንሢ ጌላንዳ ዓሳ ሚርጌኬ። 14 ናንጊ ባንሢ ጌልዛ ካራ" ጋዓንቲ ኩንዔ፤ ጎይፃኣ ሜታሳያኬ፤ ዬያሮ ዬኖ ጎይፄሎና ጌላንዳ ዓሳ ዳካ"ኬ» ጌዔኔ።

ፆኦሲ ማሊያ ኬኤዛኔ ጌይ ሉኡቃ ዓሶ

(ሉቃ. 6፥43-44፤ 13፥25-27)

15 ዬሱሴ ሃሣ ኬኤዛዎ፡- «ጋሮና ሙዓ ያኣዮታዎ፤ ማራይ ጉጋሌ ማይንቲ ዒንሢ ባኣኮ" ጌሊ ዒንሢ ባይዛኒ ማላ ሉኡቂ ፆኦሲ ማሊያ ኬኤዛኔ» ጋዓዘንሢዳጋ ካፒንቲዋቱ። 16 ዒንሢ ዒያቶኮ ማድ" ዓኣፖይዳጋ ዒራንዳኔ፤ ጋውዲዳጋ ኩሩንቲሺ፤ ሐሣ ጋኣላንሢዳጋ ሻኣቢ ማንፂንታ? 17 ዬያጉዲ ኮሺ ሚሢ ቢያ ኮሺ ዓኣፒ፤ ፑርታ ሚሢ ሃሣ ፑርታ ዓኣፒ ዓኣፓኔ። 18 ኮሺ ሚሢ ፑርታ ዓኣፒ፤ ፑርታ ሚሢ ኮሺ ዓኣፒ ዓኣፓኒ ዳንዳዑዋሴ። 19 ኮሺ ዓኣፒ ዓኣፑዋ ሚሢ ቢያ ቲቂንቲ ታሚዳ ዓገንታንዳኔ። 20 ዬያሮ ሉኡቂ ፆኦሲ ማሊያ ኬኤዛኔ ጋዓ ዓሶኮ ማድ" ዓኣፖይዳጋ ዒንሢ ዒራንዳኔ።

21 «ጫሪንጫ ዓኣ ታ ዓደ ማሊያ ኩንሠታዎ ሰዳሢዮ፤ ጎዳሢዮ፤ ጋዓሢ ቢያ ጫሪንጫ ካኣቱዋይዳ ጌላዓኬ። 22 ዓጮ"ይዳ ፆኦሲ ዋጋ ኬሎ" ሚርጌሢ ሰዳሢዮ! ጎዳሢዮ! ኔ ሱንዖና ፆኦሲ ማሊሢ ኑ ኬኤዚባኣዓዳ? ኔ ሱንዖና ፑርታ ዓያና ዓሶይዳጋ ኑ ኬሲ"ባኣዓዳ? ኔ ሱንዖና ማዲንታ ሚርጌ ዓኪ ባኣዚ" ኑ ማዲባኣዓዳ? ጋዓንዳኔ። 23 ዬኖ ዋድ"ና <ፔቲ"ታዎ ታ ዒንሢ ዒሩዋሴ፤ ዒንሢ ፑርቶ ዓሳ ታ ኮይላ"ጋ ሺኢኩዋቲ!> ጌዒ ፔጌና ታ ዒያቶም ኬኤዛንዳኔ» ጌዔኔ።

ማኣሪ ማገፍ ላምዖ ዓሲኮ ኮኣኪንሢ

(ሉቃ. 6፥47-49)

24 ዬሱሴ ሃሣ ኬኤዛዎ፡- «ዓካሪ ሃያ ታኣኮ ቃኣሎ" ዋይዚ ማዳ ዓሢ ማኣሮ ዶዲ ቤሰካ ዶዲሺ ማገፍ ጪንጫ ዓሲ ማላኔ። 25 ዳኤፒ ዒርዚ ዋርቁም ዲጰ ኩሚ"፤ ዢባሬያ ዢባርሽኔ፤ ጋዓንቲ ዬይ ማኣራሢ ዶዲ ቤሲዳ ማገኘቲሢዳጋ ዶዲባኣሴ።

26 «ሐያ ታኣኮ ቃኣሎ" ዋይዚ ማዲዋኣሢ ጋዓንቴ ማእሮ ማእሻላይዳ ማዘፍ ቦኣዛ ዓሲ ማላኔ። 27 ዴኡፒ ዒርዚ ዋርቁም፥ ዲጳ ኩሚ" ዠባሬያ ዠባርሻዛ ዬና ማእሬላ ቤዞና ጋፒ ዶዔኔ» ጌዔኔ።

28 ዬሱሴ ዬያ ባኮ ኬኤዚ ጋፒሳዛ ዴራ" ዒዛኮ ዔርዚያና ዲቃቴ ሄርሼኔ። 29 ዓይጎሮ ጌዔቶ ዒዚ ዔያቶኮ ዎጎ ዔርዛ ዓሶጉዲቱዋንቴ ዴኤፒ ቢታንቶና ዔርዛሢርኬ።

8

ዑፃ ኬሰካ ዶርዓሢና ዓዲንቴ ዓሢኮ ፖዒዎ

(ማር. 1፥40-45፤ ሉቃ. 5፥12-16)

1 ዬሱሴ ዲካ"ፓ ኬዴ" ዎዶ"ና ሚርጌ ዴሬ ዒዛ ጊንዖ ሙኬኔ።
2 ዬኖና ፔቴ" ዑሰካ ኬሰካ ዶርዓ ዓርቄ ዓሲሰኬይ ዬሱሴ ኮይላ" ሙኪ ባሊቲና ሳዓ ሎኦማዮ፡- «ጎዳሢዮ! ኔ ኮዔቴ ታና ጌኤሻ"ኒ ዳንዳዓኔ!» ጌዔኔ።

3 ዬሱሴ ዒዛኮ ዑዖ ዓርቃዮ፡- «ጌኤሸኬ! ኔ ጌኤሸካንዳጉዲ ታ ኮዔኔ» ጋዓዛ ዬይ ዓሢ ቤዞና ዶርዓሢዳፓ ዳቂ ጌኤሸኬኔ።

4 ዬካፓ ዬሱሴ፥ ዬኖ ዶርዔሎይዳፓ ዳቂ ጌኤሸኬ ዓሢም፡- «ሃያ ባኮ ዖኦማኣ ኬኤዚፖ፤ ጋዓንቴ ሃሢ ዓኣዲጋፓ ኔኤኒ ጌኤሸኬሢ ቂኤሳሢም ዳቂ፤ ሃሢ ቢያሢም ማርካ ማዓንዳጉዲ ኔኤኮ ዶርዓሢዳፓ ፖዒዖ ዛሎ" ሙሴ ዓይሄ ዒንጎ ባኮ ዖኦሲም ዒንጌ» ጌዔኔ።

ፄኤቶ ፖኦሊሶ ዓይሣሢኮ ጉሙርቂዖ

(ሉቃ. 7፥1-10)

5 ዬካፓ ዬሱሴ ቂፒርናሆሜ ካታሞ ጌላዛ ፄኤታ ፖኦሊሴ ዓይሣ፥ ፔቴ" ሮሜ ዓፈሲ ዓሲሰኬይ ዒዛ ኮይላ" ሙካዮ፡- 6 «ጎዳሢዮ! ታኣኮ ማዲሢ ሐርጊንቴ ዋቢ፥ ሚርጌ ሜታዲ ጋራ ላሢ ዓኣኔ፤ ታና ማኣዴ» ጌዒ ሸኢቁኔ፤

7 ዬሱሴ ማሃዮ፡- «ታ ዒዛ ሙኪ ፓሣንዳኔ» ጌዔኔ።

8 ፖኦሊሶ ዓይሣሢ ጋዓንቴ፡- «ጎዳሢዮ! ታ ማኣሪ ኔ ጌላኒ ታ ጊኢጋ ዓሲቱዋሴ፤ ዬያሮ ሃካ ዓኣዖ ፔቴ" ባኣዚ" ጌዔ፤ ታኣኮ ማዲሢ ፖዓንዳኔ፤ 9 ታኣኒ ታ ቶኦኪና ዎይሣ ዓሲም ዓይሢንታያ ሐሣ ታ ዴማ፥ ታኣም ዓይሢንታ ፖኦሊሴ ዓኣኔ፤ ዔያቶይዳፓ ፔቴ"ሢ <ዴንዴ!» ታ ጋዓዛ ዴዴንዳኔ፤ ባጋሢ ሃሢ <ሃኒ ዬዔ!» ታ ጋዓዛ

ሙካኔ፤ ታኣሞ ማዳሢ ሃያ ታኣሞ ማዳ፤ ታ ጋዓዛ ዒ ማማዳኔ»
ጌዔኔ።

10 ዩሱስ ዬያ ዋይዜ ዋዶ"ና ዲቃቲ ሄርሻዖ ዒዛና ዋላ" ዓኣዳ ዓሶ ኮይላ"- «ጎኔ ታ ዒንሢሞ ጋዓኔ፤ ሃያጉዴ ዴኤፒ ጉሙርቂሢ ዓኣ ዓሲ ፔቲ"ታዖ፤ ዒሰራዔኤሌይዳኣ ማዖም ታ ዴንቁባኣሴ። 11 ዔሩዋቲ፤ ሚርጌ ዓሲ ዓባ" ኬሰካ ዛሎ"ና ጌላ ዛሎ"ናይዳፓ ሙኪ ዓብራሃሜና ዩሳኣቄና ሃሣ ያይቆኦቤና ዋላ" ጫሪንጮ ካኣቱሞይዳ ሙዓኒ ዴዓንዳኔ። 12 ጫሪንጮ ካኣቱሞም ገኢጊንቴያታዖ ዙሎ" ዱሞ ቤዛ ኬኤሪንታንዳይ ዓኣኔ። ዩካ ዬና ዓሳ ዩኤኪ ዓቺ ዳዓንዳኔ» ጌዔኔ። 13 ዩካፓ ዩሱስ ጸኡቶ ፖኦሊሶ ዓይሣሢሞ፡- «ዴንዴ፤ ኔ ጉሙርቂሢጉዲ ማዖንጎ» ጌዔኔ። ዬያ ዓሢኮ ማዳሢ ዬማ"ና ፖፖዔኔ።

ዩሱስ ሚርጌ ሃርጌ ዓሶ ፓሢሢ
(ማር. 1፡29-34፤ ሉቃ. 4፡38-41)

14 ዒማ"ና ዩሱስ ጲዒርሴ ማኣሪ ጌላዖ፤ ጲዒርሴኮ ባይሳ ቆዒንቲ ላሂ ዓኣንቲ ዴንቁ፤ 15 ዒዛኮ ኩጮ ዒ ካኣማዛ ቤዛና ቆሣ ዒዛኮ ሃይቁም ዔቁ ዒዛ ሾኦቹንሢ። 16 ዩካፓ ሳዓ ዓማዛ፤ ዓሳ ፑርታ ዓያና ዓርቁ ሚርጌ ሃርጌ ዓሲ ዩሱስ ኮይላ" ዔኪ ሙካዛ «ኬሰኬ» ጌይሢና ሌሊ ፑርቶ ዓያኖ ኬሴ"ም ሃርጊንቲ ዓሳ ቢያ ፖዔኔ። 17 ዬያይዲዖና ያኦሲ ማሊዖ ኬኤዛ ዒሲያሴ ዛሎ"ና፡- «ዒዚ ኦኡኮ ዶርዓሢ ዔኪ ኑጊዳፓ ዳኬኔ» ጌይንቲሢ ኩሜ"ኔ።

ዩሱስ ጊንሢ ሃንቲሢ ዔኪሳ ሜቶ
(ሉቃ. 9፡57-62)

18 ዩሱስ ሚርጌ ዓሲ ዒዛ ኮይላ" ቡኪ ዓኣሢ ዛጋዖ ዒዛኮ ጊንዖ ሃንታዞንሢ ባዞ"ኮ ሶ ሱኮ ፒንቃንዳጉዲ ዓይሢ። 19 ዒማ"ና ፔቲ" ሙሴ ዋጎ ዔርዛ ዓሲ ዒዛ ባንሢ ሙካዖ፡- «ዔርዛሢዮ! ኔ ዓኣዳ ቤዛ ቢያ ታ ኔኤና ዓኣዳንዳኔ» ጌዔኔ።

20 ዩሱስ ማሃዖ፡- «ዉኡካሢኮ ዋርቆ ዔቲ፤ ካፖኮ ሃሣ ማኣሪ ዓኣኔ። ዓሲ ናዓሢ ጋዓንቲ ላሂ ሃውሻንዳ ቤሲታዖ ባኣሴ» ጌዔኔ።

21 ዒዛኮ ጊንዖ ሃንታዞንሢዳፓ ፔቲ"ይ፡- «ጎዳሢዮ! ቤርታዲ ታ ዴንዲ ታ ዓዴ ሃይቁም ዱኡኪ ሙኮም» ጌዔኔ።

22 ዩሱስ ማሃዖ፡- «ኔኤኒ ታ ጊንዖ ሙኬ፤ ሃይቁ ዓሳ ሃይቁ ዓሶ ዱኡካንዳጉዲ ሃሼ"» ጌዔኔ።

8:11 ሉቃ. 13፡29። **8:12** ዒሲ. 49፡12፤ 59፡19፤ ሚል. 1፡11፤ ዓይኡ. 107፡3፤ ማቴ. 22፡13፤ 25፡30፤ ሉቃ. 13፡28። **8:17** ዒሲ. 53፡4።

ዩሱሴኮ ባዘ" ጉዳሂ ጎሪ"ዎ

(ማር. 4፡35-41፤ ሉቃ. 8፡22-25)

23 ዩዛፓ ዩሱሴ ዲዛኮ ጊንዖ ሃንታዞንሂና ዎላ" ዋኣዖና ፒንቆ ጎንጎ ቶጊ ዴንዴኔ፤ 24 ዩማና ዔርቲባኣ ዴኤፒ ባዘ" ጉዳ ዔቁ፥ ዋኣዖና ፒንቆ ጎንጊሎ ዋኣዖ ኩንሂ፥ ዔኤዲሳኒ ዑኪ ሜታሴኔ፤ ዩሱሴ ጋዓንቴ ዒማ"ና ጊንዒ ዓኣኔ። 25 ዲዛኮ ጊንዖ ሃንታ ናኣታ" ዒዛ ጴቻዖ፡- «ጎዳሂዮ! ኑ ኩዴኔ፥ ኑና ዓውሴ» ጌዔኔ።

26 ዩሱሴ ዒማ"ና፡- «ሓይ ዒንሂ ጉሙርቂዖ ፓጩ ዓሳ፥ ዓይጎር ዒንሂ ሃያይዲ ዒጊጩይ!» ጋዓዖ፥ ዔቂ ዠባርና ዴኤፖ ጉዳሂና ጎሪሞ ቤዘና ቢያ ባካ ዚቲዮ ጌዔኔ።

27 ዓሳ ጋዓንቴ ሚርጌና ዲቃቲ ሄርሻዖ፡- «ሃይ ዠባርንታ ባዘ"ንታ ቢያ ዓይሂንታሂ ዎዚጉዴ ዓሲዳይ?» ጌዔኔ።

ፑርታ ዓያና ዓርቂ ላምዖ ዓሶኮ ዳቂዖ

(ማር. 5፡1-20፤ ሉቃ. 8፡26-39)

28 ዩሱሴ ጌለላ ባዘ"ና ፒንቂ ጌርሴኖኔ ዓጮ" ሙካዛ ዒኣካ ፑርታ ዓያና ዓርቂ ላምዖ ዓሲ ዴኡፒ ካይዚዳፓ ኬሰኪ ዒዛና ካኣሜኔ፤ ዩንሂ ሚርጌና ፑርታ ዓሲ ማዔሂር ዓይጎ ዓሲያ ዬኖ ጎይዖና ዓኣዲኒ ዳንዳዑዎያኬ። 29 ዔያታ፡- «ዖኦሲ ናዓሂዮ! ኑኡና ዎላ" ኔኤኮ ዓይጌ ዓኣይ? ዎዳ" ሄሉ"ዋንቴ ኔ ኑና ሜታሳኒ ሙኪያ?» ጌዒ ጌዒ ዒላቴኔ።

30 ዔያታ ዓኣ ቤዛፓ ዳካ" ሃኬ ቤሲዳ ቆሎ ጉዳንሂ ዲቢ ሄንቃኔ። 31 ፑርቶ ዓያኖንሂ ዩሱሴ ኮራ፡- «ኔ ኑና ኬሳ"ያ ማዔቴ፥ ሃሴኬ ጉዳንዖይዳ ኑ ጌላንዳጉዲ ኑና ዓይሄ» ጌዒ ዒዛ ሺኢቄኔ።

32 ዩሱሴያ፡- «ዴንዳዎቴ!» ጋዓዛ፥ ፑርቶ ዓያኖንሂ ዓሶንሂዳፓ ኬሰኪ ጉዳንዖይዳ ጌለዛ፥ ጉዳንዖ ቢያ ዔያታ ሄንቃ ማጎ ዓጮይዳፓ ዲርጊ ባዘ"ይዳ ጌሊ ሙይንቴኔ። 33 ጉዳንዖ ሄንቃ ናኣታ" ጳሽኪ ካታሞ ዴንዳዖ፥ ማዔ ባኮ ቢያ ሃሃ ፑርቶ ዓያኖና ዓርቂንቴ ዓሶንሂዳኣ ማዲንቴ ባኮ ኬኤዚኔ። 34 ዩዛፓ ካታሞ ዓሳ ጉቤ ዩሱሴ ዛጋኒ ካታማፓ ሙኪ ዒዛ ዴንቃዖ ዔያቶኮ ዓጮ"ፓ ዒ ኬሰኪ ዓኣዳንዳጉዲ ዒዛ ሺኢቄኔ።

9

ዩሱሴ ዎቦ ዓሂ ፒሼሂ

(ማር. 2፡1-12፤ ሉቃ. 5፡17-26)

1 ዩካፓ ዩሱሴ ዋኦያና ፒንቆ ጎንጎ ቶጊ ባዞ" ጊዴና ፒንቂ ፔ ካታሞ ሙኬኔ። 2 ዲኢካ ዓሳ ፔቴ" ዋሶ ዓሲ ሃሎና ኬዲ ዔኪ ሙኬኔ። ዩሱሴ ዔያቶኮ ጉሙርቂያ ዛጋያ ዋሶ ዓሢሞ፡- «ታ ናዓሦ ማሊፖ! ጎማ ኔኤኮ ዓቶሞ ጌይንቴኔ» ጌዔኔ።

3 ዒማ"ና ሙሴ ዋጎ ዔርዛ ፔቴ" ፔቴ" ዓሳ፡- «ሃይያኦሲ ጫሺኬ» ጌዲ ፔ ዒሮና ማሌኔ።

4 ዩሱሴ ዔያቶኮ ማሊያ ዔሪጋፓ፡- «ዓይጎር ዒንሢ ሃያጉዴ ፑርታ ባኣዚ" ዒሮና ማላይ? 5 ጎማ ኔኤኮ ዓቶሞ ጌይንቴኔ» ጌይሢና ሳቂ ዴንዴ» ጌይሢና ደዳፓ ሂንዳ ዋና ሹሌዓይ? 6 ጋዓንቴ ዓሲኮ ናዓሢ ሳያይዳ ዓሲኮ ጎማ ዓቶሞ ጋዓኒ ቢታንቶ ዓኣሢ ዒንሢ ዔራንዳያ ኮይሳኔ» ጋዓያ፡ ዋሶ ዓሢሞ፡- «ዔቂ ሃላሢ ኔኤኮ ኬዲ ኔ ማኣሪ ዓኣዴ» ጌዔኔ። 7 ዩማ"ና ዋሶ ዓሢ ዔቂ ፔ ማኣሪ ዓኣዴ። 8 ዴራ" ዩያ ዛጋያ ዲቃቲ ሄርሺ፥ ዒጊጪሢና ዩያጉዴ ቢታንቶ ዓሲሞ ዒንጌ ያኣዛሢ ጋላቴኔ።

ማቴዎስ ኮ ዔኤሊ'ንቲያ

(ማር. 2፥13-17፤ ሉቃ. 5፥27-32)

9 ዩሱሴ ዴንዲቤቃ ማቴዎስ ጎያሰኬይ ኮርሞ ዓሶፓ ሚኢሾ ቡኩሳ ቤዛ ዴዒ ዓኣንቴ ዴንቂ፡- «ሃኒ ታ ጊንያ ሙኬ!» ጋዓዛ፥ ዓዚያ ዔቂ ዒዛ ጊንያ ዓኣዴኔ።

10 ዩካፓ ዩሱሴ ማቴዎስ ማኣርይዳ ሙዒኒ ዴዓዛ ሚኢሾ ቡኩሳ ዓሶንታ ጎሞ ዓሶንታ ሚርጌ ዓሲ ሙኪ ዒዛና ሓሣ ዒዛኮ ጊንጸ ሃንታዘንሢና ዋላ" ሙዒኒ ዴዔኔ። 11 ፔርሴ ዓሳ ዩያ ዛጋያ ዩሱሴኮ ጊንያ ሃንታዘንሢ ኮራ፡- «ዒንሢኮ ዔርዛሢ ሃያ ሚኢሾ ቡኩሳ ዓሶና ጎሞ ዓሶና ዋላ" ዴዒ ዋይቲ ሙዒይ?» ጌይ ያኣጩኔ።

12 ዩሱሴ ዔያታ ጌዔሢ ዋይዛያ፡- «ዴኤሻ ዔራ ዓሲ ኮይሳሢ ሃርጊንቴ ዓሲሞ ማዓንዳፓዓቲሞ ዋላ" ዓሲሞቲዋሴ፤ 13 ዴንዲ፡- «ዒንጎ ባኣዚ" ዒንጋያይዳፓ ባሺ ዓሲ ሚጪንታ ዓሲ ታ ናሽካኔ» ጋዓ ቃኣላ" ዋይዚ ጌይሢታቲያ ማሊ ጳቂሢ ዔራዋቲ፤ ጎሞ" ዓሶ ዔኤሊ"ኒ ማዓንዳፓዓቲሞ ዒሎ" ዓሶ ዔኤሊ"ኒ ታ ሙኪባኣሴ» ጌዔኔ።

ሙኤዚ" ሃሺ"ሢ ዴሞቤ ዛላ ያኣጪንቴ ያኣጪሢ

(ማር. 2፥18-22፤ ሉቃ. 5፥33-39)

14 ዒማና ማሰካ ዮሐኒሴኮ ጊንያ ሃንታ ናኣታ" ዩሱሴ ኮራ ሙካያ፡- «ኦኤና ፔርሴ ዓሶና ሙያ ሃሺ"ያ ዴሞቦ ካፓንቴ፥ ኔ ጊንያ ሃንታ ናኣታ" ዓይጎር ዩያይዲ ካፑዋይ?» ጌዲ ያኣጩኔ። 15 ዩሱሴ

ማሃየ፡- «ዑኡታሢ ዒያቶና ዋላ" ዓኣንቴ ዒፖ ዓሳ ዋይቲ ሙይ ዑሽኪ ዋዛዲዋየ ሃሻ"ንዳይ? ዑኡታሢ ዒያቶይዳፓ ዒውታንዳ ዋይ ሙካንዳኔ፤ ዬኖ ዋዶ"ና ዒያታ ሙያ ሃሺ"ያ ዳምቦ ካፓንዳኔ።»

16 «ዓኪ ዓፒላይዳፓ ዒኪ ጨሚ ዓፒላይዳ ዓጊ ሲካይ ባኣሴ፤ ያዲ ማዒቶ ዓኮ ዓጊፃ ጉርሚ ጨሞ ዓፒሎ ዳዳርዛንዳኔ፤ ዳርዒፃኣ ፔቶ ዳልጋንዳኔ። 17 ዬያጉዲ ሶልኪ ዑሺ ዋሆ ጨንቁ ያቲዳ ሺሜ ዋሂንቱዋሴ፤ ዋሂንቱቴ ጋዓንቴ ሺሜ ዑዛ ቡርቂ ያቶ ዲኡሴም ዑዛ ላኣለጎታንዳኔ፤ ያታኣ ጉሪ ዓታንዳኔ። ዬያር ሺሜ ዑሽም ዓኪ ጌኤሺ ያቲ ኮይሳኔ፤ ዬያይዴቴ ዑዛ ያቶይዳ ዒኤቢ ዋኦቱዋየ ዳዓኔ።»

ሓይቢፓ ዒቂ ናይሰኬኖና ላኣሎ ናይ ዶርዖ ሃርጌሰኬኖኮ ዳቂያ
(ማር. 5፡21-43፤ ሉቃ. 8፡40-56)

18 ዬሱሴ ዬያ ዓሶም ኬኤዚያይዳ ዓኣንቴ ፔቲ" ዓይሁዶ ዓሶኮ ቡኪንቶ ቤዘ ሱኡጌሰኬይ ሙኪ ባለቲና ዒዛ ቤርታ ሎኦማየ፡- «ታኣኮ ናይሰኬኖና ሃርጊ፡ ሃሢ ሃይቄኔ፤ ሃዳራ፡ ኔኤኒ ሙኪ ዒዘ ዑፃ ኩጮ ጌሢቶ ዒዛ ዳቃንዳኔ» ጌዒኔ። 19 ዬያር ዬሱሴ ዒቂ ዓሢ ጊንያ ዓኣዳዛ ዒዛ ጊንያ ሃንታዞንሢያ ዋላ" ዓኣዳኔ።

20 ዬካፓ ታጵ ላምዖ ሌዒ ጉቤ ላኣሎ ናይ ዶርዖና ሜታዳ ፔቲ" ላኣሊሰኬኖና ዬሱሴኮ ጊንያ ዛሎ"ና ሙኪ ዓፒሎኮ ዓጮ ካኣሜኔ፤

21 ዬያ ዒዛ ማዳሢ፡- «ዒዛኮ ዓፒሎታየ ኩጮና ታ ካኣሜቶ ዳቃንዳኔ» ጌዒ ፔ ዒኖና ማሌሢርኬ። 22 ዬሱሴ ዒማና ጊንሢም ሺሪ ላኣሊሎ ዛጋየ፡- «ታ ናዒሌ ማሊፖ፡ ኔ ጉሙርቂፃ ነና ዳቂሼኔ» ጋዓዛ፡ ላኣሊላ ቤዘማና ዳቄኔ።

23 ዬካፓ ዬሱሴ ዓይሁዶ ዓሶኮ ቡኪንቶ ቤዘ ሱኡጋሢ ማኣሪ ሄላ"የ ዲንካሢ ዋርቂ ሃሢ ጳሽኪ ዒላቲ ዒላቲ ዬኤካ ዓሶ ዛጊ፡

24 ዓሶ፡- «ሽኢኩዋቲ! ናዒላ ጊጊንዒያፓዓቲም ሃሃይቂባኣሴ!» ጋዓዛ፡ ዒያታ ዒዛ ቦሂ ሚኢጨኔ። 25 ዴራ" ኬሰኬሢኮ ጊንያ ዒዚ ጋር ጌላየ ናዒሎኮ ኩጮ ዓርቃዛ ዒዛ ዒቄኔ። 26 ዬይ ሃይሳ ዬኖ ዓጮ" ቢያይዳ ዋይዚንቴኔ።

ዬሱሴ ዓኣፒ ባይቄያና ዳንጋ ባይቄ ዓሲ ዳቂሼሢ

27 ዬሱሴ ዬኖ ቤዘፓ ዴንዳንቴ ላምዖ ዓኣፒ ባይቄ ዓሲሰኬንሢ፡- «ዳውቲ ናዒሢየ! ሃዳራ ኡና ማኣዳ» ጌዒ ጌዒ ዒላቲኔ። 28 ዬካፓ ዬሱሴ ኬኤያ ጌላዛ ዓኣፖ ባይቄዞንሢ ዒዛ ጊንያ ሙኬም፡ ዬሱሴ ዒያቶ ኮራ፡- «ዒንሢኮ ዓኣፖ ታ ቡላ"ንዳሢ ዒንሢ ጉሙርቃ?» ጌዒ ያኣጨኔ።

ዔያታ ማሃዎ፡- «ሂዮ፡ ጎዳሂዮ» ጌዔኔ።

29 ዬሳይያስ ዬሱስ ዔያቶኮ ዓኣፖ ኩቻ ካአማዎ፡- «ዒንሂ ጉሙርቁሂጉዲ ዒንሂሞ ማዎንጎ» ጌዔኔ። 30 ዓኣፖ ዔያቶኮ ቡሊንጉዛ ዬሱስ ዔያቶም፡- «ሃያ ያአማኣ ዒንሂ ኬኤዙዋጉዲ!» ጌዒ ዶዲሺ ላቴኔ። 31 ዔያታ ጋዓንቴ ኬሰካዎ ዒኢካ ጉርዶ ቢያይዳ ዬሱስ ዛሎ" ኬኤዜኔ።

32 ዓኣፖ ባይቄ ዓሶንሂ ኬሰኪ ዓኣዳዛ ሜሌ" ዓሲ ፑርታ ዓያና ዓርቄም፡ ዳንጋ ባይቄሰኬያ ዬሱስ ኮይላ" ዔኪ ሙኬኔ። 33 ፑርቶ ዓያኖ ዬሱስ ኬሰኪካፓ ዳንጎ ባይቄ ዓሂ ጌሰቲሂ ዓርቄኔ፤ ዬያሮ ዴራ" ዲቃቲ ሄርሻዎ፡- «ሃያጉዴ ባኣዚ" ዒሰራዔኤሌ ዓጮ"ይዳ ኑ ዛጊ ቤቄባኣሴ» ጌዔኔ። 34 ፔርሴ ዓሳ ጋዓንቴ፡- «ዒዚ ፑርቶ ዓያኖ ዓሶፓ ኬሳ"ሂ ፑርቶ ዓያኖ ሱኡጋሂ ዋልቆናኬ» ጌዔኔ።

ዬሱስ ዴሮ" ሚጨንቴሂ

35 ዬሱስ ዓይሁዶ ዓሶኮ ቡኪንቶ ቤዘይዳ ዔርዚ ዔርዚ፡ ያኦሲ ካኣቱሞ ዛሎ" ኮዢ ሃይሶዋ ኬኤዚ ኬኤዚ ዬያጉዲ ሃሃ ዶርዓሂያ ቢያ ፖዒሲ ፖዒሲ ካታሞና ጉርዶናይዳ ሃንቴኔ። 36 ዒማና ዴራ" ሄንቃ ዓሲባኣ ማራይጉዲ ሚታዲያ ሃሃ ማኣዳ"ያ ዔያቶ ባኣያ ሚዔሂ ዛጊ ዋዶ"ና ዒ ዔያቶ ሚጨንቴኔ። 37 ዬያሮ ዬሱስ ዒዛኮ ጊንዩ ሃንታዘንሂ ኮራ፡- «ቡኩሶንዶ ሃኣካ ሚርጌኬ፤ ሃኣኮ ቡኩሳዘንሂ ጋዓንቴ ዳካ"ታሂሮ፤ 38 ሃኣኮ ቡኩሳ ዓሶይዳ ቃሲ" ዓሲ ዳካንዳጉዲ ሃኣኮ ዓዶ ሺኢቁዋቴ» ጌዔኔ።

10

ታጳ ላምዎ ዬሱስ ጊንዩ ሃንታዘንሂኮ ማዶ"ሮ ዳኪንቲዎ (ማር. 3፡13-19፤ 6፡7-13፤ ሉቃ. 6፡12-16፤ 9፡1-6)

1 ዬሱስ ታጳ ላምዎ ዒዛ ጊንዩ ሃንታዘንሂ ፔ ባንሂ ዔኤላ"ዎ ፑርቶ ዓያኖ ኬሳ"ንዳጉዲ ሃሃ ዶርዎ ቢያ ፖዒሳንዳጉዲ ቢታንቶ ዔያቶም ዒንጌኔ። 2 ታጳ ላምዎ ዒዛ ጊንዩ ሃንታዘንሂኮ ሱንዳ፡ ቤርታ ሲሞኦኔ ጌይንታ ጲዒርሴንታ ዒዛኮ ጌርሲ ዒንዲራሴ፤ ዜብዲዮሴ ናኣቶ"ንሂ፡ ያይቆኦቤ፤ ዮሐኒሴ፤ 3 ፒልጶሴ፤ ቤርቴሌሞሴ፤ ቶኦማኣሴ፤ ሚኢሾ ቡኩሳ ማቴዎሴ፤ ዒልፒዮሴ

9:34 ማቴ. 10፡25፤ 12፡34፤ ማር. 3፡22፤ ሉቃ. 11፡15። 9:35 ማቴ. 4፡23፤ ማር. 1፡39፤ ሉቃ. 4፡44። 9:36 ፓይ. ማፃ 27፡17፤ 1ካኣቶ". ማ 22፡17፤ 2ዎሲ. ዓሃኬ 18፡16፤ ሂዚ. 34፡5፤ ዛካ. 10፡2፤ ማር. 6፡34። 9:38 ሉቃ. 10፡2።

ናዓዚ" ያይቆኑቤ፥ ታዲዮሴ፤ 4 ፔ ዓጮ" ናሽካ ሲሞኑኔንታ ዬሱሴ ዓዓሢ ዒንጌ፥ ዓሰቆሮንቶ ዓጮ" ዓሢ ደሁዳንታኬ።

5 ዬሱሴ ዬንሢ ታጾ ላምዖ ዒዛኮ ጊንፆ ሃንታዘንሢም፡- «ዓይሁዴ ማዒባኣ ዓሶ ባንሢ ዴንዲፖቴ፤ ሃሣ ሳማሪያ ካታሞዋ ጌሊፖቴ፤ 6 ጋዓንቴ ማራቶጉዲ ዣኣሌ፥ ዒሰራዔኤሌ ዓሶ ባንሢ ዓኣዲዋቴ። 7 ዴንዲጋፓ «ጫሪንጮ ካኣቱማ ዑኬኔ» ጌዒ ጌዒ ኬኤዙዋቴ። 8 ዶርዓሢና ዓኣ ዓሶ ፖዒሱዋቴ፤ ሃይቄ ዓሶዋ ሃይባ፡፡ፓ ዔቂሱዋቴ፤ ዑፃ ኬሰካ ዶርዓሢና ዓኣ ዓሶ ዳቂሹዋቴ፤ ፑርቶ ዓያኖዋ ዓሶይዳፓ ኬሱ፡፡ዋቴ፤ ዒንሢ ጉሪ ዔኬ ባኮ ዬያ ዓሶም ጉሪ ዒንጉዋቴ። 9 ዋርቄታቴያ ቢራ ሃሣ ሞኦኖ ዓንጎዋ ቡራሻይዳ ዓጊ ዔኪፖቴ፤ 10 ጋላ ዓርቆ ሉካንታ ቃሲ" ማይንቶ ዓፒላንታ ቃሲ" ዓኣሦ ዶርሲ ሃሣ ኮኦሎ"ዋ ጎይፆር ዔኪፖቴ፤ ዓይጎር ጌዔቶ ማዳ ዓሲም ኮይሳ ሙኡዚ" ዒንጊንታኬ።»

11 «ዒንሢ ጌላ ካታሞ ማዔቶዋ ጉርዶይዳ ዒንሢ ሸኦቹንሢ ዋይሣኒ ጋዓ ዓሲ ዓኣቶ ዛጉዋቴ፤ ጴዴቶ ዬኖ ቤዙ ሃሺ" ዒንሢ ኬሰካንዳያ ሄላ"ንዳኣና ዒማካ ዴዑዋቴ። 12 ዓሲ ማኣሪ ዒንሢ ጌላ ዋዶ"ና «ዓሲ ሙኬኔ፤ ኮሹሞ ሃኖ ማኣሮም ማምዎ ጎዑዋቴ። 13 ማኣሮ ዓዴ «ኮሺዋይ» ጌዒ ዒንሢ ዔኬቴ፡- «ፆኦሲ ኮሹሞ ዒንሢም ማምንጎ» ጎዑዋቴ፤ ዔኪባኣያ ማዔቶ ጋዓንቴ ዓቶንጎ። 14 ዒንሢ ሸኦቹንሢ ዔኪባኣቶ፥ ዒንሢ ጌዔ ባኮዋ ዋይዚባኣቶ ዬኖ ማኣሬሎና ካታሜሎናይዳፓ ኬሰካዖ ቶኮ ሲላሎ ፒዪ" ዓኣዲዋቴ። 15 ጎኔ ታ ዒንሢም ጋዓኔ፡- ዓጮ"ይዳ ፆኦሲ ዋጋ ኬሎ"ና ዬኖ ካታሜሎም ሶዶሜና ጋሞራናም ዒንጊንቴ ሜታሢዳፓ ባሼ ሜታ ሄላ"ንዳኔ» ጌዒ ዓይሢ ዳኬኔ።

ጎዳ ሙኮኮ ቤርታ ዔቃንዳ ዒዲ ዳኪንቲፆና ሜታሢና
(ማር. 13፡9-13፤ ሉቃ. 21፡12-17)

16 ዬካፓ ዬሱሴ፡- «ዓካሪ ታ ዒንሢ ማራይጉዲ ያኣያሢ ባኣካ" ዳካንዳሢ ሸኦሺጉዲ ጨንጮ፥ ዶኦሌ"ጉዲ ሼሌዔ ማዑዋቴ። 17 ዓሳ ዒንሢ ዋጌም ዓኣሢ ዒንጋንዳኔ፤ ዓይሁዶ ዓሶኮ ቡኪንቶ ቤዛ ዒንሢ ጳርቆንዶኔ፤ ዬያር ኮሺ" ዒንሢና ዔሩዋቴ። 18 ታ ዛሎ" ማርካዳኒ ዋይሣ ዓሶና ካኣቶ"ና ቤርቶ ፑርታ ዋጌም ዒንሢ ሸኦካንዳኔ፤ ዔያቶና ዓይሁዴ ማዒባኣ ዓሶና ቤርታ ማርካ ዒንሢ ታኣኮ ማዓንዳኔ፤ 19 ዓሳ ዒንሢ ዋጌም ሸኦሸኣና ዒንሢ ኬኤዛንዳ

10:7 ሉቃ. 10፡4-12። 10:10 1ቆሮ. 9፡14፤ 1ዲሞ. 5፡18። 10:14 ዳኪ. ማዶ" 13፡51። 10:15 ማቴ. 11፡24፤ ማገሩ. ማፃ 19፡24-28። 10:16 ሉቃ. 10፡3። 10:17 ማር. 13፡9-11፤ ሉቃ. 12፡11-12፤ 21፡12-15።

ባካ ይማ ወደ"ና ዲንሢም ከኤዚንታንዳሢር ሳይጎሳ ሃሣ ወዚ ጌራ ኑ ከኤዛንዳይ?። ጌራ ማሊ ሜታዲፖቴ። 20 ዓይጎር ጌዔቶ ዲንሢ ዛሎ"ና ከኤዛንዳሢ ዲንሢኮ ጫሪንጮ ዓዳሢ ዓያኖኬ፤ ዲንሢቱዋሴ።

21 «ዓሲ ፔ ዓዶ ናዖ ሃይቃንዳጉዲ ዓሳሢ ዲንጋንዳኔ፤ ይያጉዲ ዓዴያ ፔኤኮ ናዓ ሃይቃንዳጉዲ ዓሳሢ ዲንጋንዳኔ፤ ናኣታ" ሾዔ ዓሶ ዑፃ ሞርኬ ማዒ ዔቂ ወዲሻንዳኔ። 22 ዲንሢ ታ ዛሎ"ሮ ዓሲ ቢያና ዒዲንቴያ ማዓንዳኔ፤ ጋዓንቴ ዴንዲ ጋፒንፆ ሄላ"ንዳኣና ዶዴሢ ዲቃንዳኔ። 23 ፔቴ" ቤዘይዳፓ ዲንሢ ዒዲ ዳውሶዋና ሜሌ" ቤሲ ዓሳዲዋቴ፤ ጎኔ ታ ጋዓኔ፤ ዓሲኮ ናዓሢ ማዒ ሙካንዳያ ሄላ"ንዳኣና ዒሲራዔኤሌ ካታሞሞ ዲንሢ ከኤዚ ጋፒሳዓኬ።

24 «ዔርዘሢ ዔርዘሢዳፓ ባሹቱዋሴ፤ ማዳሢያ ማዲሻሢዳፓ ባሹቱዋሴ። 25 ይያሮ ዔርዘሢ ዔርዘሢጉዲ፤ ማዳሢ ማዲሻሢጉዲ ማዔቴ ገዳንዳኔ። ማኣሮ ዓዶም ርፑርቶ ዓያኖ ሱኡጋሢ* ጌራ ሱንሢ ዔያታ ጌሢቶ ማኣሮ ዓሶም ይያፓ ዑሣ ፑርታ ሱንሢ ጌሣዓዳ?» ጌዔኔ።

ዖና ዲጊጫንዳያ ኮይሳቴያ ከኤዚንቴሢ

(ሉቃ. 12፡2-7)

26 ሃሣ ይሱሴ፦ «ዓካሪ ዓሲ ዲጊጫፖቴ፤ ዓይጎር ጌዔቶ ዓኣሻና ባኣዚ" ፔጋዲዋዖ፤ ዓኣሺንቴ ባኣዚ" ዔርቱዋዖ ዓታዓኬ። 27 ይያሮ ዲማ" ዲንሢም ታ ከኤዛሢ ፖዖዶ ከኤዙዋቴ፤ ካሽካሺ ዲንሢም ከኤዚንቴሢ ዴጌ ቤሰካ ዔቂ ፔጌና ከኤዙዋቴ። 28 ዓሽኮ ወዲ፤ ጌዴና ሼምፖ ወዲኒ ዳንዳዑዋ ዓሶ ዲጊጫፖቴ፤ ይያይዳፓ ሼምፓሢንታ ዓሽኮንታ ባይቁዋ ታሞይዳ ጌልዚ ባይዛኒ ዳንዳዓ ያኦሲ ዲጊጫዋቴ። 29 ላምዖ ሱኡታ ባካናም ሻንቹንታኔ፤ ያዲ ማዔቶዋ ዲንሢኮ ጫሪንጮ ዓዳሢ ጌዒባኣንቴ ፔቴ" ሱኡቶ"ማታዖ ጉሪ ዓቱዋሴ። 30 ዲንሢኮ ጋዓንቴ ቶኦኮ" ጋማኣ ፓይዲንቴያታሢር፤ 31 ዲንሢ ዲጊጫፖቴ፤ ዓይጎር ጌዔቶ ሚርጌ ሱኡታይዳፓ ዲንሢ ባሽኬ» ጌዔኔ።

ኪሪሰቶሴ ዛሎ" ማርካዳንዳያ ኮይሳሢ

(ሉቃ. 12፡8-9፤ 12፡51-53፤ 14፡26-27፤ ማር. 9፡41)

10:21 ማር. 13፡12፤ ሉቃ. 21፡16። 10:22 ማቴ. 24፡9፤ 13፤ ማር. 13፡13፤ ሉቃ. 21፡17። 10:24 ሉቃ. 6፡40፤ ዮሐ. 13፡16፤ 15፡20። * 10:25 ፑርቶ ዓያኖ ሱኡጋሢ፦ ጌይፃ ጊሪኬ ሙኡቹና ቢዔልዛቡሌ ጌይንታኔ። 10:25 ማቴ. 9፡34፤ 12፡24፤ ማር. 3፡2፤ ሉቃ. 11፡15። 10:26 ማር. 4፡22፤ ሉቃ. 8፡17።

32 ዩሱሴ ሃሣ፡- «ዓሲ ቤርቲዳ ታ ዛሎ" ማርካዳሢም ቢያ ታኣኒ ጩሪንጮይዳ ዓኣ ታ ዓዶ ቤርታ ዒዛ ዛሎ" ማርካዳንዳኔ። 33 ዓሲ ቤርቲዳ ታ ዒዛ ዒሩዋሴ» ጋዓሢ ታኣኒያ ጩሪንጮይዳ ታ ዓዶ ቤርታ ዒዛ «ዒሩዋሴ» ጋዓንዳኔ።

34 «ታ ሃያ ዓጮ" ያልዚ ዒኪ ሙካንዳኣፓዓቲም ኮሹሞ ዒኪ ሙኬያ ዒንሢም ማሎፖ። 35 ታኣኒ ሙኬሢሢ ዓቲንቆ ናዓሢ ዓዶ፥ ዉደሮ ናዓላ ዒንዶ፥ ናኣዚ" ማቻ ዓሆ ዒፃንዳጉዲኬ። 36 ዬያሮ ማኣሮ ዓሳ ዋሊኮ ሞርኬ ማዓንዳኔ።

37 «ታጊዳፓ ባሺ ፔኤኮ ዓዶ፥ ዒንዶ ናሽካ ዓሲ ታኣም ማዓዓኬ፤ ታጊዳፓ ባሺ ፔኤኮ ዓቲንቆ ናዖ ሃሣ ዉደሮ ናዖ ናሽካሢ ታኣም ማዓዓኬ። 38 ታጋቲ ሃይቃኒ ማሊ ታ ጊንዖ ሃንቱዋ ዓሲ ታኣም ማዓኒ ዳንዳዑዋሴ። 39 ፔ ናንጎ ዓይሳኒ ኮዓ ዓሲ ቢያ ፔኤኮ ናንጎ ባባይዛንዳኔ፤ ታ ዛሎ"ሮ ጌዒ ፔ ናንጎ ባይዛሢ ጋዓንቲ ቢያ ፔኤኮ ናንጎ ዓዓይሳንዳኔ።

40 «ዒንሢ ሸኣቺንሢ ዒካሢ ታና ዒካኔ፤ ታና ዒካሢያ ታና ዳኬ ታ ዓዶ ዒካኔ፤ 41 ያኦሲ ማሊያ ኬኤዛሢ፡ ዬያ ሱንዖና ሸኣቺንሢ ዒካሢ ዬያም ዒንጎ ባኮ ዴንቃንዳኔ። ዒላ"ሢ፡ ዒላ"ሞ ሱንዖና ሸኣቺንሢ ዒካሢ ዒላ"ሢሢም ዒንጎ ባኮ ዒካንዳኔ። 42 ጎኔ ታ ዒንሢም ጋዓኔ፤ ታኣኮ ጊንዖ ሃንታያ ማዓ፥ ሃንሢ ዳኮ"ንሢዳፓ ፔቲ"ማ ዋኣሢ ሺሜ ዑሻ"ሢ ዒኤቢ ዴንቁዋዖ ዓታዓኬ» ጌዒኔ።

11

ማሰካ ዮሐንሴ ዩሱሴ ኮራ ዳኬ ኪኢቶ" ዓሶ
(ሉቃ. 7፥18-35)

1 ዩሱሴ ዬያ ባኮ ታጽ ላምዖ ዒዛኮ ጊንዖ ሃንታዞንሢም ኬኤዛሢ ጊንፃ ዬኖ ቤዞ ሃሺ" ኮይሎ"ይዳ ዓኣ ካታሞንሢዳ ቃኣሎ" ኬኤዛኒና ዒርዛኒ ዴንዴኔ።

2 ማሰካ ዮሐንሴ ቱኡዞ ማኣራ ቱኡቲ ዓኣዖ ኪሪሰቶሴ ማዳ ባኮ ዋይዜኔ፤ ዬያሮ ዒዛኮ ጊንዖ ሃንታዞንሢዳፓ ዩሱሴ ኮራ፡-

3 «ሙካንዳኔ ጌይንታ ሜሲሔ ኔናሞ ሜሌ" ኑ ካፖንዶይ?» ጌዒ ዖኦጩንዳጉዲ ዳኬኔ።

4 ዩሱሴ ዒያቶም፡- «ዴንዲጋፓ ዒንሢ ዛጌ ባኮና ዋይዜ ባኮና ቢያ ዮሐንሴም፡- 5 ዓኣፓ ባይቄ ዓሳ ዛጋኔ፥ ሃንቶ ባሺንታ ዋሶ

10:33 2፻ሞ. 2፥12። 10:36 ሚኪ. 7፥6። 10:38 ማቴ. 16፥24፤ ማር. 8፥34፤ ሉቃ. 9፥23። 10:39 ማቴ. 16፥25፤ ማር. 8፥35፤ ሉቃ. 9፥24፤ 17፥33፤ ዮሐ. 12፥25። 10:40 ማር. 9፥37፤ ሉቃ. 9፥48፤ 10፥16፤ ዮሐ. 13፥20።

ዓሳ ሃንታኔ፥ ዑፃ ኬሰካ ደርዓሢ ዓሳ ዓሳ ፖዓኔ፥ ዋዮ ባይቄ ዓሳ ዋይዛኔ፥ ሃይቄ ዓሳ ሃይባ"ፓ ዔቃኔ፥ ማንቆ ዓሳማኦ ኮዡ ሃይሳ ኬኤዚንታኔ፤ ⁶ ታና <ዒዛ ናንጋዓ> ጌዒ ዳቢንቱዋኦሢ ጋላቲንቴያኬ ጌዒ ኬኤዙዋቱ» ጌዔኔ።

⁷ ዮሐንስ ኮራፓ ሙኬ ኪኢቶ" ዓሳንሢ ማዒ ዴንዳዛ ዩሱሴ ዮሐንስ ዛሎ" ዴሮ"ሞ፡- «ዒንሢ ሃሢ ዓይጎ ዛጋኒ ዓሴ ናንጉዋ ዳውሎ" ሙኬይ? ዢባራ ዓገሢ ፒሎ" ዛጋኒዳ? ⁸ ሜሌ" ዒንሢ ዓይጎ ዛጋኒ ሙኬይ? ሚዛጶ ቦኦሬ ዓፒሎ ማይንቴ ዓሶ ዛጋኒዳ? ሚዛጶ ቦኦሬ ዓፒሎ ማኦዔ ዓሳ ካኦቶ" ማኦራ ዓኣኔ። ⁹ ሂዳዮ ዒንሢ ዓይጎሮ ሙኬይ? ያኦሲ ማሊያ ኬኤዛ ዓሴ ዛጋኒዳ? ሂዮ! ዩያ ያኦሲ ማሊያ ኬኤዛሢዳፓ ባሾሢ ዛጋኒኬ። ¹⁰ ዒዚ <ኤኤኮ ቤርታ ቤርታ ዓኣዲ ጎይያ ኤኤኮ ገኢጊሻንዳ ታኦኮ ኪኢቶ" ናዓሢ ኤኤኮ ቤርታ ታ ዳካንዳኔ> ጌይንቴ ፃኣፒንቴሢ። ¹¹ ጎኔ ታ ዒንሢሞ ጋዓኔ፤ ዓጮ"ይዳ ሾይንቴ ዓሶይዳ ቢያ ማሰካ ዮሐንሴይዳፓ ባሾ ባኣሴ። ጋዓንቴ ያኦሲ ካኦቱሞይዳ ቢያይዳፓ ሂርኬ ማዔሢ ዒዛይዳፓ ባሻንዳኔ። ¹² ማሰካ ዮሐንሴ ዋዶ"ይዳፓ ሃኖ" ሄላ"ንዳኣና ያኦሲ ካኦቱማ ዋልቄና ዳልጊ ዳልጊ ዓኣኔ፤ ዓካሪ ሚርጌና ዒዞሮ ሜታዳዞንሢ ዒዞ ዴንቃንዳኔ» ጌዒ ኬኤዚሢ ሳርቄኔ።

¹³ ሓሣ ዩሱሴ፡- «ያኦሲ ማሊያ ኬኤዛ ዓሶና ሙሴ ዋጎና ሙኪ ማሰካ ዮሐንሴ ሄላ"ንዳኣና ያኦሲ ካኦቱሞ ዛሎ" ኬኤዚ ኬኤዚ ዴዔኔ። ¹⁴ ዓካሪ ዔያታ ኬኤዜ ባኮ ዒንሢ ዋይዛኒ ኮዔያታቶ ዩይ ሙካንዳኔ ጌይንቴ ዔኤሊያሴ፥ ሃይሾ ሃያ ዮሐንሴኬ። ¹⁵ ዋይዛ ዋይዚ ዓኣሢ ዋይዘንጎ!» ጌዔኔ።

¹⁶ ሃሣ ቃሳ"ዮ፡- «ሃያ ዋዶ" ዓሳ ዓይጎ ማላኔ ታ ጋዓንዳይ? ዘኣዛ ቡኪንቴ ዴዒ ናኦታ" ፔኤኮ ላጎ ዔኤሊ" ዔኤሊ"፤ ¹⁷ <ዋዛጎ ኮሢ ዒንሢሞ ኦ ኮርጌኔ፤ ዒንሢ ጋዓንቴ ሶኦሪባኣሴ፤ ሃሣ ቃዮ ዒንሢሞ ኦ ቃዩማኦ ዒንሢ ዩኤኪባኣሴ> ጋዓሢ ማላኔ። ¹⁸ ማሰካ ዮሐንሴ ሙኡዚ" ሙዑዋዮ ሃሣ ዑሽኩዋዮ ሙካዛ <ሃያይዳ ፑርታ ዓያና ዓኣኔ!> ዔያታ ጌዔኔ፤ ¹⁹ ዓሲኮ ናዓሢ ሓሣ ሙዒ ዑሽኪ ዑሽኪ ሙካዛ፥ <ሓሣ ሃይ ሙኡዚ"ና ዑሽና ናሽካያኬ፤ ሚኢሾ ቡኩሳ ዓሶና ጎሞ ዓሶናኮ ላጌኬ!> ዔያታ ጌዔኔ። ያዲ ማዔቴያ ዔራቶኮ ጎኦማ ፔ ማዶ"ና ፔጋዲ ዔርታንዳኔ» ጌዔኔ።

11:5 ዒሴ. 35፥5-6፤ 61፥1።

11:10 ሚሊ. 3፥1።

11:13 ሉቃ. 16፥16።

11:14 ሚሊ. 4፥5፤ ማቴ. 17፥10-13፤ ማር. 9፥11-13።

**ጉሙርቁዎ ዓቲያና ቦሂንቴ ካታሞንሢ
(ሉቃ. 10፥13-15)**

20 ዬሳይ ሃሣ ዬሱሴ ሃንሳ ካታሞይዳፓ ባሼና ሚርጌ ያኦሲ ዋልቄና ማዲንታ ዓኪ ባኣዚ" ማዲንቴ ካታሞንሢ' ጎሞ ፔኤሲ" ቡኡዲባኣሢ፡ 21 «ኮራዚኔ ኔና ባዴዔ! ሃሣ ቤቴሳይዳ ኔና ባዴዔ! ዒንሢዳ ማዲንቴ ያኦሲ ዋልቄና ማዲንታ ዓኮ ባካ ዒርሴና ሲዶና ካታሞናይዳ ማዲንቴቴ ሄኤዶ ዔያታ ሲዬ ፓቲሌ ቱኪ" ቶኦካ" ቢዲንሢ ዋሂንቴ ጎሞ ፔኤኮ ቡኡዲና ናንዳንቴኬ። 22 ዬያሮ ዓጮ"ይዳ ያኦሲ ዋጋ ኬሎ"ና ዒንሢዳፓ ዒርሴና ሲዶናናም ሄላ"ንዳ ሜታሢ ሼሌዔ ማዓንዳኔ። 23 ሐና ኔ ቁፒርናሆም! ጫሪንቺ ሄላ"ኒ ኔ ኮይባይ? ጋዓንቴ ያኦሲ ኔና ጋኣናሜ ታሞ"ይዳ ጌልዛንዳኔ፤ ኔጊዳ ማዲንቴ ያኦሲ ዋልቄና ማዲንታ ዓኮ ባካ ዋንዴ ሶዶሜይዳ ማዲንቴያታቴ ዬና ካታሜላ ሃሮ" ሄላ"ንዳኣና ዓኣያ ናንዳንዳቴኬ። 24 ዬያሮ ጎኔ ታ ኔኤም ጋዓኔ፤ ጋፒንያ ዋጎ ኬሎ"ና ኔጊዳፓ ሶዶሜ ካታሞም ዒንጊንታንዳ ሜታሢ ሼሌዓንዳኔ» ጌዒ ቦሂሢ ዓርቄኔ።

**ኪሪሰቶሴ ዒንጋ ሃውሺሢ
(ሉቃ. 10፥21-22)**

25 ዒማና ዬሱሴ፡- «ጫሪንጮና ሳያናኮ ጎዳ ማዔ፥ ታ ዓዳሢዮ! ሃያ ባኮ ዔር" ዓሶይዳፓ ዓኣቺ ዔኤቢ ዔሩዋ ዓሶም ኔ ፔጋሲ ዔርዜሢ፤ ታ ኔና ጋላታኔ፤ 26 ሂዮ! ታ ዓዳሢዮ! ኔ ዬያይዳኒ ኔ ማሊያጉዴያ ማዔኔ። 27 ታ ዓዴ ቢያ ባኮ ታኣም ዒንጌኔ፤ ዓዶይዳፓ ዓታዛ ናዓሢ ዔራይ ያኦኒያ ባኣሴ። ዬያጉዲ ሃሣ ናዓሢዳፓ ዓታዛ ዓዶ ዔራያ ባኣሴ፤ ናዓ ዔርዛኒ ኮዒባኣያታቶ ያኦኒያ ዓዶ ዔራኒ ዳንዳዑዋሴ» ጌዔኔ።

28 ሃሣ ዬሱሴ፡- «ዒንሢ ኬዳ" ዴኤዴም ላቢንቴዘንሢ ቢያ ሃኒ ታ ባንሢ ሙኩዋቴ! ታ ዒንሢ ሃውሺሳንዳኔ። 29 ታ ቃንባሮ ኬዱዋቴ፥ ታ ማዳ ባኮ ታጊዳፓ ዛጊ ማዱዋቴ፤ ታኣኒ ሼሌዔ ሃሣ ሚጨጎታያኬ፤ ዒንሢ ሃውሽ ዴንቃንዳኔ። 30 ታ ቃንባራ ባቃሮ" ዔኩዋያ፤ ኬዳ"ኣ ሃሣ ታኣኮ ሼሌዔኬ» ጌዔኔ።

11:21 ዒ.ሲ. 23፥1-18፤ ሂዚ. 26፥1-21፤ 26፤ ዓ.ዪ. 3፥4-8፤ ዓሞ. 1፥9-10፤ ዛካ. 9፥2-4። **11:23** ዒ.ሲ. 14፥13-15፤ ማኸ. ማዓ 19፥24-28። **11:24** ማቴ. 10፥15፤ ሉቃ. 10፥12። **11:27** ዮሐ. 3፥35፤ 1፥18፤ 10፥5። **11:29** ዔር. 6፥16።

12

ዓይሁዶ ዓሶኮ ሃውሾ ኬሎ" ዘሎ" ያኑጪንቴ ያኑጪሢ

(ማር. 2፥23-28፤ ሉቃ. 6፥1-5)

¹ ዬሱስ ጊንፃፓ ዬሱሴ ዓይሁዶ ዓሶኮ ሃውሾ ኬሎ"ና ፔቴ" ዛርጎ ጎሽ ጊዴና ዓኣዳንቴ ዒዛኮ ጊንፃ ሃንታዞንሢ ናይዳንቴሢር ዛርጎ ቲሻሢ ዱኡዚ ዱኡዚ ዔኪ ዳዒሢ ዓርቄኔ። ² ፔርሴ ዓሳ ዬያ ዛጋዖ ዬሱሴ ኮራ፡- «ሃኣዛጌ፤ ኔኤኮ ጊንፃ ሃንታዞንሢ ሃውሾ ኬሎ"ና ዓይሢንቴባኣ ባኣዚ" ማዳኔ!» ጌዔኔ።

³ ዬሱሴ ማሃዖ፡- «ዳውቴና ዒዛና ዋላ" ዓኣ ዓሳ ናይዳንቴ ዋዶ"ና ዳውቴ ማዳ ባኮ ፔቴ"ታዖ ዒንሢ ናባቢባኣዓዳ? ⁴ ዒዚ ዒማ"ና ጌኤዢ ማኣሪ ጌሊ፥ ቄኤሶይዳፓ ዓታዛ ዒዛንታ ዒዛና ዋላ" ዓኣ ዓሶንታ ሙዒኒ ዳንዳዑዋ ያኣሲም ዱማዳ ካሦ ሙዔኔ።

⁵ ሃሣ ቄኤሳ ሃውሾ ኬሎ"ና ጌኤዢ ማኣርይዳ ሃውሾ ኬሎ" ሻቲ ማሢ ማዳቶ ዳቢንቴ ማዒ ፓይዳንቴዋሴ ጌይንቴ ሙሴ ዋጎይዳ ፃኣፒንቴሢ ዒንሢ ናባቢባኣዓዳ? ⁶ ጋዓንቴ ጌኤዢ ማኣርይዳፓ ባሻይ ሃይካ ዓኣኔ፤ ታ ዒንሢም ጋዓኔ። ⁷ ሃሣ <ታኣኒ ኮዓሢ ዓሲ ሚጪንቴሢ ማዓንዳኣፓዓቴም ታኣም ሹኪ ዒንጎ ባኣዚ"ቴዋሴ» ጋዓ ማፃኣፖ ቃኣላ" ዋዚ ጌይሢታቶዋ ዒንሢ ዔራያታቶ ዳቢንቴባኣ ዓሶ ዑፃ <ዔያታ ዳቤኔ» ጌይ ዋጋዓታንቴኬ። ⁸ ዓይጎር ጌዔቶ ዓሲኮ ናዓሢ ሃውሾ ኬሎ"ኮዋ ጎዳኬ» ጌዔኔ።

ኩጮ ዋቦ ዓሢ

(ማር. 3፥1-6፤ ሉቃ. 6፥6-11)

⁹ ዬሱሴ ዬኖ ቤዘይዳፓ ዔቂ ዓይሁዶ ዓሶኮ ቡኪንቶ ቤዘ ጌሌኔ፤ ¹⁰ ዒኢካ ፔቴ"፥ ኩቺ ዋቦ ዓሲ ዓኣኔ፤ ዒማ"ና ዬሱሴ ዋጎና ዓይሢጎኒ ኮዓ ፔቴ" ፔቴ" ዓሳ፡- «ዓይሁዶ ዓሶኮ ሃውሾ ኬሎ"ና ሃርጊንቴ ዓሶ ፓሢኒ ዓይሢንቴያዳ?» ጌዒ ያኡጪኔ።

¹¹ ዬሱሴያ ማሃዖ፡- «ዒንሢ ባኣካ"ፓ ፔቴ" ማራይ ዓኣ ዓሲ ማራዓሢ ሃውሾ ኬሎ"ና ዔቴይዳ ሎኦሜቶ ጎቺ ኬሎ"ዋዓዳ?

¹² ዓካሪ ያዲ ማዔቶ ዓሲ ማራይዳፓ ዋይቲ ባሹዋይ? ዬያር ሃውሾ ኬሎ"ና ኮሽ ማዶ ማዳሢ ዓይሢንቴያኬ» ጌዔኔ።

¹³ ዬካፓ ዬሱሴ ኩጮ ዋቦ ዓሢም፡- «ኩጮ ኔኤኮ ፒሼ!» ጌዔም ዒዚ ፒሻዛ ኩጮ ኮሽኪ ባጎ ኩጮጉዲ ማዔኔ። ¹⁴ ፔርሴ ዓሳ

12:1 ላሚ. ዋማ 23፥25።

12:3 1ሳሙ. 21፥1-6።

12:4 ሉቂ. ዓኬ 24፥9።

12:5 ፓይ. ማፃ 28፥9-10።

12:7 ማቴ. 9፥13፤ ሆሴ. 6፥6።

12:11 ሉቃ.

14፥5።

ጋዓንቴ ዩካፓ ኬሰካዖ ዩሱሴ ዋማይዲ ዔያታ ዋዳንዳቴያ ዋላ" ዘርቴኔ።

ፆኦሲ ዶኦሬም ማዳ ዓሢ

15 ዩማ"ና ዩሱሴ ዔያቶኮ ማሊያ ዔራዖ ዒኢካፓ ዴንዳዛ፥ ሚርጌ ዴሬ ዒዛ ገንዖ ዓኣፎኔ፤ ዩያ ዓሶፓ ሃርገንቴ ዓሶ ቢያ ዒ ፓሢኔ።

16 ዒዛኮ ፆኦም ፆኦማኣ ዔያታ ኬኤዙዋጉዲ ዔያቶ ላኣኔ፤

17 ዩይ ያዲ ማዔሢ ፆኦሲ ማሊያ ኬኤዛ ዒሲያሴ ዛሎ"ና፡-

18 «ሃይሾ ታ ዶኦሬ፥

ታ ዒዛ ናሽካያ ሃሣ ታና ዋዛሳ

ታኣም ማዳሢዳ

ታ ዓያኖ ዒዛ ዑፃ ታ ማሃንዳኔ፤

ዒዚ ዓሲ ዜርሢም ቢያ

ታኣኮ ፒዜ ዋጊያ ዔርዛንዳኔ።

19 ዒዚ ማርሚ ዒላታዓኬ፤

ጎይዖይዳኣ ዑኡዘ ዋይዚሳዓኬ።

20 ቱቄ ፒሎ"ዋ ዒ ሜንሣዓኬ፤

ዜኤሮ ታሞዋ ዋዳዓኬ።

ጎኡም ባሻንዲያ ሄላ"ንዳኣና

ዩያ ዒ ማዳንዳኔ።

21 ዓሲ ዜርሢያ

ዒዛይዳ ሃጊ ማዓንዳ ዋዛ ጌሣንዳኔ»

ጌይንቴሢ ኩማ"ንዳጉዲኬ።

ዩሱሴና ፑርቶ ዓያኖ ሱኡጋሢና ዛሎ"

(ማር. 3፥20-30፤ ሉቃ. 11፥14-23)

22 ዩካፓ ፑርታ ዓያና ዓርቁም ዛጋኒና ጌሰታኒያ ዳንዳዑዋ ፔቴ" ዓሲ ዓሳ ዩሱሴ ባንሢ ዔኪ ሙኬኔ። ዩሱሴያ ዒዛ ፖዒሳዛ ዓሢ ዛጋኒና ጌሰታኒያ ዳንዳዓኔ። 23 ዒማ"ና ዴራ" ቢያ ዲቃቴ ሄርሻዖ፡- «ሐይ ዳውቴ ናዓሢ ማዓንዳሞ?» ጌዔኔ።

24 ጋዓንቴ ፔርሴ ዓሳ ዩያ ዛጌ ዋዶ"ና፡- «ሃይ ዓሢ ፑርቶ ዓያኖ ኬሳ"ሢ ፑርቶ ዓያኖ ሱኡጋሢ ቢዔልዛቡሌ ዋልቆና ማዓንዳኣፓዓቴም» ጌዔኔ።

25 ዩሱሴ ዔያቶኮ ማሊያ ዔራዖ፡- «ፔቴ" ማዒባኣ ካኣቶ" ዓጪ ቢያ ላባ"ኔ፤ ዋላ" ፔቴ" ማዒባኣ ካታማታቶዋ ማኣሪ ዶዲዋሴ።

26 ፃላሄ ፃላሄ ኬሳ"ያ ማዔቶ ዋሊፓ ዲማዴኔ ጌይሢኬ፤ ያዲ ማዔቶ ካኣቱማ ዋይቲ ዶዳኒ ዳንዳዓይ? 27 ታኣኒ ፑርቶ ዓያኖ ኬሳ"ሢ

ዴያቶኮ ሱኡጋሢ ቢዔልዛቡሌና ማዔቶ ዒንሢኮ ናኣታ" ዓይጎና ፑርቶ ዓያኖ ኬሳ"ይ? ዴያር ዒንሢ ናኣታ" ዒንሢዳ ዋጋንዳኔ።
 28 ጋዓንቴ ፑርቶ ዓያኖ ታ ኬሳ"ሢ ያኦሲ ዓያኖና ማዔቶ ያኦሲ ካኣቱማ ዒንሢ ኮራ ሙኬኔ ጌይሢኬ» ጌዔኔ።

29 ዴሱሴ ሃሣ፡- «ፔቱ" ዓሲ ፔቱ" ዋልቄና ዓኣ ዓሲ ቤርታዲ ቱኩ"ዋዖ ዋልቆና ዓኣ ዓሢ ማኣሪ ጌሊ ዓኣ ባኮ ቡራኒ ዋይቲ ዳንዳዓንዳይ? ዋልቆሲ ቱኬ"ሢኮ ጊንፃ ዒዛኮ ዓኣ ባኮ ቡራኒ ዳንዳዓኔ።

30 «ታ ዓሲ ማዒባኣሢ ቢያ ታና ዒፃኔ፤ ታኣና ዋላ" ማዒ ዔኤቢ ቡኩሲባኣ ዓሲ ላኣላያ ማዓንዳኔ። 31 ዴያር ዓሲ ማዳ ዓይጎ ዳቢንቲ ማዔቶዋ፡ ጫሺ ቢያ ዒዛም ዓቶም ጌይንታንዳኔ፤ ታ ዒንሢም ጋዓኔ። ዓያና ጌኤሺ ጫሽካ ዓሲም ጋዓንቴ ዳቢንታ ዓቶም ጌይንታዓኔ። 32 ዓሲ ናዓሢ ጫሽካሢም ቢያ ዳቢንታ ዓቶም ጌይንታንዳኔ፤ ዓያና ጌኤሺ ጫሽካሢም ቢያ ጋዓንቴ ሃያ ዓጮ"ይዳ ማዔቶዋ ሃጋኣ ዓጮ"ይዳ ዳቢንታ ዓቶም ጌይንቲንዳዋሴ» ጌዔኔ።

ቃራ ሚሢኮ ዓኣፓፓ ዔርቲዖ

(ሉቃ. 6፡43-45)

33 ዴሱሴ ሃሣ፡- «ሚሢ ቢያ ዓኣፓፓ ዔርታሢር ዒንሢኮ ኮሺ ሚሢ ዓኣቶ ኮሺ ዓኣፒ ዒንሢ ዳንቃንዳኔ፤ ፑርታ ሚሢ ዒንሢኮ ዓኣቶ ጋዓንቴ ፑርታ ዓኣፒ ዒንሢ ዳንቃንዳኔ፤ 34 ዒንሢ ሃይ ሾኦኩ ናኣታ"! ዒንሢ ፑርታታዖ ኮሺ ባኣዚ" ኬኤዛኒ ዋይቲ ዳንዳዓይ? ዓይጎር ጌዔቶ ዓሲ ኬኤዛ ባኣ ዓሢኮ ዒኖይዳፓ ኩሚ" ኬሰኬሢኬ።

35 «ኮሺ ዓሲ ዒና" ዓኣ ኮሹሞይዳፓ ኮሺ ባኣዚ" ጌሰታኔ፤ ፑርታ ዓሲ ፔኤኮ ዒና" ዓኣ ፑርቱሞይዳፓ ፑርታ ባኣዚ" ጌሰታኔ። 36 ጋዓንቴ ታ ዒንሢም ጋዓኔ፤ ዓሳ ኮይሱዋ ባኮ ጌሰቲሢ ዛሎ" ቢያ ዓጮ"ይዳ ያኦሲ ዋጋ ኬሎ"ና ያኦጪንታንዳኔ። 37 ዴያዲ ማዓዛ ኔ ኮሺ ጌሰቲቲ ኮሺ ባኣዚ" ኔኤም ዋጊንታንዳኔ፤ ኔኤኒ ፑርታ ጌሰቲቲ ፑርታ ኔጊዳ ዋጊንታንዳኔ» ጌዔኔ።

ያኦሲ ዋልቄና ማዳንታ ዓከ ባኣዚ" ዛጋኒ ያኦጪንቲ ያኦጪሢ
 (ማር. 8፡11-12፤ ሉቃ. 11፡29-32)

38 ዲማና ሙሴ ዋሳ ዔርዛ ዓሶና ፔርሴ ዓሶና ዬሱሴ ኮራ፡- «ዔርዛሢዮ፤ ኔኤኒ ያኦሲ ዋልቄና ማዲንታ ዓኪ ባኣዚ" ማዲንቲ ኑ ዛጋኒ ኮዓኔ!» ጌዔኔ።

39 ዒዚ ጋዓንቲ ዔያቶም፡- «ፑርታ ሃሣ ጉሙርቂንቱዋ ሃያ ዎዶ" ዓሳ ያኦሲ ዋልቄና ማዲንታ ዓኪ ባኣዚ" ዛጋኒ ኮዓኔ፤ ጋዓንቲ ያኦሲ ማሊያ ኬኤዛሢ፡ ዮናኣሴይዳ ማዲንቲ ዓኮ ባካፓ ዓታዛ ሜሌ" ያኦሲ ዋልቄና ማዲንታ ዓኪ ባኣዚ" ዔያቶም ማዲንታዓኬ።

40 ዮናኣሴ ዴኤፖ ሞላሢ ጎጶ ሃይሣ ኬሊ" ዋንቲና ሮኦሪና ዴዔሢጉዲ ዓሲኮ ናዓሢ ዴኤፒዳ ሃይሣ ኬሊ" ሮኦሪና ዋንቲና ዴዓንዳኔ። 41 ኔኔዌ ካታሞ ዓሳ ዓጮ"ይዳ ያኦሲ ዎጋ ኬሎ"ና ሃያ ዎዶ" ዓሳይዳ ዎጋያ ማዓንዳኔ፤ ዓይጎሮ ጌዔቶ ኔኔዌ ዓሳ ዮናኣሴ ኬኤዛሢ ዋይዜ ዎዶ"ና ዳሲንቶ ዔሪ፡ ጎሞዋ ቡኤዒሢሮኬ። ያዲ ማዔቶዋ ሃሢ ዮናኣሴይዳፓ ባሼ ሃይካ ዓኣኔ። 42 ዓጮ"ይዳ ያኦሲ ዎጋ ኬሎ"ና ሳኣባ ዓጮ" ካኣቲላ ሃያ ዓሶ ዑፃ ዎጋንዳኔ፤ ዓይጎሮ ጌዔቶ ዒዛ ካኣቲ ሴሎሞኔኮ ዔራቶ ዋይዚ ዓጪ ዙልካፓ ሙኬያታሢሮኬ፤ ያዲ ማዔቶዋ ሴሎሞኔይዳፓ ባሼ ሃይካ ዓኣኔ» ጌዔኔ።

ፑርታ ዓያናኮ ጊንሣ ማዒ ዓሲዳ ጌሊያ
(ሉቃ. 11፡24-26)

43 ዬሱሴ ሃሣ፡- «ፑርታ ዓያና ዓሲዳፓ ኬሰኬ ዎዶ"ና ጌላንዳ ቤሲ ኮይ ኮይ ዋኣሢባኣ፡ ዓሲ ናንጉዋ ዳውሎ"ይዳ ሃንታኔ። ጋዓንቲ ጌሎንዶ ቤሲ ዴንቁዋሴ፤ 44 ዬያሮ ታ ኬሰኬ ማኣሮ ማዒ ዓኣዳንዳኔ» ጋዓኔ። ማዒ ዒ ሙካ ዎዶ"ና ኬኤፃ ጉሪ ማዒ፡ ጌኤሽኪ፡ ጊኢጊ ዓኣንቲ ዴንቃኔ። 45 ዬካፓ ፑርቶ ዓያና"ሢ ዓኣዲ ዒዛይዳፓ ባሼ ፑርታ ሜሌ" ላንካይ ፑርታ ዓያና ቡኩሲ ዔኪ ሙኪ ዒዚ ቤርታ ዓኣ ዓሢዳ ጌሊ ዎላ" ናንጋኔ፤ ዬያሮ ዬያ ዓሢኮ ጋፒንያ ናንጋ ቤርታኣሰካፓ ባሼ ፑርታ ማዓኔ። ሃያ ዎዶ" ፑርቶ ዓሶ ዑፃ ማዓንዳ ባካ ዬያ ማላ ባኣዚ"ኬ» ጌዔኔ።

ዬሱሴኮ ዒንደና ጌርሲንሢና
(ማር. 3፡31-35፤ ሉቃ. 8፡19-21)

46 ዬሱሴ ዴሮ"ሞ ኬኤዛ ጎይሣ ዓኣንቲ ዒዛኮ ዒንደና ጌርሲንሢና ዒዛና ጌሰታኒ ኮዒ ካራ" ሙኪ ዔቁኔ፤ 47 ዲማና ዒኢካ

12:38 ማቴ. 16፡1፤ ማር. 8፡11፤ ሉቃ. 11፡16። **12:39** ማቴ. 16፡4፤ ማር. 8፡12። **12:40** ዮና. 1፡17። **12:41** ዮና. 3፡5። **12:42** 1ካኣቶ". ማ 10፡1-10፤ 2ዎኦሲ. ዓሃኬ 9፡1-12።

ዓላ ዓሶይዳፓ ፔቴ"ሰኬይ ዩሱሴ ኮሮይዳ፡- «ሃይሾ ኔኤኮ ዒንዶና ጌርሲንሢና ኔና ኮሲ ካራ" ዔቂ ዓላኔ» ጌዔኔ። *

⁴⁸ ዩሱሴ ጋዓንቴ፡- «ዒንዳ ታኣኮ ያናዳይ? ጌርሲንሢያ ያናንሢዳይ?» ጌሲ ማሄኔ። ⁴⁹ ዩያ ጌዔሰካፓ ኩጮና ዒዛኮ ጊንያ ሃንታ ናኣቶ" ባንሢ ዳዊ ዳዊ፡- «ታኣኮ ዒንዶና ጌርሲንሢና ሃይሾ ሃኣቶኬ፤ ⁵⁰ ጫሪንጮይዳ ዓላ፥ ታ ዓዳሢ ዓይሢያ ኩንሣዞንሢ ሲያ ታኣኮ ጌርሲንታ ጌሮንታ ዒንዶንታ ዩያቶኬ» ጌዔኔ።

13

ዜርፆ ዜርቃሢ ኮኣኪንሦ

(ማር. 4፡1-9፤ ሉቃ. 8፡4-8)

¹ ዩኖ ኬሎ" ዩሱሴ ጋራፓ ኬሰኪ ባዞ" ዓጫ ዴዔኔ፤ ² ሚርጌ ዴሬያ ዒዛ ኮይላ" ሙኪ ቡኬሢሮ ዋኣዮና ፒንቆ ጎንጎይዳ ኬሰኪ ዴዔኔ፤ ዴራ" ጋዓንቴ ሲያ ባዞ" ዓጫ ዴቄኔ። ³ ዩካ ዒ ሚርጌ ባኣዚ" ኮኣኪንሢና ኬኤዛዮ፡- «ፔቴ" ዓሲ ጎሺዳ ዜርሢ ዜርቃኒ ኬሰኬኔ፤ ⁴ ዒዚ ዜርቃንቴ ፔቴ" ፔቴ" ዜርፆ ጎይያ ዓጫ ኬዳ"ዛ ካፓ ሙኪ ሙዔኔ። ⁵ ዓቴ" ዜርፆ ሚርጌ ዓጪባኣ፥ ሃኣሻ ቤሲዳ ኬዳ"ኔ፤ ዩኖ ቤዛ ሚርጌ ዓጪ ባኣሢሮ ዜርፆ ዑኩና ባቃሌኔ። ⁶ ማዔቶዋ ሳዓ ዓባዛ ሹሌ"ኔ፤ ⁷ ፆሊ ሚርጌ ዳኪባኣሢሮዋ ማሌኔ። ⁷ ዓቴ" ዜርፆ ሃሣ ዓንጊሢ ቶሻ ባኣካ ኬዳ"ኔ፤ ዓንጊያ ቶሻ" ዑጋያ ባቃሎ ባይዜኔ። ⁸ ሃሣ ዓቴ" ዜርፆ ኮሺ ቤሰካ ኬዳ" ባቃሌ ዋዶ"ና ሚርጌ ካፂኔ፤ ፔቴ"ዛ ፂኤታ ባጌላ ላሂ"ታሚ" ዓቴ"ዛ ሃይሢታሚ" ዓኣፒ ዓኣፔኔ። ⁹ ዩያ ዋይዛ ዋይዚ ዓኣሢ ዋይዞንጎ!" ጌዔኔ።

ዩሱሴ ኮኣኪንሦና ኬኤዚሴ ባኮ

(ማር. 4፡10-12፤ ሉቃ. 8፡9-10)

¹⁰ ዩካፓ ዒዛኮ ጊንያ ሃንታዞንሢ ዩሱሴ ኮራ ሙካዮ፡- «ዓይጎሮ ዴሮ"ሞ ኔ ኮኣኪንሢና ኬኤዛይ?» ጌዔኔ።

¹¹ ዒዚ ዔያቶም፡- «ዒንሢሞ ጫሪንጮ ካኣቱሞ ዛሎ" ዓኣሺንቴ ባኮ ዛላ ዔራኒ ዔራቶ ፆኦሲዳፓ ዒንጊንቴኔ፤ ዔያቶም ጋዓንቴ ዒንጊንቴባኣሴ። ¹² ዔኤቢ ዓኣሢሞ ቃሲ" ዒንጊንቴሞ ሚርጋንዳኔ፤ ዳካ" ዓኣሢዳፓ ጋዓንቴ ዒማ" ዳኮ" ዓኣማታዮ ዔከንታንዳኔ። ¹³ ዛጋዮ ዴንቁዋያ፥ ዋይዛዮ ዒና ዔኩዋያ ሃሣ ጳቂሱዋያ ማዔሢሮ ዔያቶም ታ ኮኣኪንሢና ኬኤዛኔ። ¹⁴ ዩይያ ፆኦሲ ማሊያ ኬኤዛ ዒሲያሴ ዛሎ"ና፡-

* **12:47** ፔቴ" ፔቴ" ሚናኣ ማፃኣፖኮ ፓይ. 47 ባኣሴ።

13:2 ሉቃ. 5፡1-3።

13:12 ማቴ. 25፡29፤ ማር. 4፡25፤ ሉቃ. 8፡18፤ 19፡26።

«ዋይዚ ዒንሢ ዋይዛኔ
 ጋዓንቴ ዒንሢ ጳቂሠታዎሴ፤
 ዛጊያ ዒንሢ ዛጋኔ
 ጋዓንቴ ዒንሢ ዒና ዔኩዋሴ።
 15 ዓይጎሮ ጌዔቶ ሃይ ዴራ"
 ዒኖ ፔኤሲ" ዶጪሴኔ፤
 ዋዮዋ ዔያታ ዓርቄኔ፤
 ዓእፖዋ ዴኡሜኔ።

ያዲ ማዒባእያታቴ
 ዓእፖና ዔያታ ዛጊ
 ዋዮና ዋይዚ
 ዒኖና ማሊ
 ታ ባንሢ ዔያታ ማዔም
 ሄኤዶ ታ ዔያቶ ዳቂሼያ ናንዳንቴኬ »
 ጌይንቴ ኬኤዚንቴሢ ዔያቶይዳ ኩማንዳኔ።

16 ዬሱሴ ሃሣ፡- «ዒንሢ ጋዓንቴ ዓእፓ ዒንሢኩ ዛጋሢሮ፣ ዋያእ
 ዒንሢኩ ዋይዛሢሮ ዒንሢ ባለቲና ዓእያኬ። 17 ጎኔ ታ ዒንሢኩም
 ጋዓኔ፤ ሚርጌ ያኦሲ ማሊያ ኬኤዛዘንሢና ዒሎ"ንሢና ዒንሢ ሃሢ
 ዛጋሢ ዛጋኔ ኮዔያታዮ ዛጊባኦሴ። ዒንሢ ዋይዛሢ ዔያታ ዋይዛኔ
 ኮዔያታዮ ዋይዛኔ ዳንዳዒባኦሴ» ጌዔኔ።

ዜርያ ኮኦኪንሦኮ ቡሊ"ያ ዬሱሴ ኬኤዜሢ
 (ማር. 4፥13-20፤ ሉቃ. 8፥11-15)

18 ዬካፓ ዬሱሴ፡- «ዓካሪ፣ ዒንሢ ዜርያኮ ኮኦኪንሦ ቡሊ"ያ
 ዋይዙዋቴ፤ 19 ጎይያ ዓጪ ኬዴ" ዜርያ ዳዋሢ፡- ያኦሲ ካኦቴዋ
 ቃኦሎ" ዋይዚ ዒና ዔኩዋ ዓሶኬ፤ ቤዘና ዓላሄ ሙኪ ዒና" ዜርቂንታ
 ቃኦሎ" ዔካኔ። 20 ሃኦቾ ሳይይዳ ዜርቂንቴ ዜርዒላ ዳዋሢ፡- ቃኦሎ"
 ዋይዛያ ዋዘና ጉሙርቂ ዔካ ዓሶኬ። 21 ማዔቶዋ ዳካ" ዋዴሮ
 ማዓንዳፓዋቴም ዓጲ ዔያቶኮ ባኦሴ፤ ዬያሮ ቃኦሎ" ዛሎ"ና ሜቶና
 ዒዒንቴ ዳኪንቴሢ ሄሌ" ዋዶ"ና ዑከና ዔያታ ዳቢንታኔ። 22 ዓንጊያ
 ቶሾ" ባኦካ" ዜርቂንቴዛ ዳዋሢ፡- ቃኦሎ" ዳካ" ዋዴሮ ዋይዛ ዓሶኬ፤
 ያዲ ማዔቶዋ ሃያ ዓጪ" ዛሎ" ማሊ ሜታዲሢና ቆሎ" ናሹዋና
 ዒና" ጌሊ ቃኦሎ" ዋሊ"ሳሢሮ ዓኦፑዋዮ ዓታኔ። 23 ኮዙ ሳይይዳ
 ዜርቂንቴዛ ዳዋሢ፡- ቃኦሎ" ዋይዚ ዒና ዔካ ዓሶኬ፤ ዬያታ ዓኦፒ
 ዓኦፓኔ፤ ፔቴ"ዛ ጸኤታ፣ ባጌላ ላሂ"ታሚ" ዓቴ"ዛ ሃይሢታሚ"
 ዓኦፓኔ» ጌዔኔ።

ዓዛሢ ኮከኒኑህ

24 ይያጉዱ ሃሣ ዩሱሴ ማለ፡- «ጨሪንጮ ካኦቱማ ጎሺዳ ጌኤሺ ዘርሢ ዘርቄ ዓሲ ማለኔ፤ 25 ዓሳ ቢያ ላሄ ዎድ"ና ሞርኬ ሙካዎ ባርቾ ባኣካ" ዓዡ ዘርቄ ዓኣዳኔ። 26 ባርቾ ባቃሊ ፑርቃዛ ዓዛሢ ባኣካ" ጴዳኔ። 27 ይያሮ ጎዡ ዓዶኮ ማዳ ዓሳ ዒዛ ኮይለ" ሙካዎ ሳዳሢዮ! ኔ ጎዡዶዳ ጌኤሺ ዘርሢ ኔ ዘርቄባኣዓዳ? ሂዳዎ ዓዛሢ ዓንካፓ ኬሰኬይ? ጌዔኔ። 28 ዒዚ ማሃዎ ሃያ ማዳሢ ሞርካሢዎይ! ዓያቶም ጋዓዛ፥ ማዳ ዓሳ ሃዴቲ ዴንዲ ኑ ዓዛሢ ሃርማንዳጉዲ ኔ ኮዓ? ጌዔኔ። 29 ዒዚ ጋዓንቲ ሓይዔ! ዓይጎር ጌዔቶ ዓዛሢ ዒንሢ ሃርማ ዎድ"ና ባርቾ ዎለ" ቱጋንዳኔ። 30 ይያሮ ሃሹ"ዎቲ፤ ባርቾ ማንፂንታ ዎድ" ሄለ"ንዳኣና ባርቾንታ ዓዛሢንታ ዎለ" ዑጎንጎ፤ ማንፂንታ ዎድ"ና ጋዓንቲ ማንፃ ዓሶም ዓዛሢ ቤርታዲ ቱጊ ታሚና ሚቺንታንዳጉዲ ናኣራ ናኣራ ቱኩ"ዎቲ፤ ባርቾ ጋዓንቲ ማንፂ ታኣኮ ኮኖይዳ ዋሁዎቲ ሂዚ ታ ጋዓንዳኔ» ጌዒ ዒያቶም ኬኤዘኔ።

ሴናፒጮ ጌይንታ ዳኮ" ዘርፃሎ ኮከኒኑህ (ማር. 4፥30-32፤ ሉቃ. 13፥18-19)

31 ዩሱሴ ሃሣ ማለ፡- «ጨሪንጮ ካኦቱማ ፔቲ" ዓሲ ጎሺዳ ዘርቄ፥ ሴናፒጮ ጌይንታ ዳኮ" ዘርፃሎ ማለኔ፤ 32 ዒዛ ዘርሢዳፓ ቢያ ዳካ"ኬ፤ ባቃሊ ዑጌ ዎድ"ና ጋዓንቲ ቱኩ"ና ሚፆይዳፓ ቢያ ባሼ፥ ዴኤፒ ሚሢ ማዓኔ፤ ሃሣ ካፓኣ ዒዘኮ ካኣፖይዳ ማኣሪ ማዢ ዴዓኔ» ጌይ ኬኤዘኔ።

ሙኑቆ ፃኣዞ ኮከኒኑህ (ሉቃ. 13፥20-21)

33 ሃሣ ዒያቶም ዩሱሴ፡- «ጨሪንጮ ካኦቱማ ፔቲ" ላኣሊ ሃይሃ ሻምባ ዲርኮና ዲኢሊዳ ዋሃ ሙኑቆ ፃኣዞ ማለኔ፤ ዬና ሙኑቆ ፃኣዞ ሙኑቆ ቢያሢ ዒቁሳኔ» ጌዒ ኬኤዘኔ።

ኮከኒኑሃና ዩሱሴ ኬኤዚሴ ባኮ (ማር. 4፥33-34)

34 ዩሱሴ ዬና ባኮ ቢያ ኮከኒኑሢና ዴሮ"ም ኬኤዘኔ፤ ኮከኒኑሢ ባኣያ ዓይጎ ባኣዚ"ያ ዒያቶም ኬኤዚባኣሴ። 35 ዬይ ያዲ ማዔሢ፡- «ሃይሶ ታኣኮ ታ ኮከኒኑሢና ኬኤዛንዳኔ፤

ዓጫ" ማዢንቲሢዳፓ ዓርቃዎ
ዓኣሺንቲ ባኣዚ" ታ ኬኤዛንዳኔ»

ጌይንቲ ያኦሲ ማሊያ ኬኤዛሢ ዛሎ"ና ያገጥንቴሢ ኩማ"ንዳጉዲኬ።

ዩሱሴ ዓዛሢ ኮኦኪንሦ ቡሊ"ሢ

³⁶ ዩካፓ ዩሱሴ ዴሮ" ሃሺ" ኬኤያ ጌሌኔ፤ ዒዛኮ ጊንያ ሃንታዞንሢ ዒዛ ኮራ ሙኪ፡- «ጎዡኮ ዓዛሢ ኮኦኪንሦ ቡሊ"ያ ኦሞ ኬኤዜ» ጌዔኔ።

³⁷ ዩሱሴ ማሃያ፡- «ጌኤዡ ዘርያ ዘርቄሢ ዓሲ ናዓሢኬ፤ ³⁸ ጎዡ ሃያ ዓጮ"ኬ፤ ጌኤዡ ዘርያ ያኦሲ ናኦቶ"ኬ፤ ዓዛሢ ጋዓንቴ ያላሄ ናኦቶ"ኬ፤ ³⁹ ዓዛሢ ዘርቄሢ ሞርካሢ ያላሄኬ፤ ባርቾ ማንዲያ ዓጮ"ኮ ጋፒንያኬ፤ ማንያ ዓሳ ያኦሲ ኪኢታንቾኬ። ⁴⁰ ዓዛሢ ቱጊ ቡኩሲ ታሞይዳ ሚቾሢጉዲ ዓጮ"ኮ ጋፒንያና ያዲ ማዓንዳኔ። ⁴¹ ዓጮ"ኮ ጋፒንያ ዎዶ"ና ዓሲኮ ናዓሢ ፔ ኪኢታንቾ ዳካንዳኔ፤ ዔያታኦ ዓሶ ዳቢሻዞንሢና ፑርቶ ማዳዞንሢ ቢያ ዒዛ ካኦቱሞይዳፓ ቡኩሲ ኬሳ"ንዳኔ። ⁴² ዩካፓ ዴኤፖ ታሞይዳ ዓጋንዳኔ፤ ዒኢካ ዩኤፒና ዓቺ ዳይሢና ዔያቶሞ ማዓንዳኔ። ⁴³ ዲሎ"ንሢ ጋዓንቴ ፔ ዓዳሢ ካኦቱሞይዳ ዓቢጉዲ ፖዓንዳኔ፤ ዎይዛ ዎይዚ ዓኣሢ ዎይዞንጎ!» ጌዔኔ።

ዓኣሺንቴ ቆሎ ኮኦኪንሢ

⁴⁴ ሄሊ"ሳያ ዩሱሴ፡- «ጫሪንጮ ካኦቱማ ኮሺ ሳዛይዳ ዓኣቾና ባኣዚ" ማለኔ፤ ፔቴ" ዓሲ ዬዮ ባኬሎ ዴንቃያ ማሢ ጊንሢ ዓኣቼኔ፤ ሚርጌ ዎዛዴሢሮ ዴንዲ ዓኣ ባኮ ቢያ ሻንቺ ዬዮ ጎዡሎ ሻንቄኔ» ጌዔኔ።

ሚዛጰ ሹጮኮ ኮኦኪንሦ

⁴⁵ ላሚ ሃሢ ዩሱሴ፡- «ጫሪንጮ ካኦቱማ ኮሺ" ሚዛጰ፡ ሹጮ ሻንቃኒ ኮዓ ኮርሞ ዓሢ ማለኔ፤ ⁴⁶ ዩይ ኮርማ ዓሢ ሚርጌ ቦንቺንታ ኮሺ" ሚዛጰ ሹቺ ዴንቄ ዎዶ"ና ዴንዲ ዓኣ ባኮ ቢያ ሻንቺ ዬዮ ሹጮሎ ሻንቄኔ» ጌዔኔ።

ሞላሢ ዓርቆ ሮኦጮ ማላ ሱዞ ኮኦኪንሦ

⁴⁷ ሃሢ ዩሱሴ፡- «ጫሪንጮ ካኦቱማ ባዞ"ይዳ ዓጊንቴ ሞላሢ ዓርቆ ሮኦጮ ማላ ሱዞ ማለኔ፤ ዬና ዴማ ዴማ ሞላሢ ቢያ ዓርቃያኬ። ⁴⁸ ሞላሢ ጌሊ ዓርቄንቴ ኩማ" ዎዶ"ና ሞላሢ ዓርቃ ዓሳ ዬዮ ሱዜሎ ባዞ"ፓ ጎቺ ዓጮ ኬሲ"ፓ ዴዒ ኮዡ ኮዡ ቁሪ ዔካያ፡ ፑርቶ ጋዓንቴ ዒኢካ ኬኤሪ ሃሻ"ኔ። ⁴⁹ ዓጮ"ኮ ጋፒንያ ዎጎ ኬሎ"ና ያዲ ማዓንዳኔ፤ ያኦሲኮ ኪኢታንቾ ሙኪ ጎሞ ዓሶ

ጌኤዠደዳፓ ቁሪ፥ 50 ባይቁዋ ታሞይዳ ዓጋንዳኔ፤ ዒኢካ ዩኤፒና ዓቺ ዳይሢና ማዓንዳኔ» ጌዔኔ።

51 ላሚ ሃሣ ዩሱሴ፡- «ዩይ ኮኦኪንሣ ሲያ ዒንሢሞ ዔርቲያ?» ጋዓዛ፥ ዔያታኦ «ሂዮ» ጌዔኔ። 52 ዒዚያ፡- «ጫሪንጮ ካኦቱሞኮ ዓኣሺንቴ ባኮ ኮሺ" ዔራ ዓሲ' ፃኣፒ ዓርቆና ዓኮና ጨሞ ባኮናፓ ዔሪ ዔሪ ኬሳ"፥ ሙሴ ዋኅ ዔርዛ ዓሲጉዲኬ» ጌዔኔ።

ዩሱሴ ናዚሬቲይዳ ዒዒንቴሢ
(ማር. 6፥1-6፤ ሉቃ. 4፥16-30)

53 ዩሱሴ ዩንሢ ኮኦኪንሣንሢ ኬኤዚ ኩርሴሰካፓ ዩኖ ቤዛፓ ዴንዴኔ። 54 ፔ ዓጮ" ናዚሬቲ ካታሞዋ ሙኪ፥ ዒኢካ ዓይሁዶ ዓሶኮ ቡኪንቶ ቤዛ ዔርዛንቴ ዒዛሲ ዋይዛ ዓሳ ቢያ ዲቃቲ ሄርሻዮ፡- «ሃይ ዓሢ ሃያጉዴ ዔራቶና ያኦሲ ዋልቄና ማዲንታ ዓኮ ባኮና ዓንካፓ ዔሬይ? 55 ሃይ ሚያ ዓርሳ ሃኦማ"ሢ ናኦዚ"ቱዋዓዳ? ዒንዳ ዒዛኮ ማይራሞቱዋዳ? ሃሣ ጌርሲንሢያ ዒዛኮ ያይቆኦቤንታ ዮሴፔንታ ሓሢ ሲሞኦኔንታ ዩሁዳንታቱዋዳ? 56 ጌሮንሢ ዒዛኮ ቢያ ኦኡና ዋላ"ቱዋዳዳ? ዓካሪ ሃይ ዓሢ ሃያ ቢያ ዓንካፓ ዔሬይ?» ጋዓዮ፥ 57 ዒዛ ኅናሲ ጉሙርቁዋዮ ሃሺ"ኔ።

ዩሱሴ ጋዓንቴ፡- «ያኦሲ ማሊሢ ኬኤዛሢ ፔ ዓጮ"ና ፔ ማኦሮ ዓሶና ባኦካ" ቦሂንታኔ፤ ጋዓንቴ ሚሌ" ቤሲዳ ቦቦንቲንታኔ» ጌዔኔ። 58 ዔያታ ጉሙርቁ ኅናሲ ዔኪባኦሢሮ ዩሱሴ ዒኢካ ሚርጌ ያኦሲ ዋልቄና ማዲንታ ዓኪ ባኦዚ" ማዲባኦሴ።

14

ማሰካ ዮሐንሴኮ ሃይቦ"
(ማር. 6፥14-29፤ ሉቃ. 9፥7-9)

1 ዩኖ ዋዶ"ና ጌሊላ ዓጮ" ዋይሣ ሄርዲሴ ዩሱሴ ማዳ ባኮ ዛሎ" ዋይዚ፥ 2 ዒዛኮ ዶንዞ ኮራ፡- «ያኦዴ ማዔቶ ማሰካ ዮሐንሴ ሃይባ"ፓ ዔቂ ሙኬኔ ጌይሢኬ፤ ሃይ ቢያ ማዲንታ ዓኮ ባካ ማዲንታሢ ዩያሮኬ» ጌዔኔ።

3 ዩያኮ ቤርታ ሄርዲሴ ዒዛኮ ጌርሲ ፒልጶሴ ማቾ፥ ሄርዲያዳ ዔኬ ዛሎ"ና ዮሐንሴ ዓይሢ ቱኡዞ ማኦራ ቱኬ"ኔ። 4 ዮሐንሴ ዒ ቱከ"ሴሢ፡- «ኔኤኒ ዒዞ ዔካንዳያ ዋጋ ዓይሱዋሴ» ጌዔሢሮኬ። 5 ዩያሮ ሄርዲሴ ዮሐንሴ ዋዲኒ ኮዔኔ፤ ጋዓንቴ ዓይሁዶ ዓሳ ዮሐንሴ ያኦሲ ማሊሢ ኬኤዛያ ማሂ ዛጋሢሮ ዒ ዒጊጮኦ።

6 ፔቴ" ከሌ" ሄሮዲሴ ፔኤኮ ሾይንቴ ከሎ" ቦንቻንቴ ሄሮዲያዳ ናኣ ሙዖም ዔኤሊ"ንቴ ዓሶ ቤርታ ሙኪ ኮርጋዖ ሄሮዲሴ ዋዛሴ።
7 ዩያሮ ሄሮዲሴ ናዔሎም፡- «ኔ ኮዓ ባኣዚ" ታና ዖኣጩ፤ ታ ኔኤም ዒንጋንዳኔ» ጌዒ ዒዞም ጫኣቄ።

8 ዬካፓ ዒዛ ዒንዳ ዒዞ ዘሬም፡- «ማሰካ ዮሐንሴኮ ቶኦኮ ሃሢ ታኣም ጎንጊዳ ዓጊ ዒንጌ» ጌዔ።

9 ዬያ ዋይዛዖ ካኣቲ ኮሺ" ዖዬ፤ ማዔቶዋ ዒ ዓሶ ቤርታ ዒዞም ጫኣቄሢሮ ዮሐንሴኮ ቶኦካ" ዒዞም ዒንጊንታንዳጉዲ ዓይሣ።
10 ዩያሮ ዓሲ ዳኪ ማሰካ ዮሐንሴኮ ቶኦኮ" ቱኡዞ ማኣራ ቲቂሲ፤
11 ቲቂንቴ ቶኦኮ" ጎንጊዳ ዓጊ ዔኪ ሙኪ፤ ናዔሎም ዒንጌም ዒዛ ዔኪ ዒንደም ዒንጌ። 12 ዬካፓ ዮሐንሴኮ ጊንዖ ሃንታ ናኣታ" ሙኪ ዒዛኮ ሌዞ ዔኪ ዱኡካዖ ዴንዲ ዬያ ባኮ ዬሱሴም ከኤዜ።

ዬሱሴኮ ዶንጎ ሺዮ ዓሶ ሙኡዚ"ዖ

(ማር. 6፡30-44፤ ሉቃ. 9፡10-17፤ ዮሐ. 6፡1-14)

13 ዬሱሴ ዮሐንሴኮ ሃይቦ" ዋይዜ ዎዶ"ና ዋኣዖና ፒንቆ ጎንጎ ቶጊ፤ ዓሲባኣ ዔዌ ቤሲ ፔኤሮ ሌሊ ዴዒኒ ዓኣፋ፤ ዴራ" ጋዓንቴ ዬያ ዋይዛዖ ዔያታ ዓኣ ካታማ"ፓ ከሰኪ ከሰኪ ቶኪና ዒዛ ጊንዖ ዒ ዓኣ ቤዞ ዓኣፋ። 14 ዬሱሴ ዋኣዖና ፒንቆ ጎንጋፓ ከዴ" ዎዶ"ና ሚርጌ ዴሬ ዛጋዖ ዔያቶ ሚጨንቴ፤ ዔያቶ ባኣካ"ፓ ሃርጌ ዓሶዋ ፖዒሴ።

15 ሳዓ ዓማ"ዛ ዒዛኮ ጊንዖ ሃንታ ናኣታ" ዒዛ ኮይላ" ሙካዖ፡- «ሃይ ቤዛ ዓሲ ናንጉዋ ዳውሎ"ኬ፤ ሳዓ ሃሢ ዓማሢሮ ዴራ" ሃያ ኮይሎ"ይዳ ዓኣ ጉርዶ ዴንዲ ፔኤኮ ሙዖንዶ ባኣዚ" ሻንቃንዳጉዲ ዔያቶ ዳኬ» ጌዔ።

16 ዬሱሴ ጋዓንቴ፡- «ዒንሢ ዔያታ ሙዓንዳ ባኣዚ" ዒንጉዋቴ፤ ዔያታ ዴንዶፓ» ጌዔ።

17 ዬሱሴኮ ጊንዖ ሃንታ ናኣታ፡- «ኦኡኮ ሃሢ ሃካ ዓኣዞንሢ ዶንጎ ካሣና ላምዖ ሞሎና ሌሊኬ» ጌዔ።

18 ዬሱሴያ፡- «ሂንዳ ዓኣዞንሢ ታኣም ዔኪ ዬዑዋቴ» ጋዓዖ፤
19 ዴራ" ቡጫ" ዴዓንዳጉዲ ዓይሣ፤ ዬካፓ ዶንጎ ካሦንሢና ላምዖ ሞሎንሢና ዔኪ ሌካ ጫሪንጮ ባንሢ ዛጊ ያኣሲ ሺኢቃዖ ካሦ ቡንዲ ዒዛኮ ጊንዖ ሃንታዞንሢም ዒንጋዛ ዔያታኣ ዴሮ"ም ዒንጌ። 20 ዬካፓ ቢያሢ ሙዒ ሚሸኬ፤ ዓቲ" ዶምቦ ዒዛኮ ጊንዖ ሃንታዞንሢ ታጵ ላምዖ ዴኤፒ ሌማቴ ኩሙሢ ዔኬ። 21 ዬያ ካሦ ሙዒ ዓሳ ላኣሎና ናኣቶ"ና ፓይዲንቲባኣንቴ ዓቲንቃ ሌሊ ዶንጎ ሺያ ዓሲ ማዓያኬ።

ዩሱፊስ ባዘ" ዑፃ ሃንቲያ

(ማር. 6፥45-52፤ ዮሐ. 6፥15-21)

22 ዩካፓ ዩሱፊስ ጊንያ ሃንታዘንሂሂሞ፡- «ታኣኒ ዓሶ ሳራሂ ዳካንዳኣና ዋኣዖና ፒንቆ ጎንጎ ቶጊ፥ ቤርታ ባዘ" ሱኮ ፒንቁዋቱ» ጌራ ዓይሄኔ። 23 ዳሮ" ዒ ዳኬሂኮ ጊንያ ፔኤሮ ሸኢቃኒ ዱኮ" ኬሰካያ ሳዓ ዓሚንቲያ ዒ ዒኢካ ዓኣኔ። 24 ዩማናናኣታ" ዓኣ ዋኣዖና ፒንቆ ጎንጌላ ሳዓፓ ባዘ" ሳዘ" ጌሊ ዓኣንቲ ዴኤፒ ዋኣሂ ጉዳ ቤርቶ ዛሎ"ና ዠባርሻሂሮ ጎንጌላ ሰካ ሃንጋ ጌራ ሚርጌ ዓጊፃኔ። 25 ዲሞኮ ባራሪ ኮይዳ ቂኢቃ ዋዴ ማዓኣና ዩሱፊስ ባዘ" ዑፃ ቶኪና ሃንቲ ሙኬኔ። 26 ዒዛኮ ጊንያ ሃንታ ናኣታ" ባዘ" ዑፃ ዒ ሃንቲ ሙካሂ ዛጊ ሚርጌና ዲቃቲ ዒጊጫዖ፡- «ሃይ ዒኤዢኬ!» ጌራ ዒላቲኔ።

27 ዩሱፊስ ዒማ"ና፡- «ዒንሂ ዎይታይ ዒጊጪፖቲ፤ ታናኬ!» ጌዔኔ።

28 ጴዲሮሴ ጋዓንቲ፡- «ጎዳሂዮ! ኔናታቶ ዋኣዖ ዑፃ ሃንቲ ኔ ባንሂ ታ ሙኮሞ» ጌዔኔ።

29 ዒዚያ፡- «ሃኒ ሙኬ!» ጌዔኔ። ዩካፓ ጴዲሮሴ ዋኣዖና ፒንቆ ጎንጎይዳፓ ኬዲ" ዋኣዖ ዑፃ ዩሱፊስ ባንሂ ዓኣዲሂ ዓርቂኔ። 30 ጋዓንቲ ዴኤፖ ዠባር ዒ ዛጌ ዎዶ"ና ዒጊጪኤ፤ ዩካፓ ዋኣዖይዳ ዒኤዲንቲሂ ዓርቃዖ፡- «ጎዳሂዮ፥ ታና ዓውሴ!» ጌይ ዒላቲኔ።

31 ዩሱፊስ ዩማና ኩጮና ዒዛ ዓርቃዖ፡- «ኔኤኒ ጉሙርቂያ ፓጮሂ ሃይ፥ ዓይጋ ኔ ሂርጌይ?» ጌዔኔ።

32 ዩካፓ ዩሱፊስና ጴዲሮሴና ጎንጎ ጋር ጌሌ ዎዶ"ና ዠባር ዠባርሺያ ሃሺ"ኔ። 33 ዒማ"ና ዋኣዖና ፒንቆ ጎንጎ ጋራ ዓኣዘንሂ ቢያ፡- «ጎኔ ኔ ዖኦሲ ናይኬ!» ጌይ ዩሱፊስም ዘጌኔ።

ዩሱፊስ ጌንሴሬፃይዳ ሃርጊንቲ ዓሶ ፓሄሂ

(ማር. 6፥53-56)

34 ዩሱፊስና ዒዛኮ ጊንያ ሃንታዘንሂሂና ባዘ" ፒንቁ ጌንሴሬፃ ዓጮ" ሂሌ"ኔ። 35 ዩሮ ዓጮ"ይዳ ዓኣ ዓሳ ዒ ዩሱፊስ ማዓሂ ዒሬ ዎዶ"ና ኮይላ" ዓኣ ዓጮ" ዓሲ ዳኪ ሃርጊንቲ ዓሶ ዒዛ ባንሂ ዒኪ ሙኡሴኔ። 36 ሃርጊንቲ ዓሳ ዒዛኮ ዓፒሎ ዓጮ ዒያቶ ዓርቂሳንዳጉዲ ዒዛ ሸኢቃዖ፥ ካኣሜዘንሂ ቢያ ዒያቶኮ ዓኣ ደርዓሰካፓ ፖዔኔ።

15

ዓይሁደ ዓሶኮ ዓዶንሂ ዋጎ

(ማር. 7፥1-13)

1 ዩዛፓ ዩሩሳሌም ድረስ ሙሴ ፔርሴ ዓሰና ሙሴ ዋጎ ዕርዳሞቻቸውን ይሰሩ ሙሴውን፡- 2 «ኔኤኮ ጊንጾ ሃንታዝንህ ኑ ዓደንህ ዋጎ ዓይጎሮ ካቸዋል? ሃሃ ዓይታ ሙዎ ሙዓሂያ ኩጮ ማሰቱዋል»። ጌራ ያክጩኑ።

3 ዩሱሴ ዓይቶም ማሃዎ፡- «ዓንሂ ዓንሂኮ ዋጎ ካፓኒ፡ ያኦሲ ዓይሂዎ ዓይጎሮ ዓንሂ ሃሻ"ይ? 4 ዩይ ዓይሂዎ ያኦሲ ሕኤኮ ዓደና ዓንደና ቦንቹ፤ ዓደ ሃሃ ዓንደ ጫሽካሂ ቢያ ሃይቢና ዋጊንታንዳኔ» ጋዓሂኑ። 5 ዓንሂ ጋዓንቱ ፔቱ" ዓሲ ዓደታቱያ ዓንደ ታጊዳፓ ዓንሂ ዳንቃንዳ ማኣዳሂ ታኣኒ ያኦሲም ዓንጎ ባኣዚ" ማሂ ዓንጌኔ» ጌዔቶ፤ 6 ዩይ ዓሂ ዓደታቶም ዓንደ ቦንቻኒ ዓዛ ኮይሱዋሴ ዓንሂ ጋዓኔ፤ ዩይፍ ዓንሂኮ ዳምቦ ደዳሻኒ ጌራ ያኦሲ ቃኣሎ" ዓንሂ ሃሻ"ኔ፤ 7 ሃይ ዓንሂ፡ ያሎ"ቱዋታዎ ፔና «ያሎ"ኩ» ጋዓ ዓሳ! ዓሲያሴ ዓንሂ ዛሎ"፡-

8 «ሐይ ዳራ" ዳንጎና ታና ቦንቻኔ፡
ዓና" ጋዓንቱ ታጊዳፓ ሃኬያኬ፤

9 ዓሲ ኬሴ" ዋጌና ዳምቤና
ያኦሲ ዋጌ ማሂ ዕርዳሞቻቸው
ጉሪ ታና ዓይታ ካኣሽካያ ማላኔ» »
ጌራ ኬኤዜሂ ፒዜኬ።

ዓሲ ጌኤሽቱዋያ ማሃ ባኣዚ"
(ማር. 7፡14-23)

10 ዩዛፓ ዩሱሴ ዳሮ" ፔ ባንሂ ዓኤላ"ዎ፡- «ዓና ዓከ ዋይዙዋቱ፤ 11 ዓሲ ጌኤሽቱዋያ ማሃሂ ዓሲዳፓ ኬሰካ ባኣዚ" ማሃንዳፓዓቱም ዙልካፓ ዳንጋና ጌላ ባኣዚ"ቱዋሴ» ጌዔኔ።

12 ዩዛፓ ዓዛኮ ጊንጾ ሃንታ ናኣታ" ዓዛ ባንሂ ሙሴውን፡- «ፔርሴ ዓሳ ዩያ ኔ ጌዔ ባኮ ዋይዚ ዓኔ ዳይሂ ኔ ዓሪያ?» ጌዔኔ።

13 ዓዚ ጋዓንቱ፡- «ታኣኮ ጫሪንጮ ዓዳሂ ቱከ"ባኣ ሚሂ ቢያ ቱጊንታንዳኔ፤ 14 ዓይታ ዓኣፒ ባይቄያ ሃሃ ዓኣፓ ባይቄ ዓሰኮ ዓርና ማዕሂሮ ዓይቶ ባኣዚ" ሃሹ"ዋቱ፤ ዓኣፒ ባይቄ ዓሲ ዓኣፒ ባይቄያ ዓከ ዓኣዳያ ማዕቶ ላምዎንሂ ዋሊ ዓከ ዓቲይዳ ሎኦማንዳኔ» ጌዔኔ።

15 ዳደሮሴ ዩሱሴ ኮራ፡- «ዩፍ ኮኣከንሦኮ ቡሊ"ዎ ኮም ኬኤዜ» ጌዔኔ።

16 ዩሱሴ ዓይቶም፡- «ዓንሂያ ሃሮ" ሄላ"ንዳኣና ማሊ ጳቂሡዋያዳ? 17 ዳንጋና ሊካ ጌላ ባኣዚ" ቢያ ጎጶ ኬዳ"ዎ ጊንሃ

32 ዩሱስ ዲዛኮ ጊንያ ሃንታዞንሢ ዔኤላ"ዎ፡- «ዓሳ ታእና ዎላ" ሃይሆ ኬሊ" ዴዔሢሮ ሙዓ ባእዚ"ያ ዔያቶኮ ባእሢ ታና ሚቻኔ፤ ሃሢ ዔያታ ዴንዳያ ጎይፃ ላቢ" ዓቱዋጉዲ ዔኤቢ ሙኡዙዋያ ታ ዔያቶ ዳካኒ ኮዑዋሴ» ጌዔኔ።

33 ዲዛኮ ጊንያ ሃንታ ናኣታ" ማሃዎ፡- «ሂዴቶ ሃያ ቢያ ዓሶም ጊዳ ሙኡዚ" ሃይካ ዓሲ ናንጉዋ ዳውሎ"ይዳ ዓይጋጋ ኑ ዴንቃንዳይ?» ጌዔኔ። 34 ዩሱስ ዔያቶ ኮራ፡- «ዓኣፒኒ ካሣ ዒንሢኮ ዓኣይ?» ጌዒ ያኦጨኔ፤

ዔያታ፡- «ላንካይ ካሣና ዳካ" ሞሎና ዓኣኔ» ጌዔኔ።

35 ዩካፓ ዩሱስ ዴራ" ሳያይዳ ዴዓንዳጉዲ ዓይሣዎ፡ 36 ላንካዎ ካሃንሢና ሞሎንሢና ዔከ ያኦሲ ሸኢቁ፡ ቡንፂ ጊንያ ሃንታዞንሢዎ ዒንጋዛ ዔያታኣ ዴሮ"ም ሸኢሼኔ። 37 ቢያሢ ሙዒ ሚሸከም ዓቱ" ደምቦ ጊንያ ሃንታዞንሢ ቡኩሲ ላንካይ ዴኤፒ ሌማቴ ኩሙሢ ዔኬኔ። 38 ሙዒ ዓሳ ላኣሎና ናኣቶ"ና ዓታዛ ዓቲንቃ ሌሊ ያይዶ ሺያ ማዓያኬ።

39 ዩካፓ ዩሱስ ዴሮ" ሳራሢ ዳካዎ፡ ዋኣያና ፒንቆ ጎንጎ ቶጊ፡ ማጌዶኔ ዓጮ" ዓኣዴኔ።

16

ያኦሲ ዋልቄና ማዲንታ ባኮ ዛጋኒ ያኦጨንቴ ያኦጨሢ
(ማር. 8፡11-13፤ ሉቃ. 12፡54-56)

1 ፔርሴ ዓሶና ሶዶቄ ዓሶና ዩሱስ ኮይላ" ሙከ፤ ዒ ዋዚ ጋዓቴያ ኑ ዛጎም ጌዒ፡- «ጨሪንቺዳፓ ያኦሲ ዋልቄና ማዲንታ ዓከ ባእዚ" ማዲ ኑና ዳቄ» ጌዒ ያኦጨኔ። 2 ዒዚ ጋዓንቴ ማሃዎ፡- «ዓማ"ዛ ለጨሪንጨ ጌኤሺታሢሮ፤ ሃኖ" ዒርዚ ዋርቃዒ ዒንሢ ጋዓኔ፤ 3 ጉቶ ሃሣ ሃኖ" ሳዓ ሻኣሬናኬ፤ ዒርዚ ዋርቃንዳኔ ዒንሢ ጋዓኔ፤ ዩያይዲ ጨሪንጨ ዛጊ ዒንሢ ዔሪ ዔሪኔ፤ ጋዓንቴ ሓሢ ማዲንታ ማዲንታ ዓኣ ባኮ ዛሎ" ዒንሢ ዔሪኒ ዳንዳዒባኣሴ። * 4 ፑርታ ሓሣ ጉሙርቂሢ ባእያ ማዔ፤ ሃያ ዎዶ" ዓሳ ማላታ ዛጋኒ ኮዓኔ፤ ጋዓንቴ ያኦሲ ማሊያ ኬኤዛ ዮናሴ ማላቶ"ይዳፓ ዓታዛ ሜሌ" ማላታ ዔያቶም ዳቂንታዓኬ» ጋዓዎ፡ ዩሱስ ዔያቶ ሃሺ" ሜሌ ቤሲ ዓኣዴኔ።

16:1 ማቴ. 12፡38፤ ሉቃ. 11፡16። * 16:3 ፔቴ" ፔቴ" ሚናኣ ማፃኣፓ ፓይዲ ሃይሃና ላምዖናይዳ ዩሱስ ጌዒ ባኮ ኬኤዛዋሴ። 16:4 ማቴ. 12፡39፤ ሉቃ. 11፡29።

ፔርሴ ዓሶና ሶዶቄ ዓሶናኮ ዓሶ ደቢሻ ሙኑቆ ፃአዞ

(ማር. 8፡14-21)

5 ዓዛኮ ጊንያ ሃንታ ናኣታ" ጋላ ዔኩዋያ ዋሊ" ባዞ" ሱኮ ፒንቄኔ፤

6 ዩሱሴ ዓዛኮ ጊንያ ሃንታዞንሢ ኮራ፡- «ኮሺ" ዔሩዋቴ! ፔርሴ ዓሶና ሶዶቄ ዓሶናኮ ዓሶ ደቢሻ ሙኑቆ ፃአዞፓ ዒንሢና ካፑዋቴ» ጌዔኔ።

7 ዔያታ፡- «ዒዛኮ ዬያ ጌይፃ ጎያንቴ ጋሎ" ኑ ዋሌ"ሢሮ ናንዳኔ» ጌዒ ዋላ" ጌሰቴኔ።

8 ዩሱሴ ጋዓንቴ ማሊያ ዔያቶኮ ዔራያ፡- «ዒንሢ ጉሙርቂፃ ፓጩ ዓሳ! «ካሦ ኑ ዋሌ"ሢሮኬ» ጌይ ዓይጎሮ ዋላ" ዒንሢ ጌሰታይ? 9 ሄኤዶ ሄላ"ያ ዒንሢ ጸቂሡዋዓዳ? ዶንጎ ካሦ፡ ዶንጎ ሺያ ዓሲ ሚሽኬም ዓቴ" ዶምቦ ዋኣዲ ዴኤፒ ሌማቴ ኩሙሢ ዒንሢ ዔኬቶዋ ዒንሢ ጸቂሡዋዓዳ? 10 ዬያጉዲ ሃሣ ላንካይ ካሣ ያይዶ ሺያ ዓሲ ሚሽኬም ዓቴ" ዶምቦ ዋኣዲ ዴኤፒ ሌማቴ ኩሙሢ ዒንሢ ዔኬቶዋ ዒንሢ ጸቂሡዋዓዳ? 11 ዓካሪ «ፔርሴ ዓሶና ሶዶቄ ዓሶናኮ ዓሶ ደቢሻ ሙኑቆ ፃአዞፓ ዒንሢና ካፑዋቴ» ጌዒ ታ ዒንሢም ኬኤዛና ካሣ ዛላቴዋኣሢ ዋይቲ ዒንሢ ጸቂሡዋይ?» ጌዔኔ።

12 ዓዛኮ ጊንያ ሃንታዞንሢ ዩሱሴ ዒንሢና ካፒንቱዋቴ ዔያቶም ጌዔሢ ፔርሴ ዓሶና ሶዶቄ ዓሶናኮ ዔርዚያይዳፓ ማዓንዳኣፓ ዓቴም ካሣ ዛላቴዋኣሢ ዔያታ ዔሬኔ።

ጴዊሮሴኮ ጉሙርቂያና ማርካዲያና

(ማር. 8፡27-30፤ ሉቃ. 9፡18-21)

13 ዩሱሴ ፒልጶሴ ቂሳሪያ ጎያ ዓጮ" ሄላ"ያ ዓዛኮ ጊንያ ሃንታዞንሢ ኮራ፡- «ዓሳ ዓሲኮ ናዓሢ ያናኬ ጋዓይ?» ጌዒ ዔያቶ ያኣጩኔ፤

14 ዔያታ፡- «ፔቴ" ፔቴ" ዓሳ «ማሰካ ዮሐንሴኬ» ጋዓኔ፤ ዛላ" ሃሣ «ዔኤሊያሴኬ» ጋዓኔ፤ ዓቴ" ዓሳ ሃሣ «ዔርሚያሴኬ፤ ሃንጎ ያኦሲ ማሊያ ኬኤዛዞንሢዳፓ ፔቴ"ሢኬ» ጋዓኔ» ጌዔኔ።

15 ዩሱሴያ፡- «ዒንሢ ታና ያናኬ ጋዓይ?» ጌዔኔ።

16 ዬማ"ና ሲሞኦኔ ጌይንታ ጴዊሮሴ፡- «ኔኤኒ ናንጊና ናንጋ ያኣዛሢ ናኣዚ"፤ ሚሲሴኬ!» ጌዔኔ።

17 ዩሱሴ ማሃያ፡- «ዮና ናዓሦ ሲሞኦኔ! ኔኤኒ ዓንጂንቴያኬ፤ ዓይጎሮ ጌዔቶ ዬያ ኔና ዔርዚሢ ጫሪንጫ ዓኣ ታ ዓዳሢ

ማዕንዲገጥቴም ዓሲቱዋሴ፤ 18 ታ ኔኤም ሂዚ ጋዓኔ፡- ጳጳሮሴ፡ ኔኤኒ ላላኬ፤ ሃያ ቦኦኮላሢ ማዕ ሹጫሢዲ ታኦኮ ሺኢጲያ ማኦሮ ዓሶ ታ ዶዲሺ ዕቁሳንዳኔ፤ ዬኖ ሺኢጲያ ማኦሮ ዓሶ ሃይቢ ዋልቁታያ ባይዛዓኬ። 19 ሃይሾ ታ ኔኤም ጫሪንጮ ማኦሮ ካኦቱዋኮ ካሮ" ቡሎ" ቁልፖ ዒንጋንዳኔ፤ ሳዓ ኔ <ማዖንጎ> ጌዔ ባካ ጫሪንጮ ዒማዲ ማዕንዳኔ፤ ሳዓ ኔ <ማዖጋ> ጌዔ ባካ ጫሪንጮኦ ማዕዓኬ» ጌዔኔ። 20 ዩካፓ ዩሱሴ ዒዛኮ ጊንያ ሃንታዞንሢ ኮራ ዒዚ ኪሪሰቶሴ ማዕሢ ዖኦማኦ ዔያታ ኬኤዙዋጉዲ ላቲ ዓይሣኔ።

ዩሱሴ ፔና ሄላ "ንዳ ሜቶና ሃይቦና ዛሎ" ኬኤዙሢ
(ማር. 8፡31—9፡1፤ ሉቃ. 9፡22-27)

21 ዩማፓ ዓርቃያ ዩሱሴ ዒዛኮ ጊንያ ሃንታ ናኦቶ" ኮራ፡- «ሃሢ ዩሩሳላሜ ታ ዓኦዳንዳያ ኮይሳኔ፤ ዒኢካ ጨዋና ቁኤሶኮ ሱኡጎና ሃሢ ሙሴ ዋጎ ዔርዛ ዓሶና ታ ጊዳ" ፑርታ ሜቶ ዔኪ ዩዔም፤ ሃይቁሰካፓ ሃይሣሳ ኬሎ"ና ሃይባ"ፓ ታ ዔቃንዳኔ» ጌዒ ጌዒ ኬኤዘሢ ዓርቁኔ።

22 ጳጳሮሴ ጋዓንቲ ዩሱሴ ዱማሳዖ፡- «ጎዳሢዮ! ፔቲ"ታዖ ዩይ ማዕዓኬ! ዩይ ባካ ኔና ሄሎ"ፓ!» ጌዒ ዘሪሢ ዓርቁኔ።

23 ዩሱሴ ጋዓንቲ ጳጳሮሴ ባንሢ ሺራዖ፡- «ፃላሄ፤ ኔ ታ ኮራፓ ሃኬ! ኔኤኒ ዓሲ ባኦዚ"ዳፓ ዓታዛ ዖኦሲ ባኦዚ" ማሉዋኦሢሮ ታኦኮ ኔ ዱቆ ማዓኔ» ጌዔኔ።

24 ዩካፓ ዩሱሴ ዒዛኮ ጊንያ ሃንታ ናኦቶ" ኮራ፡- «ታ ጊንያ ሃንታኒ ኮዓሢ ፔና ኬኤሪ ሃሾ"ንጎ፤ ሃሢ ሃይቢማኦ ጊኢጊ ታ ጊንያ ሃንቶንጎ።

25 ፔ ናንጎ ዓይሳኒ ኮዓሢ ቢያ ናንጎ ባይዛንዳኔ፤ ፔ ናንጎ ታ ጋይቲ ጌዒ ባይዛሢ ጋዓንቲ ዓይሳንዳኔ። 26 ፔቲ" ዓሲ፡ ዓጫ" ዓኦ ባካ ቢያ ዒዛም ማዕም ፔ ናንጎ ጋዓንቲ ባይዜቶ ዓይጎ ዒዛ ማኦዳ"ንዳይ? ሃሢ ዓሲ ፔኤኮ ባይቁ ናንጎ ማሂ ዴንቃኒ ዓይጎና ዳንዳዓይ? 27 ዓሲኮ ናዓሢ ዓይኮ ቦንቾና ዖኦሲ ኪኢታንቾና ዋላ" ሙካንዳኔ፤ ዒማ"ና ፔቲ" ፔቲ"ሢም ፔኤኮ ማዶ"ጉዲ ዒንጋንዳኔ።

28 ጎኔ ታ ዒንሢም ጋዓኔ፤ ዓሲኮ ናዓሢ ጫሪንጮ ካኦቱም ቦንቾና ሙካናና ዘጋንዳያ ሄላ"ንዳኦና ሃይካ ዔቁ ዓሶ ባኦካ"ፓ ሃይቁንዱዋ ዓሲ ዓኦኔ» ጌዔኔ።

17

(ማር. 9፡2-13፤ ሉቃ. 9፡28-36)

16:19 ማቴ. 18፡18፤ ዮሐ. 20፡23። 16:24 ማቴ. 10፡38፤ ሉቃ. 14፡27።

16:25 ማቴ. 10፡39፤ ሉቃ. 17፡33፤ ዮሐ. 12፡25። 16:27 ማቴ. 25፡31፤

ዓይኡ. 62፡12፤ ሮሜ 2፡6።

1 ላሆ" ኬሊ"ኮ ጊንፃፓ ዩሱሴ ጰደርሴና ያይቆኑቤና ሃሣ ያይቆኑቤኮ ጌርሲ ዮሐኒሴና ሌሊ ዔኪ ጴጌፒ ጴካ ኬሰኬኔ።
 2 ዩካ ዔያቶኮ ቤርታ ዒ ላኣሚንታዎ ዓኣፖ ካራ" ዒዛኮ ዓቢጉዲ ፖዔኔ፤ ሃሣ ዒዛኮ ማኣዓሢያ ዓኣፓ ዲካያ ማዒ ቦኣሬኔ። 3 ዩማ"ና ሙሴንታ ዔኤሊያሴንታ ዩሱሴና ዎላ" ጌሰታንቴ ዔያታ ዴንቄኔ።
 4 ጰደርሴ ዩሱሴ ኮራ፡- «ጎዳሢዮ! ሃይካ ኑ ናንጌቴ ኮሺኬ፤ ኔ ናሽኬቶ ፔቴ" ኔኤም፥ ፔቴ" ሙሴም፥ ፔቴ" ሃሣ ዔኤሊያሴም ሃይሣ ዉዲ ታ ማዦም» ጌዔኔ።

5 ዒ ኬኤዛ ጎይሣ ዓኣንቴ ቦኣሬ ሻኣሬ ሙኪ ዔያቶ ባይዘኔ፤ ዩያ ሻኣሮ ባኣካ"ፓ፡- «ታ ዒዛና ዎዛዳ፥ ታ ናሽካ ናዓሢ ሃያኬ፤ ዒዛሲ ዎይዙዎቴ» ጋዓ ዑኡሲ ዎይዘንቴኔ።

6 ዒማ"ና ዒዛና ዎላ" ዓኣ ዩሱሴኮ ጊንፃ ሃንታዞንሢ ዩያ ዎይዜ ዎዶ"ና ዲቃቲ ሳዖይዳ ባሊቲና ሎኦሚኔ። 7 ዩሱሴ ሙኪ ዔያቶ ኩጮና ዓርቃዎ፡- «ዒጊጨፖቴ፥ ዔቁዎቴ» ጌዔኔ። 8 ዩካፓ ዔያታ ዴግግ ጌዒ ዛጋንቴ ዩሱሴይዳፓ ዓታዛ ሜሌ" ዖኣኒያ ባኣሴ።

9 ዴካ"ፓ ዔያታ ኬዲያይዳ ዓኣንቴ ዩሱሴ ዔያቶም፡- «ዓሲኮ ናዓሢ ሃይቂ ሃይባ"ፓ ዔቃንዳያ ሄላ"ንዳኣና ዒንሢ ዛጌ ባኮ ዖኦማኣ ኬኤዚፖቴ» ጌዔኔ።

10 ዒዛኮ ጊንፃ ሃንታዞንሢ፡- «ዓካሪ፥ ሙሴ ዎጎ ዔርዛዞንሢ ዔኤሊያሴ ቤርታዲ ሙካንዳያ ኮይሳኔ ጋዓሢ ዓይጎርዳዎ?» ጌዒ ዒዛ ዖኦጮኔ።

11 ዒዚ ዔያቶም ማሃዎ፡- «ዔኤሊያሴ ጎኔ ሙኪ ቢያ ባኣዚ" ጊኢጊሻንዳኔ፤ 12 ጋዓንቴ ታ ዒንሢም ሂዚ ጋዓኔ፡ ዔኤሊያሴ ሙኪናኣኮኬ፤ ማዔቶዎ ዔያታ ኮዔ ባኣዚ" ዒዛይዳ ማዴያፓዓቴም ዒዛ ዔሪባኣሴ። ዩያጉዲ ሃሣ ዓሲኮ ናዓሢ ዔያታ ሜታሳንዳኔ» ጌዔኔ።

13 ዩማ"ና ዒዛና ዓኣ ጊንፃ ሃንታዞንሢ ዩሱሴ ዔያቶም ኬኤዜሢ ማሰካ ዮሐኒሴ ዛሎ" ማዔሢ ዔሬኔ።

ዩሱሴ ፑርታ ዓያና ዓርቁ ናይ ፓሢሢ

(ማር. 9፡14-29፤ 9፡30-32፤ ሉቃ. 9፡37-43፤ 9፡43-45)

14 ዩሱሴና ሃይሣ ዒዛኮ ጊንፃ ሃንታዞንሢ ዴር" ባንሢ ማዒ ሙካዛ ፔቴ" ዓሲ ዩሱሴኮ ቤርታ ሙኪ ጉምዓታዎ፡- 15 «ታ ጎዳሢዮ! ታኣኮ ናዓሢ ዓወሴ፤ ዴንሣ ፑርታ ዓያና ዶርዓ ዒዛ ሜታሳኔ፤ ሚርጌ ዎዴ ታሚዳ ሎኦማኔ፤ ሃሣ ዎኣሢዳኣ ጌላኔ።

17:1 2ጴጌ. 1፡17-18። 17:5 ማዢ. ማፃ 22፡2፤ ላሚ. ዎማ 18፡15፤ ዓይኩ. 2፡7፤ ዒሲ. 42፡1፤ ማቲ. 3፡17፤ 12፡8፤ ማር. 1፡11፤ ሉቃ. 3፡22። 17:10 ሚል. 4፡5። 17:12 ማቲ. 11፡14።

16 ኔኤኮ ጊንዖ ሃንታዞንሢ ኮራታ ዔኪ ሙኬንቴ ዔያታ ዒዛ ዓውሳኒ ዳንዳዒባእሴ» ጌዔኔ።

17 ዬሱሴ፦ «ሐይ ዒንሢ ጉሙርቁዋ ዋቦ ዓሳ! ዓይዴ ሄለ"ንዳእና ታ ዒንሢና ናንጋንዳይ? ሃሣ ዓይዲ ሄለ"ንዳእና ታ ዒንሢ ጊቢ" ዳንዳዒንዳይ? ሂንዳ ናዒሢ ታእም ዔኪ ዬዑዋቴ!» ጌዔኔ። 18 ዬካፓ ዬሱሴ ዩርቶ ዓያናሢ ጎራ"ዛ፤ ዩርቶ ዓያናሢ ናዒሢዳፓ ከሰከም ናዒሢ ዬማፓ ዓርቃዖ ዳቄኔ።

19 ዬካፓ ዒዛኮ ጊንዖ ሃንታ ናኣታ" ፔኤር ዬሱሴ ኮይለ" ሙካዖ፦ «ኦኡኒ ዩርቶ ዓያኖ ከሳ"ኒ ዳንዳዒባእሢ ዓይጎርዳይ?» ጌይ ዖኦጮኔ።

20 ዬሱሴ ማሃዖ፦ «ጉሙርቁዓ ዒንሢኮ ዳኬሢርኬ፤ ጎኔ ታ ዒንሢም ጋዓኔ፤ ሴናፒጮ ጌይንታ ባኮማ ዓኣፖ ጉዴያታዖ ጉሙርቁሢ ዒንሢኮ ዓኣቶ ሃያ ዳኡኮ" ሃካፓ ሺኢኬ» ጌዔቶ ዒንሢም ዓኣዳንዳይ፤ ዒንሢ ባሻንዳ ባኣዚ" ፔቴ"ታዖ ባኣሴ። [21 ሐያ ጉዴሢ ሙኡዚ" ሃሺ" ሺኢቆ ሺኢጰሢና ማዒባኣቶ ከሰከዋሴ» ጌዔኔ።]

22 ጌለላይዳ ዒዛኮ ጊንዖ ሃንታዞንሢ ቡኪንቲ ዓኣንቴ ዬሱሴ ዔያቶም፦ «ዓሲኮ ናዒሢ ዓሶም ዓኣሢንቲ ዒንጊንታንዳይ፤ 23 ዔያታኣ ዒዛ ዋዳንዳይ፤ ዒዚያ ሃይባ"ፓ ሃይሣጎ ኬሎ"ና ዔቃንዳይ» ጌዔሢር ዒዛኮ ጊንዖ ሃንታ ናኣታ" ሚርጌና ዖዬኔ።

ጌኤዡ ማኣርም ጨጊንታ ጊኢራ ዛላ

24 ዬሱሴና ዒዛኮ ጊንዖ ሃንታዞንሢና ቁፒርናሆሜ ጎዖ ዓጮ" ሄለ"ዛ ጌኤዡ ማኣርኮ ጊኢር ጨጊሳ ዓሳ ጰደርሴ ኮይለ" ሙካዖ፦ «ዒንሢኮ ዔርዛሢ ጌኤዡ ማኣርም ጨጎ ሚኢሾ ጨጋ?» ጌዒ ዖኦጮኔ።

25 ጰደርሴ፦ «ሂዮ፤ ጨጋኔ» ጌዔኔ።

ዬካፓ ጰደርሴ ጋሮ ጌላዛ ዬሱሴ ቤርታዲ ሲሞኦኔ ኮራ፦ «ዓጮ" ካኣታ" ጊኢር ሚኢሾንታ ኮርሞ ዓሶፓ ዔኮ ሚኢሾ ዔካሢ ዓጮ" ዓሶይዳፓም? ዙሎ" ዓሶይዳፓዳይ?» ጌዒ ዖኦጮኔ።

26 ጰደርሴ ማሃዖ፦ «ዙሎ" ዓሶይዳፓኬ» ጌዔኔ።

ዬያሮ ዬሱሴ፦ «ሂዳቶ ዓጮ" ዓሳ ጊኢራ ጨጉዋሴ ጌይሢኬ! 27 ዓካሪ ኦና ዔያታ ቆፁዋጉዲ ዴንዲ ሞላሢ ዓርቆ ዓንጎ ኪሮ ባዛ" ዓጌ፤ ዬካፓ ቤርታዲ ኔ ዓርቁ ሞሎማ ሹካዖ ዳንጋፓ ኔ ዔካንዳ ሹጮ ቢሮ" ታኣና ኔኤናና ዛሎ" ጨጌ» ጌዔኔ።

18

ጨሪንጮ ካኣቱሞይዳ ቢያፓ ባሼሢ ያናዳይ?

(ማር. 9፥33-37፤ ሉቃ. 9፥46-48)

1 ዬሮና ዬሱሴኮ ጊንዖ ሃንታዞንሢ ዬሱሴ ኮራ ሙካዖ፡- «ጨሪንጮ ካኣቱሞይዳ ቢያፓ ባሼሢ ያናዳይ?» ጌይ ዒዛ ያኦጩኔ። 2 ዬሱሴ ፔቴ" ዳካ" ናይ ዔኤሊ" ዔያቶኮ ባኣካ" ዔቂሳዮ፡- 3 «ጎኔ ታ ዒንሢሞ ጋዓኔ፤ ዒና" ዒንሢኮ ለኣሚንቲባኣቶ ሃሣ ዳካ" ናይጉዲ ዒንሢ ማዒባኣቶ ጨሪንጮ ካኣቱሞይዳ ፔቴ"ታዖ ዒንሢ ጌላዓኩ። 4 ሓይማ ናዖጉዲ ፔና ሂርኪዳሢ ጨሪንጮ ካኣቱሞይዳ ዴኤፒ ማዓንዳኔ። 5 ሃይማጉዴ ናዖ ታ ሱንዖና ቦንቺ ዔካሢ ታናኣ ዔካኔ። 6 ታና ጉሙርቃዞንሢ፡ ሃንሢ ዳኮ"ንሢዳፓ ፔቴ"ማ ዳቢሻ ዓሲ ዴኤፒ ዋንሢ ሹቺ ባቃና" ቱኪ" ባዞ" ቁልባ ኬኤሪንቲ ሃይቄቶ ቃራ ማዓንዳኔ» ጌዔኔ።

ዓሲ ዳቢሻ ባኣዚ"

(ማር. 9፥42-48፤ ሉቃ. 17፥1-2)

7 ሃሣ ዬሱሴ ኬኤዛዮ፡- «ዓሲ ጌሺ፡ ጎሜ ማዲሻኒ ዳንዳዒ ባኣዚ"ና ኩሜ" ሃሮ" ዓጩ"ሎሞ ባዴዔ! ዋይቲቴያ ጌሺ ዳቢሻ ባኣዚ" ሙኩዋዖ ዓታዓኩ፤ ጋዓንቲ ጌሺ ዳቢሻኒ ማዳ ዬያ ዓሢሞ ባዴዔ! 8 ዬያር ኔኤኮ ኩጫ ሃሣ ቶካ ዳቢሺ ጎሜ ማዲሳያ ማዔቲ ቲቂ ኔጊዳፓ ኬኤሬ፤ ላምዖ ኩቺና ሃሣ ላምዖ ቶኪና ዓኣዖ ናንጊና ባይቁዋታሞይዳ ኔ ኬኤሪንታሰካፓ ጉንዖ ሃሣ ዋቦ ዓሲ ማዒ ናንጊና ናንጎይዳ ጌሊፃ ኔኤም ኮሺኩ። 9 ዓኣፓ ኔኤኮ ኔና ዳቢሺ ጎሞ ማዲሻዞ ማዔቶ ኬሲ" ኔጊዳፓ ኬኤሬ፤ ላምዖ ዓኣፒ ኔኤኮ ዓኣንቲ ጋኣናሜ ታሞይዳ ኔ ኬኤሪንታሰካፓ ፔቴ" ዓኣፒና ማዒ ናንጊና ናንጎይዳ ጌሊፃ ኔኤም ኮሺኩ።

10 «ሃንሢ፡ ዳኮ"ንሢዳፓ ፔቴ"ማታዖ ዒንሢ ቦሁዋጉዲ ዒንሢና ዒራዋቲ፤ ጨሪንጮይዳ ዓኣ ዔያቶሞ ጊኢጊንቲ ኪኢታንቻ ጨሪንጮ ዓኣ፡ ታ ዓዳሢ ቤርታ ቢያ ኬሊ" ዓኣኔ። [11 ዓሲኮ ናዓሢ ሙኬሢ ባይቁሢ ዴንቂ ዳቂሻኒኬ]» ጌዔኔ። *

ባይቁ ማራይ ኮኣኪንሢ

(ሉቃ. 15፥3-7)

18:1 ሉቃ. 22፥24። 18:3 ማር. 10፥15፤ ሉቃ. 18፥17። 18:8 ማቴ. 5፥30።

18:9 ማቴ. 5፥29። * 18:11 ፔቴ" ፔቴ" ሚናኣ ማፃኣፓ ፓይ. 11 ቃሳ"ኔ፤ ቃኣሊ"ላ ሉቃ. 19፥10 ጊዳ" ዓኣዞ ማላኔ። 18:11 ሉቃ. 19፥10።

12 ሐሣ ዬሱስ ኬኤዛዎ፡- «ዲንሢሞ ዓይነ ማላይ? ፔቴ" ዓሲኮ ጭታ ማራይ ዓኣዎ ዔያቶይዳፓ ፔቴ" ባይቁቴ ታዘጸታሞ ታዘጸ ሄንቃ ዱኮ"ይዳ ሃሺ" ባይቁ ማራዓሢ ኮዓኒ ዓኣዳዋዓዳ? 13 ጎኔ ታ ዲንሢሞ ጋዓኔ፤ ዬያ ማራዓሢ ዳንቁ ዎዶ"ና ባይቁባኣ ታዘጸታሚ" ታዘጸንሢዳፓ ባሺ ባይቁ ጴዳሢሮ ሚርጌና ዒ ዎዛዳኔ። 14 ዬያጉዲ ጫሪንጮይዳ ዓኣ፡ ዲንሢኮ ዓዳሢ ሃንሢ ዳኮ"ንሢዳፓ ፔቴ"ማታዎ ባይቃንዳጉዲ ኮዑዋሴ» ጌዔኔ።

ዳቤ ዓሲ ዛላ

15 ዬካፓ ዬሱስ፡- «ታና ጉሙርቃዘንሢዳፓ ፔቴ"፡ ኔኤኮ ዒሾ ማዓይ ኔኤሞ ዳቤቶ ኔኤና ዒዛና ሌሊ ማዒጋፓ ዒ ዳቤ ጎይዎ ኬኤዜ፤ ኔ ጋዓሢ ዒ ዋይዜቶ ገንሣ ዲንሢኮ ፔቴሞ ዎንዳሲጉዲ ኔ ማሄኔ ጌይሢኬ። 16 ኔኤሞ ዒ ዋይዚባኣቶ ጌኤሲ ለምዎ፤ ሃሣ ሃይሃ ዓሲ ማርካቶና ጎናዳሢሮ ለምዎ ሐንጎ ሃይሃ ዓሲ ዔኪ ዒዛ ኮይላ" ዳንዴ። 17 ዔያታ ጋዓሢያ ዒ ዋይዛዓ ጌዔቶ ሺኢጲዎ ማኣሮ ዓሶሞ ኬኤዜ፤ ሃሣ ሺኢጲዎ ማኣሮሲያ ዋይዘ ዒፃቶ ኪሪሰቶሴ ጉሙርቁዋ ዓሲ ሃሣ ጎሜ ዓሲ ማሂ ዒዛ ዛጌ» ጌዔኔ።

18 ሐሣ ዒ ኬኤዛዎ፡- «ጎኔ ታ ዲንሢሞ ጋዓኔ፤ ሳይይዳ ዲንሢ ሳይ ማዎሞ፡ ጌዔ ባካ ጫሪንጮ ዒማዲ ማዓንዳኔ፤ ሳይይዳ ዲንሢ ሳይማፓ፡ ጌዔ ባካ ጫሪንጮይዳኣ ማዑዋያ ማዓንዳኔ።

19 «ሃሣ ታ ዲንሢሞ ጋዓኔ፡- ዲንሢ ለምዎ ማዒ ሳይይዳ ፔቴሞና ዓይነ ባኣዚ"ያ ሺኢቁቶ ጫሪንጮ ዓኣ ታ ዓዳሢ ዲንሢሞ ኩንሣንዳኔ። 20 ዓይነሮ ጌዔቶ ለምዎ ሃሣ ሃይሃ ማዒ ታ ሱንዎና ዲንሢ ቡኪንታ ቤዛ ቢያ ታ ዲንሢኮ ባኣካ" ማዓንዳኔ» ጌዔኔ።

ዓሲሞ ዓቶሞ ጌይሢ

21 ዬማ"ና ጴዊሮሴ ዬሱስ ባንሢ ሙካዎ፡- «ጎዳሢዮ! ኔና ጉሙርቃ፡ ፔቴ" ታ ዒሻሢ ታኣሞ ዳቤቶ ዓኣፒኒ ማይንቲ ታ ዒዛሞ ዓቶሞ ጎዎንዶይ? ላንካይ ሄላ"ንዳኣና ጎዎንዶሞ?» ጌዒ ያኣጩኔ።

22 ዬሱስ ማሃዎ፡- «ላንካይታሚ" ማይንቲ ላንካይ ሄላ"ንዳኣና ማዓንዳኣፓዓቴሞ ላንካይ ማይንቲ ሌሊ ሳቶሞ» ጌዔ ታ ኔና ጎዑዋሴ፤ 23 ዬያሮ ጫሪንጮ ካኣቱማ ፔኤኮ ማዳ ዓሶ ኮራ ዓኣ ሚኢሾ ዛጋኒ ኮዔ ካኣቲሰኬያ ማላኔ፤ 24 ዬይ ካኣታ"ሢ ሚኢሾ ዛጎ" ዓርቁ ዎዶ"ና ሺያ ዓሲ ፔቴ" ሌዔ ማዶ ማዴሞ ዒንጎ

ሚኢሼ ጉዳያ ባይዜ፥ ጋሌና ዓኣ፥ ዒዛኮ ማዳ ዓሲ ዓርቂንቴ ሙኬኔ።²⁵ ዬይ ማዳ ዓሢ ጋሎ" ጨጋኒ ዳንዳዒባኣሢ ሃኣታ"ሢ ዒዛንታ ዒዛኮ ማቸንታ ናኣቶ"ንታ ዓኣ ባካኣ ቢያ ሻንቸንቴም ጋላ" ጨጋንታንዳጉዲ ዓይሣኔ።²⁶ ማዳሢ ጋዓንቴ ካኣታሢኮ ቶካ ሎኦማዎ፡- «ታ ጎዳሢየ! ሃዳራ፥ ታ ኔኤም ጋሎ" ቢያ ጨጋንዳኔ፤ ዳካ" ኬሊ" ታኣም ማሌ ጌዒ ሺኣቄኔ።²⁷ ጎዳሢ ዒዛ ሚጨንታዎ ዒዛኮ ዓኣ ጋሎ" ሃሺ"፥ ማሂ ዳኬኔ።

²⁸ «ጋዓንቴ ዬይ ዓሢ ዬካፓ ኬሰኪ ዓኣዳንቴ ፄኤታ ሹቺ ቢራ ዒዛይዳፓ ታልዔ፥ ዒዛና ዋላ" ማዳ ዓሲሰኬያ ዴንቃዎ ፖኦሪንዶ ዓሢኮ ጨኡሊ" ዓርቂ «ኔ ታኣኮ ታልዔ ቢሮ" ታኣም ጨጌ!» ጌዔኔ።²⁹ ዬይ ዒዛኮ ለጋሢ ቶካ ዒዛኮ ሎኦማዎ «ሃዳራ፥ ታ ኔኤም ጋሎ" ጨጋንዳኔ፤ ዳካ" ኬሊ" ታኣም ማሌ ጌዒ ሺኣቄኔ፤³⁰ ታልዔሢ ጋዓንቴ ዬያ ዋይዘ ዒዳዎ ጋሎ" ጨጋንዳያ ሄላ"ንዳኣና ዔኪ ዓኣዲ ቱኡሲ" ማርካ ቱኪ"ሴኔ።³¹ ሜሌ" ዬያ ዓሢና ማዳ ለጎንሢ ዬያ ዛጌ ዋዶ"ና ሚርጌና ያያዎ ዴንዲ ማዲንቴ ባኮ ቢያ ዔያቶኮ ካኣታ"ሢም ኬኤዜኔ።³² ዔያቶኮ ካኣታ"ሢ ዬያ ማዳ ዓሢ ዔኤሊ"ሳዎ፡- «ኔኤኒ ሃይ ፑርታሢ! ኔታና ሺኣቄሢ ጌኤኮ ዓኣ ጋሎ" ቢያ ታኔኤም ሃሺ"ኔ፤³³ ዓካሪ ታኣኒ ኔኤኮ ጋሎ" ኔኤም ሃሺ"ሢ ጉዲ ኔኤኒ ኔ ለጋሢ ማዔ፥ ማዳሢም ጋሎ" ሃሻ"ንዳያ ኮይሱዋዓዳ?»³⁴ ጋዓዎ፥ ጎዳሢ ዒዛይዳ ጎሪ"ንቴሰካፓ ቤርታ ሃሺ" ጋሎ" ቢያ ጨጋንዳኣና ቱኪ" ዒዛ ሜታሳንዳጉዲ ቱካ" ዓሶም ዓኣሢ ዒንጌኔ።³⁵ «ዓካሪ ዒንሢ ፔቴ" ፔቴ"ሢ ታና ጉሙርቃ፥ ዒንሢኮ ዒጊሮንሢም ዒናፓ ዓቶም ጌዒባኣቶ ጫሪንጮይዳ ዓኣ ታ ዓዳሢ ዒንሢም ዓቶም ጋዓዓኬ» ጌዔኔ።

19

ላኣሊ ዓንጂሢ ሃላ ያኦጨንቴ ያኦጨሢ
(ማር. 10፥1-12)

¹ ዬሱሴ ዬያ ባኮ ኬኤዚ ጋፒሴሢኮ ጊንፃ ጌሊላ ዓጮ" ሃሺ" የርዳሮሴ ዋሮ ሱካ" ዓኣ፥ ዪሁዳ ዓጮ" ዴንዴኔ።² ዬማና ሚርጌ ዓሲ ዒዛ ጊንፃ ዓኣዳዛ ዔያቶይዳፓ ሃርጊንቴ ዓሶዋ ዒኢካ ዒ ፓሢኔ።

³ ፔርሴ ዓሳዒ ዋዚ ጋዓቴያ ዋይዛኒ ዒዛ ኮይላ" ሙካዎ፡- «ማዔ ባኣዚ" ቢያና ዓሲ ፔኤኮ ማቸ ዓንጃንዳጉዲ ዋጋ" ዓይሣ?» ጌዒ ያኦጨኔ።

4 ዩሱፍ ማሃየ፡- «የኦሲ ቤርታዲ ዓቲንቄና ላኦሊና ማሂ ዓሲ ማዢሂ ዒንሂ ናባቢባኣዓዳ? 5 ሃህ «ዬያ ዛሎ"ና ዓሲ ዓደና ዒንደና ሃሺ" ማቸና ዋላ" ፔቴ" ማዓኔ፤ ለምዶንሂያ ፔቴ" ዓሲ ማዓኔ፤ ያኦሲ ጌዔሂ ዒንሂ ናባቢባኣዓዳ? 6 ዬያሮ ዔያታ ፔቴ"ኬ፤ ለምዶቱዋሴ፤ ያኦሲ ዋላ" ዋኣፃዘንሂ ዓሲ ቡሎ"ፓ» ጌዔኔ።

7 ፔርሴ ዓሳ ጊንሂ፡- «ሂዴቶ ሙሴ ዓይጎር <ፔቴ" ዓሲ ላኦሊ ለዓሊ ዓንጂያ ማዔሂ ዔርዛ፤ ማርካ ማዔ፤ ፃኣፒንቴ ባኣዚ" ዒንጊ ማቸ ዓንጂንጎ" ጌዒ ዓይሂያ?» ጌዔኔ።

8 ዩሱፍ ማሃየ፡- «ሙሴ ዒንሂኮ ዒኖ" ደዱሞ ዛጊ ላኦሊ ዒንሂ ዓንጂንዳጉዲ ዓይሂንዳኣፓዓቴሞ ማዢንታፓ ዓርቃዎ ዓኣ ዋጋ" ያዲቱዋሴ፤

9 «ታ ዒንሂሞ ሃሂ ጋዒሂ' ማቻ ፔኤኮ ሜሌ"ና ዒኣቲባኣንቴ ማቸ ዓንጂ ሜሌ" ላኦሊ ዔካሂ ቢያ ዘኦሰካ ኮኣማያ ማዓኔ» ጌዔኔ።

10 ዒዛኮ ጊንዖ ሃንታዘንሂ ዬያ ዋይዛየ፡- «ዓኒና ማቸና ዛላ ባኣዚ" ያዲ ማዔቴ ዔኪቦኦቴ ሃህ ሎዒቦኦቴ ቃራኬ» ጌዔኔ።

11 ዩሱፍ ጋባንቴ፡- «የኦሲ ደማ ዳንዳዒሂ ዒንጌ ዓሲዳፓ ዓታዛ ዬይ ባካ ያኣማኣ ዳንዳዒንቴዋያኬ። 12 ጋባንቴ ዓሲ ላኦሊ ዔኩዋዎ ሃህ ሌውዋዎ ዓታሂ፡- ፔቴ" ፔቴ"ሂ ዓሸቲሚ ማዒ ሸይንታኔ፤ ዛላ" ሃህ ዓሲ ኩቸና ዓሸቲንቃኔ፤ ዓቴ"ሂ ሃህ ጫሪንጮ ካኣቱሞ ማዶ"ሮ <ሸዓዓ> ጌዒ ፔና ዓሸቲሚጉዲ ማሃኔ፤ ዬያ ታ ጌዔ ባኮ ዔካኒ ዳንዳዒሂ ያዲ ማዶንጎ» ጌዔኔ።

ዩሱፍ ናኣቶ" ዓንጂያ

(ማር. 10፡13-16፤ ሉቃ. 18፡15-17)

13 ዒማ"ና ናኣቶ"ኮ ዑያይዳ ኩጮ ጌሂ ሸኢቃንዳጉዲ ዓሳ ዳኮ" ናኣቶ" ዒዛ ባንሂ ዔኪ ሙካዛ ዒዛኮ ጊንዖ ሃንታዘንሂ ጋባንቴ ዓሶ ጎሬኔ። 14 ዩሱፍ፡- «ናኣታ" ታ ባንሂ ሙኮንጎ፤ ላኦሊፖቴ፤ ጫሪንጮ ካኣቱማ ዔያቶ ጉዴዘንሂሞኬ» ጋዓዖ፤ 15 ኩጮ ናኣቶ" ዑዓ ጌሂ ዓንጂሂኮ ጊንፃፓ ዬኖ ቤዛፓ ዔቂ ዓኣዴኔ።

ፔቴ" ዖርጎቺ ዴጌሰኬያኮ ያኦጪሂ

(ማር. 10፡17-31፤ ሉቃ. 18፡18-30)

16 ዬካፓ ፔቴ" ዓሲ ዩሱፍ ኮራ ሙካየ፡- «ዔርዛሂዮ፤ ናንጊና ናንጊ ዴንቃኒ ዓይጎ ኮሺ ባኣዚ" ታ ማዶንደይ?» ጌዒ ያኦጪኤ።

17 ዩሱሴ ማሃዎ፡- «ኮሺ ማዶ ዛላ ኔ ታና ዓይጋ ያኦጫይ? ኮሺ ማዓይ ፔቴ" ያኦዛሢ ሌሊኬ፤ ናንጊና ናንጊ ኔ ዴንቃኒ ኮዔቴ ዓይሢያንሢ ኩንሢ» ጌዔኔ።

18 ዓሢያ፡- «ዋንሢ ዓይሢያንሢ?» ጌዔኔ።

ዩሱሴ ማሃዎ፡- «ዓሲ ዋዲፖ፡ ማሞ ሃሃ ዓኒ ማዒባኢያና ላሂፖ፡ ዉኡቂፖ፡ ሉኡዙሞና ማርካዲፖ፡ 19 ኔ ዓዶና ኔ ዒንዶና ቦንቹ፡ ዓሲ ኔናጉዲ ማሂ ናሽኬ ጋዓ ዓይሢያንሢ» ጌዔኔ።

20 ዴጌሢያ፡- «ዩንሢ ታ ቢያ ካፔያኬ፤ ሜሌ" ዓቴ" ባኣዚ" ዓይጌ ዓኣይ?» ጌዔኔ።

21 ዩሱሴ ማሃዎ፡- «ፔቶ ኔ ዒሎ" ማዓኒ ኮዔቶ ኔኤኮ ዓኣ ባኮ ቢያ ሻንቹ ሚኢሾ ማንቆ ዓሶም ዒንጌ፤ ጫሪንጮይዳ ቆሎ ኔ ዴንቃንዳኔ። ዓካሪ ዩካፓ ታ ጊንፆ ሙኬ» ጌዔኔ።

22 ዴጌሢ ዩያ ዋይዛዎ፡ ሚርጌ ቆሎ ዒዛኮ ዓኣሢሮ ኮሺ" ያዪ ያዪ ዴንዴኔ።

23 ዩካፓ ዩሱሴ ዒዛኮ ጊንፆ ሃንታ ናኣቶ" ኮራ፡- «ጎኔ ታ ዒንሢሞ ጋዔኔ፤ ያርጎቹም ያኦሲ ካኣቱሞይዳ ጌሊሢ ሚርጌ ሜቶኬ፤ 24 ላሚ ታ ሃሃ ዒንሢሞ ጋዔኔ፡- ያርጎቹ ያኦሲ ካኣቱሞይዳ ጌላሢዳፓ ጋኣላ ናርፔ ዒኣናና ጌላኒ ሽሌዔ ማዓንዳኔ» ጌዔኔ።

25 ዒዛኮ ጊንፆ ሃንታ ናኣታ" ዩያ ዋይዜ ዋዶ"ና ኮሺ" ዲቃቲ ሄርሻዎ፡- «ዓካሪ ሂዴቴ ያኦኒ ዲቃኒ ዴንዳዒንዳይ?» ጌዒ ያኦጫኔ።

26 ዩማና ዩሱሴ ዔያቶ ባንሢ ዛጋዎ፡- «ዩይ ዓሲም ዴንዳዒንቱዋ ባኣዚ"ኬ፤ ያኦሲም ጋዓንቱ ቢያ ባኣዚ" ዴንዳዒንታያኬ» ጌዔኔ።

27 ጴዒሮሴ፡- «ሃይሾ ቢያ ባኣዚ" ኑ ሃሺ" ኔ ጊንፆ ሃንታንቱሞ? ዓካሪ፡ ኑ ዴንቃንዳ ባካ ዓይጌንዴ ናንዳይ?» ጌዔኔ።

28 ዩሱሴ ማሃዎ፡- «ጎኔ ታ ዒንሢሞ ጋዔኔ፤ ሙካንዳ ዓኮ ዓጮ"ይዳ ዓሲኮ ናዓሢ ቦንቹንቱ፡ ካኣቱሞ ያይቶይዳ ዴዔ ዋዶ"ና ዒንሢያ ታ ጊንፆ ሃንታዞንሢ ታጶ ላምዎ ካኣቱሞ ያይቶይዳ ዴዒ፡ ታጶ ላምዎ ዒሰራዔኤሌ ፃጶይዳ ዋጋንዳኔ። 29 ታ ሱንፆር ጌዒ፡- ፔ ማኣሮ፡ ፔ ጌርሲንሢ፡ ጌርንሢ፡ ዓዶ፡ ዒንዶ፡ * ናኣቶ" ማዔቶዋ ጎኩ ሃሻ"ሢ ቢያ ፄኤታ ጳንጮ ማሂ ዔካንዳኔ፤ ሃሃ ናንጊና ናንጎዋ ዴንቃንዳኔ። 30 ጋዓንቱ ቤርታ ማዔ፡ ጎኦኮ" ማላ ሚርጌ ዓሳ ጊንሢም፤ ጊንፃ ዓቴ" ላቤያ ማላ ሚርጌ ዓሳ ቤርቱም ማዓንዳኔ» ጌዔኔ።

19:18 ኬሲ. ማፃ 20፡13-16፤ ላሚ. ዋማ 5፡17-20። 19:19 ኬሲ. ማፃ 20፡12፤ ላሚ. ዋማ 5፡16፤ ሉዊ. ዓኬ 19፡18። 19:28 ማቴ. 25፡31፤ ሉቃ. 22፡30።

* 19:29 ዒንዶ፡- ጋዓዛ ፔቴ" ፔቴ" ማፃኣፓ «ዒንዶ ሃሃ ማሞ» ጋዔኔ። 19:30 ማቴ. 20፡16፤ ሉቃ. 13፡30።

20

ዎይኖ ጎዡ ጎሽካ ዓሶ ኮኣኪንሦ

¹ ዩካፓ ዩሱፍ፡- «ጫሪንጮ ካኣቱማ ፔኤኮ ዎይኖ ጎዡ ጎሽኪሳኒ ጎሽካ ዓሶ ኮሲ ጉቴ" ዓሚ" ኬሰኬ ዓሲ ማላኔ፤ ² ዒዚ ፔቴ" ፔቴ" ዓሶም ፔቴ" ፔኤሺኮ ፔቴ" ኬሊ" ማዳዛ ዒንጎ ሚኢሾ ጨጋኒ ዓሶና ጌሰቲ ጊኢጊ ጎዡ ቤዘ ዓሶ ዳኬኔ» ጌዔኔ። ³ ዩሱፍ ኬኤዛዎ፡- «ዩይ ዓሢ ጉቴ" ሶኦፓ ዎዴኮ ቤርታ ቦኦኮ" ቤዘ ኬሰኪ ማዶ ባይቁም ዓቂ ዓኣ ዓሲ ዴንቁ፤ ⁴ <ዒንሢ ታኣኮ ዎይኖ ጎዡ ዩዳ ዴንዲ ማዲዋቴ፤ ታ ዒንሢም ኮይሳሢ ጉዲ ጨጋንዳኔ> ጋዓዛ፤ ⁵ ዔያታ ዓኣዴኔ። ሃሣ ዓባ" ሳዛ ሄላ"ኣና ጊንሣ ማሢ ዶምቦልሳ ዎዴ ማዓኣና ኬሰኪ ሜሌ" ማዳንዳ ዓሲ ዴንቁኔ። ⁶ ዩካፓ ዓባ" ዒባናኣና ኬሰኪ ማዶ ባይቁም ዓቂ ዓኣ ሜሌ" ዓሲ ዴንቃዎ፤ <ማዶ ባኣያ ሃይካ ዒንሢ ዓይጋ ዓቂ ፔኤቃይ?> ጌሲ ያኤጫዛ፤ ⁷ ዔያታ ማሃዎ ሓና ማዳሻኒ ጋዓ ዓሲ ባይቁሢ፤ ጌዔኔ፤ ዓሢ ዩያ ዋይዛዎ <ዒንሢያ ዓኣዲ ታኣኮ ዎይኖ ጎዡ ዩዳ ማዲዋቴ> ጌዔኔ።

⁸ «ዩካፓ ሳዓ ዓማዛ ጎዡ ዓዳሢ ማዶ ዓሶኮ ሱኡጋሢም <ጋፒንፃ ሙኬዘንሢዳፓ ዓርቃዎ ቤርታ ሙኬ ዓሶ ሄላ"ንዳኣና ማዶ" ዓሶ ቢያ ዔኤሊ" ዔያታ ማዴሢ ዛሎ" ዔያቶም ጨጌ" ጌዔኔ። ⁹ ዓሚ"ና ዓባ" ዒባናኣና ማዶኒ ሙኬ ዓሶንሢ ሚኢሾ ጨጋሢ ኮይላ"ፓ ፔቴ" ኬሊ" ማዴም ዒንጎ ሚኢሾ ዔኬኔ። ¹⁰ ቤርታ ማዶ" ዓርቁዘንሢ ዒማ"ና ባሽ ኑም ጨጎንዶኔ ጌሲ ማሌኔ፤ ጋዓንቴ ዔያቶማኣ ፔቴ" ኬሊ" ማዴም ዒንጎ ሚኢሻ ዒንጊንቴኔ። ¹¹ ጨጎና ሚኢሾ ዔያታ ዔካዎ ጉንዲሚሢና ጎዡ ዓዶ ኮራ፡- ¹² <ሃንሢ ዓባ" ዒባናንቴ ማዶ"ሮ ሙኬዘንሢ ዳካ" ሌሊ ማዳዛ ሮኦሪ ማዶ"ና ላቢ"ንቴ ዓባ" ራኡዳ ሜታዲ ፔኤቁ ዓሶ፤ ኑኡና ዋላ" ሄኮ ዎይቲ ኔ ዔያቶም ጨጋይ?> ጌዔኔ።

¹³ «ጎዡ ዓዴ ዩያ ማዳሢ ኮራ ታ ዒሻሢዮ፤ ታ ፑርታ ኔኤም ማዶባኣሴ፤ ፔቴ" ኬሊ" ማዴም ጨጎ ሚኢሾም ማዶኒ ኔ ታኣና ዋላ" ጌሰቲ ጊኢጊባኣዓዳ? ¹⁴ ሃኣዛጌ፤ ኔኤሮማ ዔኪ ዓኣዴ፤ ኔኤም ታ ዒንጊሢጉዴያ ጋፒንፃ ሙኬ ዓሢማኣ ታ ዒንጋኒ ኮዓኔ። ¹⁵ ታኣኒ ታ ሚኢሾና ኮዔ ባኣዚ" ማዶኒ ዳንዳዑዋዓዳ? ጊንሣ ሃሣ ሚጨጎታያ ታ ማዔሢሮ ኔና ቂኢሪሻ?»

¹⁶ «ዩያሮ ቤርታ ማዔ፤ ጎኡ" ማላ ሚርጌ ዓሳ ጊንሢም፤ ጊንፃ ዓቴ" ላቤ"ያ ማላ ሚርጌ ዓሳ ቤርቲም ማዓንዳኔ» ጌዔኔ።

20:8 ሌዊ. ዓኬ 19፤13፤ ላሚ. ዎማ 24፤15። **20:16** ማቴ. 19፤30፤ ማር. 10፤31፤ ሉቃ. 13፤30።

ዩሱስ ዒዛ ሄለ'ንዳ ሜታሢ ዛሎ" ሃሣ ከኤዜሢ
(ማር. 10:32-34፤ ሉቃ. 18:31-34)

17 ዩሱስ ዩሩሳሌም ዓላዲያይዳ ዓኣዮ፡- ታጾ ለምዖ ዒዛኮ ጊንያ ሃንታዞንሢ ሌሊ ዲማሲ፤ 18 «ሃኣዛጉዋቴ፡ ሃሢ ኑ ዩሩሳሌም ዓኣዳኔ፤ ዓሲኮ ናዓሢ ቄኤሶኮ ሱኡጎና ሙሴ ዋጎ ዔርዛ ዓሶናም ዓኣሢንቲ ዒንጊንቲም ዔያታ ዒዛ ሃይቃንዳጉዲ ጌዒ ጌሰቲ ዋጋንዳኔ፤ 19 ዔያታ ቦሃንዳጉዲና ዠራፓና ጳርቃንዳጉዲ ሃሣ ሱፃንዳጉዲ ዓይሁዴ ማዒባኣ ዓሶም ዓኣሢ ዒንጎንዳኔ፤ ዩካፓ ሃይቁ፡ ሃይባ"ፓ ሃይሣጎ ከሎ"ና ዒ ዔቃንዳኔ» ጌዔ።

ዜብዲዮሴ ማቸኮ ፔ ናኣቶ" ዛሎ" ዖኦጨዖ
(ማር. 10:35-45)

20 ዩካፓ ዜብዲዮሴ ማቸኮ ፔ ናኣቶ"ና ዋላ" ዩሱስ ኮይላ" ሙኪ ዒዛም ጉምዓቲ ዚጋዖ ፔቴ" ባኣዚ" ዒዛም ማዲንታንዳጉዲ ሸኢቄ።

21 ዩሱሴ፡- «ዓይጌንዴ ኔ ኮዓይ?» ጌዔ።

ዒዛ፡- «ኔ ካኣቱም ቤዛ ሃንሢ ታኣኮ ለምዖ ናኣቶ"ንሢ፡ ፔቴ"ሢ ኔኤኮ ሚዛቃ፡ ፔቴ"ሢ ኔኤኮ ሻውሎ" ዛላ" ኔኤና ዋላ" ዋይሣያ ማዓንዳዳጉዲ ማሢ ዴይሢ!» ጌዔ።

22 ዩሱሴ ጋዓንቲ፡- «ዓይጎ ሸኢቆንዶቲያ ዒንሢ ዔሩዋሴ፤ ታኣኒ ሃሢ ዑከ ዔካንዳ ሜታሢ ዒንሢ ዔካኒ ዳንዳዓ? ሃሣ ታ ጌላንዳ ሜታሰካ ዒንሢ ጌላኒ ዳንዳዓንዳ?» ጋዓዛ፡ ዔያታኣ፡- «ሂዮ፤ ኑ ዳንዳዓንዳኔ» ጌዔ።

23 ዩካፓ ዩሱሴ፡- «ጎኔ ዒንሢ ታ ዔካንዳ ሜታሢ ዔካንዳኔ፤ ጋዓንቲ ታኣኮ ሚዛቆና ሻውሎ"ናይዳ ዴዒ ታኣና ዋላ" ዋይሣንዳጉዲ ማሃሢ ታናቱዋሴ፤ ዩይ ቤዛ ዒንጊንታሢ ታ ዓዴ ጊኢጊሼዞንሢ» ጌዔ።

24 ዩማ"ና ዓቲ" ታጾ ዒዛኮ ጊንያ ሃንታዞንሢ ዩያ ዋይዜ ዋዶ"ና ለምዖንሢ ዑፃ ጎሪ"ንቲ። 25 ዩሱሴ ጋዓንቲ ቢያሢ ፔ ባንሢ ዔኤላ"ዮ፡- «ዓይሁዴ ማዒባኣ ዓሶኮ ሱኡጎንሢ ዴሮ" ዋይሣዞንሢ፤ ዩያጉዲ ዴሮ" ሱኡጎንሢኮ ዴሮ" ዑፃ ቢታንቶ ዓኣሢ ዒንሢ ዔራ። 26 ዒንሢ ባኣካ" ጋዓንቲ ያዲ ማዓንዳያ ኮይሱዋሴ፤ ዒንሢዳፓ ባሼ ማዓኒ ኮዓሢ ዒንሢኮ ዴማ" ማዲያ ማዖንጎ። 27 ዒንሢዳፓ ዑፃ ማዓኒ ኮዓሢ ዒንሢኮ ዴማ" ዓይሌ" ማዖንጎ። 28 ዓሲኮ ናዓሢ ዓሲ ዒዛም ማዲንዳጉዲቱዋንቲ፡ ዓሲም

ማዳኒና ሸምፓሢ ፔኤሲ" ሚርጌ ዓሶ ዛሎ" ባይዛኒ ሙኬኔ»
ጌዔኔ።

ዓኣፒ ባይቄ ላምዖ ዓሲስኬንሢኮ ዓኣፖ ፖዒዖ
(ማር. 10፥46-52፤ ሉቃ. 18፥35-43)

29 ዩሱሴና ዒዛኮ ጊንዖ ሃንታዞንሢና ዒያርኮይዳፓ ከሰከ
ዓኣዳኣና ሚርጌ ዴሬ ዒዛና ዋላ" ዓኣዴኔ። 30 ዒኢካ ላምዖ ዓኣፒ
ባይቄ ዓሲ ጎይዖ ዓጫ ዴዒ ዓኣዖ፥ ዩሱሴ ዒኢና ዓኣዳሢ ዋይዚ፡-
«ዳውቴ ናዓሢዮ፥ ጎዳ! ኑና ማኣዴ!"» ጌዒ ጌዒ ዒላቴኔ።

31 ዴራ" ዒማ"ና ዘቲ ጋዓንዳጉዲ ዒያቶ ጎራ"ዛ፥ ዒያታ ጋዓንቲ
ኮሺ" ዴጊዲ፡- «ዳውቴ ናዓሢዮ፥ ጎዳ፥ ኑና ማኣዴ!"» ጌዔኔ።

32 ዒማ"ና ዩሱሴ ዴንዲቤቃ ዒቃዖ፥ ዒያቶ ዒኤሊ"፡- «ዓይጎ ታ
ዒንሢሞ ማዳንዳጉዲ ዒንሢ ኮዓይ?» ጌዔኔ።

33 ዒያታ ማሃዖ፡- «ዓኣፓ ኑኡኮ ዘጋንዳጉዲ ኑ ኮዓኔ» ጌዔኔ።

34 ዩሱሴ ዒያቶ ሚጨንታዖ፥ ዓኣፖ ዒያቶኮ ፔ ኩጮና ካኣማዛ
ቤዘማና ዛጊ ዒዛ ጊንዖ ዒያታ ዓኣዴኔ።

21

ዩሱሴኮ ዴኤፖ ቦንቾና ዩሩሳሌሚ ጌሊዖ

(ማር. 11፥1-11፤ ሉቃ. 19፥28-40፤ ዮሐ. 12፥12-19)

1 ዩሱሴና ዒዛኮ ጊንዖ ሃንታዞንሢና ዩሩሳሌሚ ሄላ"ኒ ዑካዖ፥
ዛይቶ ሪሚቶ ዴኮ" ኮይላ" ዓኣ ቤቴፓጌ ጌይንታ ጉርዶ ሄሊ"ኔ።
ዩካፓ ዩሱሴ ዒዛኮ ጊንዖ ሃንታዞንሢዳፓ ላምዖንሢ፡- 2 «ሐኖ" ሴኮ
ቤርታ ዓኣ ጉርዴሎ ዓኣዴዋቴ፤ ዒኢካ ዒንሢ ሄሄላ"ዖ ፔቴ" ቱኡቲ
ዓኣ ሃሬ ናዖና ዋላ" ዴንቃንዳኔ፤ ዩያር ዩማ ሃሮ"ማ ቡሊ" ዒኪ ታኣም
ዩዑዋቴ። 3 ዖኢኒያ ዒንሢ ኮራ ዒኤቢ ጌዔቶ ረጎዳ ዒያቶ ኮዓኔ
ዒንሢ ጋዓዛ ቤዘማና ዒያታ ዳካንዳኔ» ጌዒ ዳኬኔ።

4 ዩይ ያዲ ማዓኒ ዳንዳዔሢ ዖኢሲ ማሊዖ ከኤዛሢ ዛሎ"ና፡-

5 «ሚዛጺ ዉዱር ናይ ማላ ዩሩሳሌሚ ካታሚ"ሎም

«ሐይሾ ኔኤኮ ካኣታ"ሢ ሚጨንታዖ ማዒ

ሐሬ"ሎ ሃሢ ሐሬ"ሎኮ ናዖ ቶጊ

ኔ ባንሢ ሙካኔ ጎዑዋቴ» ጌይንቲሢ ኩማ"ንዳጉዲኬ።

6 ዩያር ዒዛኮ ጊንዖ ሃንታዞንሢ ዩሱሴ ዓይሢ ጎይዖ ማዴኔ።

7 ሐሬ"ሎዋ ናዖማና ዋላ" ዒኪ ሙካዖ ፔኤኮ ዓፒሎ ዒያታ
ሃሮ"ንሢ ዑፃ ጌሣዛ ዩሱሴ ቶጌኔ። 8 ዩማና ዴሮ"ይዳፓ ሚርጌሢ
ዓፒሎ ፔኤኮ ጎይዖ ሂኢሣዛ፥ ዛላ" ሃሢ ዋላሺ ሜንሢ ሜንሢ

ጎይ፡ ሂሊሣኔ። 9 ዲዛኮ ቤርታ ቤርታ ዓኣዳ ዓሶና ጊንፆ ሙካ ዓሳ፡- «ዳውቴ ናዓሢም ጋላታ ማዖንጎ! ጎዳ ሱንፆና ሙካሢ ፆኦሲ ዓንጃንጎ! ጋላታ ጫሪንጮይዳ ፆኦሲም ማዖንጎ» ጌራ ጌራ ዒላታኔ።

10 ዩሱሴ ዩሩሳሌሜ ካታሞ ጌሌ ዎዶ"ና ዓሳ ጉቤ፡- «ሃይ ዖናዳይ?» ጌይሢና ዎኦቶንዶ ጎይሢ ባይዜኔ።

11 ዒዛና ዎላ" ሙካ ዓሳ፡- «ሓይ ጌሊላይዳ ዓኣ፡ ናዚሬቴ ካታሚ"ሎይዳፓ ሙኬያ፡ ፆኦሲ ማሊፆ ኬኤዛ ዩሱሴኬ» ጌዔኔ።

ዩሱሴ ጌኤዢ ማኣራ ማዳ ባኮ

(ማር. 11፡15-19፤ ሉቃ. 19፡45-48፤ ዮሐ. 2፡13-22)

12 ዩካፓ ዩሱሴ ጌኤዢ ማኣሪ ጌሊ፡ ጌኤዢ ማኣሪ ጋሮይዳ ሻንቻ ዓሶና ሻንቻ ዓሶና ዳውሲ ኬሴ"ኔ፤ ሃሣ ሚኢሾ ላኣማ ዓሶኮ ዴጌ ሎኦኩ ዖይቶና ዶኦሎ" ሻንቻ ዓሶኮ ዴፆ ዖይቶዎ ሂራ ዶይሳዖ፡- 13 «ማኣራ ታኣኮ ሺኢጸሢ ማኣሪ ጌይንታንዳኔ» ጌይንቲ ፆኣፒንቴኔ፤ ዒንሢ ጋዓንቲ «ዉሲ ዓኣሺንታ ቤሲ ማሂኔ» ጌዔኔ።

14 ዒማ"ና ጌኤዢ ማኣሪይዳ ዓኣፓ ባይቄ ዓሶንታ ዎሶ ዓሶንታ ዒዛ ኮራ ሙካዛ ዒዚ ዒያቶ ፓሢኔ። 15 ጋዓንቲ ቄኤሶኮ ሱኡጎና ሙሴ ዎጎ ዒርዘዘንሢና ዩሱሴ ማዳ ፆኦሲ ዎልቄና ማዳንታ ዓኮ ባኮ ዛጌሢ ሃሣ «ዳውቴ ናዓሢም ጋላታ!» ጌራ ጌራ ዒላታ ናኣቶ" ዎይዜሢ ሚርጌና ዳጋዴኔ። 16 ዒያታ ዩሱሴ ኮራ፡- «ሓይ ናኣታ" ጋዓ ባኮ ኔ ዎይዙዎዳ» ጌዔኔ።

ዩሱሴ ማሃዖ፡- «ሂዮ፡ ታ ዎይዛኔ፤ ጌኤዢ ማፃኣፖይዳ «ዳኮ" ናኣቶ"ንታ ዳንቃ ናኣቶ"ንታ ኔና ጋላታንዳጉዲ ኔ ማሂኔ» ጋዓሢ ዒንሢ ፔቴ"ታዖ ናባቢባኣዳዳ?» ጌዔኔ፤

17 ዩካፓ ዩሱሴ ዒያቶ ሃሺ" ካታማ"ፓ ኬሰካዖ፡ ቢታኒያ ጌይንታ ጉርዶ ዴንዲ ዒኢካ ዎርቄኔ።

ዩሱሴ ጋዳንቄ ቤሌሴ ጌይንታ ሚፆሎ

(ማር. 11፡12-14)

18 ዚር ጉቴ"ሎ ዩሱሴ ጉቴ" ዓማ" ሓንጋ ካታሞ ማዒ ሙኪቤቃ ናይዲንቴኔ፤ 19 ዒማ"ና ጎይፆ ዓጮይዳ ፔቴ" ቤሌሴ * ሚሢ ዴንቃዖ ዒዛ ባንሢ ዴንዲ፡ ዒላሺዳፓ ዓታዛ ፔቴ"ታዖ ዓኣፒ ዴንቄባኣሢር፡- «ሃይፓ ሴካ ዓኣፒ ዓኣፒፖ!» ጋዓዛ፡ ቤሌሶ ሚፆላ ዩካፓ ኔጉዎዖ ሃይቄኔ።

21:9 ዓይኡ. 118፡25-26።

21:13 ዒሲ. 56፡7፤ ዒር. 7፡11።

21:16

ዓይኡ. 8፡2። * 21:19 ቤሌሴ ጌይንታ ሚፆላ፡ ቦኦቢ ማላዳ ዓኣፖ ዓሲ ሙሙዓ ሚሢኬ።

20 ዲዛኮ ገንዖ ሃንታዞንሢ ማዕ ባኮ ዛጋዖ ዲቃቲ ሄርሺሢና፡- «ቤሌሶ ሚፄላ ወይቲ ዑኩና ሃይቃኒ ዳንዳዔይ?» ጌዔኔ።

21 ዩሱሴ ማሃዖ፡- «ጎኔ ታ ዲንሢም ጋዓኔ፤ ዲንሢኮ ጉሙርቂሢ ዓኣቶ ሃሢ «ማዓንዳሞ ማዓንዳዎይ» ዲንሢ ጌይባኣቶ ቤሌሶ ሚፄሎይዳ ማዕ ባኮ ማዳኒ ሌሊቱዋንቴ ሃያ ደኸ" «ሃይካፓ ዔቂ ባዘ" ጌሌ» ዲንሢ ጌዔቲታዖ ማዓንዳኔ፤ 22 ዲንሢኮ ጉሙርቂሢ ዓኣቶ ዲንሢ ሸኢቃ ባኮ ቢያ ዲንሢ ዴንቃንዳኔ» ጌዔኔ።

ዩሱሴኮ ቢታንቶ ዛሎ" ዖኦጪንቴ ዖኦጪሢ
(ማር. 11፥27-33፤ ሉቃ. 20፥1-8)

23 ዩሱሴ ጌኤዢ ማኣሮ ጌሊ ዔርዚያይዳ ዓኣንቴ ቁኤሶኮ ሱኡጎና ዴር"ኮ ጪሞና ሙካዖ፡- «ሓያ ቢያ ኔ ማዳ ባኮ ማዳሢ ዓይጎ ቢታንቶናዳይ? ሓያ ቢታንቶ ኔኤም ዲንጌሢያ ዖናዳይ?» ጌዒ ዲዛ ዖኦጪኔ።

24 ዩሱሴ ማሃዖ፡- «ታኣኒያ ፔቲ" ባኣዚ" ዲንሢ ዖኦጪንዳኔ፤ ዩና ዲንሢ ታኣም ማሄቶ ታኣኒ ሃያ ባኮ ዓይጎ ቢታንቶና ማዳቲ ዲንሢም ኬኤዛንዳኔ፤ 25 ማሰካ ዮሐኒሴኮ ዋኣዖና ማሰኪያ ዓንካፓዳይ? ዖኦሲዳፓሞ ዓሲዳፓዳይ?» ጌዔኔ።

ዩናሮ ዔያታ ዋላ" ጌሰታዖ፡- ««ዖኦሲዳፓኬ» ኑ ጌዔቶ ሂዳዖ ዲንሢ ዓይጎሮ ዲዛሲ ጉሙርቂባኣይ?» ዒ ጋዓንዳኔ፤ 26 «ዓሲዳፓኬ» ኑ ጌዔቶ ሃሢ ማሰካ ዮሐኒሴ ዓሳ ዖኦሲ ማሊሢ ኬኤዛ ዓሲ ማሂ ዛጋሢሮ ዴራ" ኑና ዒጊቻኔ» ጌዔኔ።

27 ዩካፓ ዔያታ ዩሱሴም፡- «ኦኡኒ ዔሩዋሴ» ጌዒ ማሃዛ፡ ዒዚያ፡- «ታኣኒያ ሂዴቶ ዓይጎ ቢታንቶና ሃያ ቢያ ማዳቶ ዲንሢም ኬኤዛዓኬ» ጌዔኔ።

ዓይሢንቲሢ ዛላ

28 ዩካፓ ዩሱሴ፡- «ሂንዳ ዲንሢም ዓይጎ ማላቶዋ? ፔቲ" ባኣዚ" ታ ዲንሢም ኬኤዛም፤ ፔቲ" ዓሲኮ ላምዖ ናይ ዓኣኔ፤ ዔያቶይዳፓ ፔቲ"ሢ ኮራ ዓዳሢ ሙካዖ «ታ ናዓሢዮ! ሓኖ" ጎዢ ዴንዲ ማዶ ማዴ» ጌዔኔ። 29 ናዓሢ «ዴንዳዓ፡ ዒፄኔ» ጌዔኔ፤ ያዲ ዒ ጌዔዖ ገንፃፓ ዳቢንቲ ማዔሢ ዔሪ፡ ማዶ" ማዳኒ ዴንዴኔ። 30 ሓሣ ዓዳሢ ባጎ ናዓሢ ኮራ ዴንዳዖ፡ ዒዚያ ዴንዲ ማዳንዳጉዲ ዓይሣዛ ናዓሢ «ዔኤዔ፡ ታ ዓኣዳንዳኔ» ጌዔኔ፤ ጋዓንቴ ማዳኒ ዴንዲባኣሴ። 31 ዓኣሪ ዩንሢ ላምዖ ናኣቶ"ንሢዳፓ ዓዶኮ ዓይሢያ ኩንሣሢ ዋያዳይ?» ጋዓዛ፡ ዔያታ፡- «ቤርታኣ ናዓሢሸ!" ጌዔኔ።

ዬሱሴያ ማሃዎ፡- «ጎኔ ታ ዲንሢሞ ጋዓኔ፤ ኮርሞ ዓሶፓ ሚኢሾ ቡኩሳ ዓሶና ዓኒ ሃሣ ማቾ ማዒባኣ ዓሶና ላሃ ዓሳ ያኦሲ ካኣቱሞይዳ ዲንሢ ቢሪ ጌላንዳኔ፤ ³² ማሰካ ዮሐኒሴ ጌኤሹሞ ጎይሢ ዲንሢ ዳዋኒ ዲንሢ ኮራ ሙካዛ ዲንሢ ዒዛሲ ጉሙርቂ ዔኪባኣሴ፤ ሚኢሾ ቡኩሳ ዓሶና ዓኒ ሃሣ ማቾ ማዒባኣ ዓሶና ላሃ ዓሳ ጋዓንቴ ጉሙርቂ ዒዛሲ ዔኬኔ። ዲንሢ ዬያ ዛጌሢኮ ጊንፃኣታ? ጎሞ ዲንሢኮ ቡኡዲ ጎናሲ ዒዛሲ ዔኪባኣሴ።»

ዎይኖ ጎዡ ጎሽካ ዓሶ ኮኣኪንሦ

(ማር. 12፡1-12፤ ሉቃ. 20፡9-19)

³³ ሓሣ ዬሱሴ ሜሌ" ማለሢ ኮኣኪንሢ፡- «ፔቴ" ዎይኔ ጎሽ ዓኣ ዓሲ ጎዡኮ ቲኢያ ዲርቂ፡ ዎይኖ ጨኡጸንዶ ዔቴያ ላሌ ሹቹዳ ቦኦኪ ኮሹ"ኔ፤ ሃሣ ካፒያም ማዓ ሴኤላኣ ሴኤሊ"። ዬካፓ ጎዡ ዒዛማኣ ጎሽካንዳ ዓሲም ዲንጊ ሜሌ" ዓጪ ዓኣፎኔ። ³⁴ ዎይና ካፄ ዎዶ"ና ዒዛ ሄላ" ዛሎ" ዓሶ ኮይላ"ፓ ዔኪ ዬዓንዳጉዲ ዒዛኮ ማዳ ዓሶ ጎሽካ ዓሶ ኮራ ዒ ዳኬኔ። ³⁵ ጎሽካ ዓሳ ጋዓንቴ ዓሢኮ ማዳ ዓሶ ዓርቃያ ፔቴ"ሢ ጸርቂ፡ ባጋሢ ዎዲ ሃሣ ዓቴ"ሢያ ሹቻ ዱይ ዑሬኔ። ³⁶ ዬይ፡ ጎዡኮ ዓዳሢ ላሚ ሃሣ ቤርታኢዲፓ ሚርጌ ዒዛኮ ማዳ ዓሲ ዳካዛ፡ ጎሽካ ዓሳ ሃሣ ቤርታ ማዳ ጎይያ ማዳ። ³⁷ ጋፒንያይዳ ጎዡኮ ዓዳሢ ታኣኮ ናዓሢ ዔያታ ቦንቹዎ ዓታዓ!፤ ጋዓዎ፡ ናዓሢ ፔኤኮ ጎሽካ ዓሶ ኮራ ዳኬኔ። ³⁸ ጎሽካ ዓሳ ጋዓንቴ ናዓሢ ዴንቄ ዎዶ"ና ሃይ ዒዛ ዳካላሢኬ፤ ሃኒ ሙኩዋቴ ዒዛ ኦ ዎዲ ዒዛኮ ዓኣ ባኮ ዳካሎም፤ ዎሊ ኮይላ" ጋዓዎ፡ ³⁹ ናዓሢ ዓርቂ ጎዡኮ ዙላ" ዔኪ ዴንዲ ዎዳ።

⁴⁰ «ዓካሪ ዬኖ ጎዡሎኮ ዓዳሢ ሙካዎ ዬንሢ ጎሽካ ዓሶንሢ ዎዶ"ንዳያ ዲንሢሞ ማላይ?» ጌዔኔ።

⁴¹ ዔያታ ማሃዎ፡- «ዬንሢ ፑርቶ ዓሶንሢ ሚጨንቱዎ ዒ ዎዎዳንዳኔ፤ ዎይና ካፄ ዎዶ"ና ቢያ ዒዛም ዲንጋንዳ፡ ሜሌ" ጎሽካ ዓሲም ጎዡ ዲንጋንዳኔ» ጌዔኔ። ⁴² ዬካፓ ዬሱሴ፡-

« ማኣሮ ማዡ ዓሳ ቦሢ ሃሹ" ሹጫሢ

ማኣሮኮ ሄላሢ ማዔኔ።

ዬይያ ያኦሲ ማዶኬ፤

ኦ ዛጋዛ ዓኪ ባኣዚ"ኬ

ጌይንቲ ፃኣፒንቴሢ ዲንሢ ፔቴ"ታዎ ናባቢባኣዳዳ?

43 «ዴያሮ ታ ዒንሢሞ ሂዚ ጋዓኔ፤ ፆኦሲ ካኣቱማ ዒንሢዳፓ ዒውቲ ዓኣፒ ዓኣፓ ዴሬሞ ዒንገንታንዳኔ። [44 ዴያ ሹጫሢዳ ሎኦማሢ ሜቃንዳኔ፤ ሃሃ ዴይ ሹጫሢ ዒዛ ዑፃ ዶዒ ዓሢያ ዳኣዲንታንዳኔ» ጌዔኔ።]†

45 ዒማ"ና ቄኤሶኮ ሱኡጎና ፔርሴ ዓሶና ዴንሢ ኮኣኪንሦንሢ ዋይዜ ዋዶ"ና ዴሱሴ ዒያቶሞ ጫርጌሢ ዒሪ። 46 ዒዛ ዓርቂ ቱካ"ኒ ኮዔኔ፤ ጋዓንቴ ዴራ" ዴሱሴ ፆኦሲ ማሊሢ ኬኤዛያ ማሢ ዛጋሢሮ ዒያታ ዒጊጪ ሃሹ"ኔ።

22

ዒፖ ሙዖሞ ዒኤሊ"ንቴ ዓሶ ኮኣኪንሦ
(ሉቃ. 14፥15-24)

1 ዴሱሴ ሃሃ ሜሌ" ኮኣኪንሢ ኬኤዛያ፡- 2 «ጫሪንጮ ካኣቱማ ናሳ ላኣሊ ዒካኣ ጌዔሞ፡ ሙኡዚ" ገኣጊሹ ካኣቲሰኬያ ማላኔ። 3 ዴይ ካኣታ"ሢ ዒኤሊ"ንቴ ዓሶሞ ኬኤዛንዳጉዲ ዒዛኮ ማዳ ዓሶ ዳኬኔ፤ ጋዓንቴ ዓሳ ዒኣካ ሙካኒ ኮይባኣሴ። 4 ዴካፓ ካኣቲ ላሚ ሃሃ ሜሌ" ማዳ ዓሴ ዒኤሊ"ንቴ ዓሶሞ፡- «ቡዋ ጌማይንታ ሃሃ ማሌ" ባይያ ታ ሹኪ ሙዖ ገኣጊሹኔ፤ ቢያ ባካ ገኣጊያ ማዒሢሮ ዒፖ ቤዞ፤ ታ ማኣሪ ሙኩዋቲ ጎዑዋቲ» ጌይ ዳኬኔ። 5 ዒኤሊ"ንቴ ዓሳ ጋዓንቴ ዒኤሊ"ዖ ቦሂ ዛላ" ጎሺዳ፤ ዓቲ" ዓሳ ሃሃ ኮርሞይዳ ዓኣዴኔ፤ 6 ሃንጎዋታ ሃሃ ከኣቶ"ና ሙኬ ዓሶንሢ ዓርቃዖ ጳርቂ ቦርሲሲ ሃሃ ሜታሲ ዋዲያ ዋዴኔ። 7 ዴያሮ ካኣታ"ሢ ዳጋዳዖ ፔኤኮ ፖኦሊሶ ዳኪ ዴንሢ ከኣቶ" ዓሶንሢ ዋዴዞንሢ ዋዲ ባይዚ ካታሞዋ ዒያቶኮ ታሚና ሚቹኔ። 8 ዴካፓ ካኣቲ ማዳ ዓሶሞ፡- «ዒፖ ሙዓ ገኣጊንቴኔ፤ ዒኤሊ"ንቴ ዓሳ ጋዓንቴ ኮይሱዋ ዓሴ ማዒ ጴዴሢሮ፤ 9 ጎይያ ኬሰኪጋፓ ዴንቄ ዓሴ ቢያ ዒፖ ሙዖ ቤዞ ዒኤሊ"ዋቲ» ጋዓዛ፤ 10 ማዳ ዓሳ ጎይያ ኬሰኪ ዴንቄ ዓሶ ኮኩንታ ፑርቶንታ ቢያሢ ቡኩሲ ዒፖ ማኣሮ ሾኦጮና ኩንሢ።

11 «ዴካፓ ካኣቲ ዒኤሊ"ንቴ ሾኦጮ ዛጋኒ ጌሌ ዋዶ"ና ፔቲ" ዒፒ ማኣዖ ማይንቲባኣ ዓሴ ዴንቃዖ፤ 12 «ታ ቤኤሊ"! ዒፒ ማኣዖ ኔ ማይንቲዋዖ ሃይካ ጌላኒ ዋይቲ ዳንዳዒይ?» ጋዓዛ፤ ዓሢ ጋዓንቴ ዚቲዮ ጌዔኔ፤ 13 ካኣቲ ማዳዞንሢሞ «ሃያኮ ኩጮና ቶኮና ቱኪ"፤

† 21:44 ፔቲ" ፔቲ" ማፃፃፓ ፓይ. 44 ጌዳ" ቃሳ"ኔ፤ ዒኣካ ዓኣ ማሊፃ ሉቃ. 20፥18 ጌዳ" ዓኣዞ ማላኔ።

ከሴ" ካሮ"ይዳ ዱሞ ቤዛ ከኤሩዋቴ፤ ዒኢካ ዒ ዩኤኪ፥ ሜታዲ ዓቺ ዳዓንዳኔ።»

¹⁴ «ሚርጌ ዓሲ ዔኤሊ"ንቴኔ፤ ዶኦሪንቴ ዓሳ ጋዓንቴ ዳካ"ኬ» ጌዔኔ።

ጌኢራ ጨጌሢ ዛላ ያኦጨንቴ ያኦጨሢ

(ማር. 12፥13-17፤ ሉቃ. 20፥20-26)

¹⁵ ዩካፓ ፔርሴ ዓሳ ከሰኪ ዴንዲ፥ ዩሱሴ ጌሰታ ጌኤዘና ዎዲ" ዔያታ ፒሪ ዓርቃንዳቴያ ዎላ" ዘርታዎ፥ ¹⁶ ዔያቶኮ ጌንያ ሃንታ ናኦቶ"ና ሄሮዲሴ ዛላ"ፓ ማዔ ዓሶና ዩሱሴ ባንሢ ዳኪ፡- «ዔርዛሢሃ! ኔኤኒ ጎኔ ዓሲ ሃሣ ያኦሲ ጎይያዎ ጎኦዋና ዔርዛሢ ዩያጉዲ ሃሣ ያናኣ ኔ ዱማሱዎዎ፥ ቢያሢ ሄኮ ኔ ዛጋሢ ኑ ዔራኔ፤ ¹⁷ ኑሞ ሂንዳ ከኤዜ፤ ዓይጎ ኔኤም ማላይ? ሮሜ ዓጮ" ካኣቲሞ ጌኢራ ጨጌንዶሞ ሃሾ"ንዶይ?» ጌዔኔ።

¹⁸ ዩማና ዩሱሴ ዔያቶኮ ጌኖ ማሊያ ዔራዎ፡- «ዒንሢ ያሎ"ቱዎዎ ፔና ያሎ"ኬ ጋዓ ዓሳ! ዓይጎር ጌኤሲና ታና ዒንሢ ፒራኒ ኮዓይ? ¹⁹ ጌኢር ጨጎ ሚኢሾ ሂንዳ ታና ዳውዋቴ» ጋዓዛ፥ ዔያታ ፔቴ" ሹቺ ቢራ ዒዛም ዔኪ ሙኬኔ። ²⁰ ዩማና ዒዚ፡- «ሃኖ" ሚኢሹሎይዳ ዓኣ ዓውካሮና ያኣፒንቴ ሱንያና ያኦርዳይ?» ጌዔኔ።

²¹ ዔያታ፡- «ሮሜ ዓጮ" ካኣቲሲኬ» ጌዔኔ።

ዩካፓ ዒዚ ማሃዎ፡- «ሂዴቶ ሮሜ ዓጮ" ካኣቲሲ ካኣቲሞ፤ ያኦሲሲ ያኦሲሞ ዒንጉዋቴ» ጌዔኔ።

²² ዔያታ ዩያ ዎይዛዎ ዲቃቲ ሄርሺ፥ ዒዛ ሃሺ" ዴንዴኔ።

ሃይቄ ዓሲኮ ዔቂሢ ዛላ

(ማር. 12፥18-27፤ ሉቃ. 20፥27-40)

²³ ዩኖ ከሎ"ና፡- «ሃይቄ ዓሲ ዔቂዎሴ» ጋዓ ሶዶቄ ዓሳ ዩሱሴ ኮይላ" ሙኪ ሂዚ ጌዒ ያኦጨኔ፡- ²⁴ «ዔርዛሢሃ! ሙሴ <ፔቴ" ዓሲ ላኣሊ ዔካዎ ሾውዎዎ ሃይቄቶ፥ ጌኤዚ ሃይቄሢ ማቾ ዔኪ ዒዛ ዳካላ ናይ ሾዎንጉ ጌዔኔ። ²⁵ ኑ ኮይሎ"ይዳ ዎሊኮ ጌርሲንሢ ማዓ ላንካይ ዓሲ ዓኣኔ፤ ዩያቶኮ ቶይዳሢ ላኣሊ ዔካዎ ሾውዎዎ ሃይቄም ሄሌ ጌኤዛሢ ማቾ ዒዛኮ ዔኬኔ፤ ²⁶ ዩይ ዔኬሢ ቶይዳም ናይ ሾውዎዎ ሃይቄኔ፤ ዩያይዴ ጎይሢ ላኣሌላ ላንካሳሢም ሄላ"ዛ ዒዚያ ሾውዎዎ ሃይቄኔ። ²⁷ ዩካፓ ጋፒንያይዳ ላኣሌላ ሃይቄኔ። ²⁸ ዓካሪ ቢያሢ ዒዛ ዔኬሢር ጋፒንያና ሃይባ"ፓ ዓሳ ዔቃኣና ዩና ዎያኮ ማቾ ማዓንዳይ?» ጌዔኔ።

29 ዩሱስ ማሃዎ፡- «ዲንሢ ጌኤዡ ማዓኦፖና ያኦሲኮ ዋልቆና ዕሩዋኣሢሮ ደቢንታኔ፤ 30 ሃይቢዳፓ ዓሲ ዕቄሢኮ ጊንፃ ጫሪንጮይዳ ዓኣ ያኦሲ ከኢታንቸጉዲ ማዓኔ፤ ዕኩዋሴ ሃሣ ሎዑዋሴ። 31 ሃይቦ"ይዳፓ ዕቃ ዓሶ ዛሎ" ያኦሲ ዲንሢም ከኤዜሢ ዲንሢ ናባቢባኣዓዳ? 32 ዒዚ ታኣኒ ዓብራሃሜ ያኦሲ፡ ዪሳኣቄ ያኦሲ ሃሣ ያይቆኑቤ ያኦሲኬ» ጌዔኔ፤ ይያሮ ያኦሲ ሼምፖና ናንጋ ዓሶ ያኦሲ፤ ሓይቄቶዋ ናንጊና ናንጋ ዓሶ ያኦሲኬ» ጌዔኔ። 33 ዴራ" ይያ ዋይዛዎ ዒዛኮ ዕርዚያና ዲቃቲ ሄርሼኔ።

ቢያፓ ባሼ ማዕ ዓይሢያ

(ማር. 12፡28-34፤ ሉቃ. 10፡25-28)

34 ዩሱስ ሶዶቄ ዓሶ ጎዖንዶ ጎይሢ ባይዚሴሢ ዋይዛዎ ፔርሴ ዓሳ ፔቴ"ይዳ ሙኪ ቡኬኔ፤ 35 ዔያቶይዳፓ ፔቴ" ሙሴ ዋጎ ዕርዛሰኬይ ዩሱስ ዋዚ ጋዓቴያ ዋይዛኒ፡- 36 «ዕርዛሢያ! ቢያፓ ባሼ ዓይሢያላ ዋኖዳይ?» ጌዒ ያኦጮኔ፤

37 ዩሱስ ዒማ"ና፡- « <ያኦሲ ኔኤኮ ጎዳ ጉቤ ዒናፓ፡ ጉቤ ሼምፓፓ፡ ጉቤ ማሊፃፓ ናሽኬ» 38 ቢያፓ ባሼ ማዕ ቤርታኣ ዓይሢያ ይኖኬ። 39 ሃሣ ይኖ ማላ ላምዓሳ ዓይሢያ <ዓሲ ቢያ ዓዳ" ኔና ማሂ ናሽኬ» ጋዓኔ፤ 40 ሙሴ ዋጎና ያኦሲ ማሊያ ከኤዛዞንሢኮ ዕርዚያ ይንሢ ዓይሢያ ጋራ ዓኣያኬ» ጌይ ማሄኔ።

ሜሲሔ ዛሎ" ያኦጪንቴ ያኦጪሢ

(ማር. 12፡35-37፤ ሉቃ. 20፡41-44)

41 ፔርሴ ዓሳ ቡኪንቲ ዓኣንቴ ዩሱስ ዔያቶ ሂዚ ጌዒ ያኦጮኔ፤ 42 «ሜሲሔ ዛሎ" ዲንሢ ዋዚ ጋዓይ? ዒ ያናይ ዲንሢም ማላይ?» ጋዓዛ፡ ዔያታ ማሃዎ፡- «ዒ ዳውቴ ናይኬ» ጌዔኔ።

43 ዩሱስ ዔያቶም፡- «ሂዴቶ ዳውቴ ዓያና ጌኤሺ ዒዛ ማሊሴም፡ ታኣኮ ጎዳ» ጌዒ ዋይቲ ዒዛ ዔኤሌ"ይ?

44 ዳውቴ፡ <ናንጊና ናንጋ ጎዳ ታ ጎዳሢም፡

ኔኤኮ ሞርኮ ታ ኔና ባሺሳንዳያ ሄላ"ንዳኣና

ታኣኮ ሚዛቆ ዛላ" ዴዔ» ጌዔኔ።

45 ይያሮ ዳውቴ <ታ ጎዳሢ» ጌዒ ዒዛ ዔኤሌ"ቶ ዋይቲ ዳውቴኮ ናይ ማዓኒ ዒ ዳንዳዓይ?» ዩሱስ ጋዓዛ፡ 46 ዒማ"ና ፔቴ"ታዖ ዔኤቢ ማሂ ከኤዛኒ ዳንዳዔ ዓሲ ባኣሴ። ይኖ ከሎ"ይዳፓ ዓርቃዖ ጫርቄ ዒዛ ዔኤቢ ያኦጮ ዓሲያ ባኣሴ።

23

ዩሱስ ሙሴ ዋጎ ዔርዛ ዓሶና ፔርሴ ዓሶና ቦሂ ጌስቱ ጌኤዘ
(ማር. 12፡38-40፤ ሉቃ. 11፡39-51፤ 20፡45-47)

¹ ዩሱስ ዩሱሴ ዴሮ"ና ዒዛኮ ጊንዖ ሃንታዞንሢናሞ፡- ² «ሙሴ ዋጎ ዔርዛ ዓሶና ፔርሴ ዓሶናኩ ሙሴጉዲ ዋጎ ዔርዛኒ ቢታንቶ ዓኣኔ፤ ³ ዩያሮ ዒንሢሞ ዔያታ ጋዓ ባኮ ማዲዋቱ፤ ሃሣ ካፑዋቱ፤ ጋዓንቱ ዔያታ ጋዓሢጉዲ ፔኤሮ ማዲዋኣሢሮ ዔያቶጉዲ ማዲፖቱ። ⁴ ዔያታ ሚርጌ ዴኤሢ ሃሣ ሜታሳ ኬዲ ዓሲ ኬዲሳኔ፤ ዔያታ ፔኤሮ ጋዓንቱ ኩቻ ካኣማኒያ ኮዑዋሴ። ⁵ ዔያታ ማዲ ማዲ" ቢያ ዓሲ ዛጎሞ ጌዒኬ፤ ዩያሮ ካኣኩ ዛሎ" ባኮ ፃኣፒ ቶኦካ" ሓሣ ቃሳ" ቱኮ" ዓፒሎዋ ዔያታ ኮሺ" ዳልጊሻኔ፤ ሃሣ ዓፒሎኮ ማጫሮዋ ያደሳኔ፤ ⁶ ሙዖ ቤዘይዳ ቦንቹንታ ቤሲ፤ ዓሳ ቡከንታ ቤዘይዳኣ ቤርቶ ዛላ" ዴዒኒ ኮዓኔ። ⁷ ዩያጉዲ ሃሣ ቦኦኮ" ባኣኮ"ይዳ ኮሺ ዔኤሊ"ሢ ዔኤሊ"ንታኒና «ዔርዛሢ» ጌይንቲ ዔኤሊ"ንታኒያ ኮዔኔ። ⁸ ዒንሢ ጋዓንቱ ሄርሺንቲሮ «ዔርዛሢ» ጌይንቲ ዔኤሊ"ንቲፖቱ፤ ዒንሢኮ ዔርዛሢ ፔቱ" ሌሊ ማዓዛ ዒንሢ ቢያሢ ዋለኮ ጌርሲንሢኬ። ⁹ ጫሪንጮይዳ ዒንሢኮ ፔቱ" ዓዴ ሌሊ ዓኣሢሮ ሳያይዳ ያና ማዔቶዋ ያኦሲፓ ባሼ ማሂ «ዓዴ» ጌይ ዔኤሊ"ፖቱ። ¹⁰ ዒንሢኮ ባሼ ዔራሢያ ከሪሰቶሴ ሌሊ ማዔሢሮ «ባሼ ዔራሢ» ጌዒ ዔኤሊ"ንቲፖቱ። ¹¹ ዒንሢ ባኣካ" ቢያፓ ዑሣ ዓኣዴ፤ ሱኡጌ ማዔሢ ዒንሢኮ ዴማ" ማዒ ማዲያ ማዖንጎ። ¹² ፔና ዴጊዳሢ ዳውሲንታንዳኔ፤ ፔና ሂርኪዳሢ ጋዓንቱ ዴግግ ጋዓንዳኔ» ጌዔኔ።

¹³ ሃሣ ዩሱሴ፡- «ዒንሢ፤ ዒሎ"ቱዋዖ ፔና «ዒሎ"ኬ» ጋዓ ሙሴ ዋጎ ዔርዛ ዓሶና ፔርሴ ዓሳ! ዓሳ ጫሪንጮ ካኣቱዋይዳ ጌሉዋጉዲ ዓሶኮ ካሮ" ዒንሢ ዋዲሢሮ ዒንሢና ባዴዔ! ዒንሢ ዒንሢሮ ጌሉዋሴ፤ ሃሣ ጌላኒ ኮዓ ዓሶዋ ዒንሢ ጌልዙዋሴ።»

[¹⁴ «ዒንሢ ዒሎ"ቱዋዖ ፔና «ዒሎ"ኬ» ጋዓ፤ ሙሴ ዋጎ ዔርዛ ዓሶና ፔርሴ ዓሳ ዒንሢ ባዴዔ! ዒንሢ ሓይቁ ላኦሎኮ ማኣሮ ዒንሢ ቡራያታዖ ዓሲ «ያኦሲ ሺኢቃኔ» ዒንሢ ጎዖንጎ ጌዒ ያደሲ ሺኢዲሢ ዒንሢ ሺኢቃኔ፤ ዩያሮ ፑርታ ዋጌ ዒንሢዳ ዋጊንታንዳኔ።] *

23:5 ማቴ. 6፡1፤ ፓይ. ማፃ 15፡38፤ ላሚ. ዋማ 6፡8። **23:11** ማቴ. 20፡26-27፤ ማር. 9፡35፤ 10፡43-44፤ ሉቃ. 22፡26። **23:12** ሉቃ. 14፡11፤ 18፡14።

* **23:14** ፔቱ" ፔቱ" ማፃኣፓ ፓይ. 14 ጌዳ" ቃሳ"ኔ፤ ቃኣሉ"ላ ማር. 12፡40 ጌዳ" ዓኣዘ ማላኔ።

15 «ዲንሢ ዲሎ"ቱዋዎ ፔና ዲሎ"ኬ ጋዓ፥ ሙሴ ዋጎ ዔርዛ ዓሶና ፔርሴ ዓሳ! ፔቱ" ዓሲ ዓይሁዴ ካኣዡ ካኣሽኪሳኒ ባዞ" ዋኣዎና ሳዎናይዳ ዲንሢ ሃንቲ፥ ካኣዡኣ ጌልዜሢኮ ጊንፃ ዲንሢዳፓ ባሼና ጋፒንዎ ኬላ" ፑርታና ዬይ ዋጊንታንዳጉዲ ዲንሢ ማሃሢሮ ዲንሢ ባዴዔቲ።

16 «ሃይ፥ ዲንሢ ዓኣፓ ባይቄ ዓርኖ ማዔ ዓሳ! ዲንሢና ባዴዔ! <ዓሲ ጌኤዡ ማኣሮ ዔኤሊ" ጫኣቄቲ ዔኤቢባኣሴ፤ ጋዓንቲ ጌኤዡ ማኣሮኮ ዋርቆ ዔኤሊ" ጫኣቄቲ ቶላ" ካራ ባኣሴ> ዲንሢ ጋዓኔ፤ 17 ዲንሢ ዔኤያ ሃሣ ዓኣፓ ባይቄ፥ ዓርኖ ማዔ ዓሳ! ዋርቆና ዋርቃ ያኣሲም ዲማዴያ ማዓንዳጉዲ ማሃ ጌኤዡ ማኣሮናይዳፓ ዋና ባሼዳይ? 18 ዬያጉዲ ሃሣ <ዓሲ ያኣሲም ሚቺ ዲንጊ ካኣሽኮ ቤዞ ዔኤሊ" ጫኣቄቲ ዔኤቢባኣሴ፤ ጋዓንቲ ያኣሲም ሚቺ ዲንጎ ቤዞይዳ ዓኣ ዲንጎና ባኮ ዔኤሊ" ጫኣቄቶ ቶላ" ካራ ባኣሴ> ዲንሢ ጋዓኔ። 19 ሃይ ዲንሢ ዓኣፓ ባይቄ ዓሳ! ያኣሲም ዲንጎ ባኮና ዲንጎ ባኮ ዲማዴያ ማሃ ሚቺ ዲንጎ ቤዞናይዳፓ ዋና ባሼዳይ? 20 ዬያሮ ያኣሲም ዲንጎ ባኮ ዲንጎ ቤዞ ዔኤሊ" ጫኣቃሢ ዲንጎ ቤዞና ዔዞ ዐፃ ዓኣ ዲንጊንቲ ባኮ ቢያሢ ዔኤሊ" ጫኣቃኔ። 21 ጌኤዡ ማኣሮ ዔኤሊ" ጫኣቃሢ ጌኤዡ ማኣሮና ጋርይዳና ጋ ያኣዛሢና ዔኤሊ" ጫኣቃኔ። 22 ጫሪንጮ ዔኤሊ" ጫኣቃሢ ያኣሲ ዴዔ፥ ካኣቱዋ ያይቶንታ ዲኢካ ዴዔሢንታ ዋላ" ዔኤሊ" ጫኣቃኔ።

23 «ዲንሢ ዲሎ"ቱዋዎ ፔና ዲሎ"ኬ ጋዓ፥ ሙሴ ዋጎ ዔርዛ ዓሶና ፔርሴ ዓሳ፥ ዲንሢ ባዴዔቲ! ዳኮ" ዲማ ዲማ ሳወቃ ዴኤሽይዳፓ ቢያ ታጳይዳፓ ፔቱ"ማ ዲንጎ ዋጎና ዲንሢ ዲንጋኔ፤ ጋዓንቲ ዓይሢንቲ ዋጎ ጊዳ" ዓኣ ዴኤፓ ባኮ ዲንሢ ሃሻ"ኔ፤ ዬይ፡ፒዜ ዋጊሢ፥ ዳቤሢም ዓቶም ጌይሢና ጉሙርቂንቲሢናኬ፤ ዬያቶ ዲንሢ ቦሂኔ። ዬንሢ ዳኮ" ባኮንሢ ዲንሢ ሃሺ"ባኣዎ ዬያ ባኮዋ ዲንሢ ማዳንዳያ ኮይሳኔ። 24 ዲንሢ ዓኣፓ ባይቄ፥ ዓርኖ ማዔ ዓሳ! ዑሽካ ባኮይዳፓ ዉኖጉዴ ዳኮ" ባኮ ዲንሢ ኬሲ" ኬኤራኔ፤ ጋኣላሢጉዴ ዴኤፓ ባኮ ጋዓንቲ ዲንሢ ዔኤዲ ዔኤዳኔ።

25 «ዲንሢ ዲሎ"ቱዋዎ ፔና ዲሎ"ኬ ጋዓ ሙሴ ዋጎ ዔርዛ ዓሶና ፔርሴ ዓሳ፥ ዲንሢና ባዴዔ! ዋኣዎ ዑሽኮ ዓንዶና ካሃ ሙዎ ዓንዶናኮ ዙሎ" ዲንሢ ማሰኪ ጌኤሻኔ፤ ጋራ ጋዓንቲ ቡሪሢና ዲኤዲሞና ዲንሢኮ ኩሜ"ያኬ፤ 26 ሃይ ኔ ዓኣፓ ባይቄ ፔርሴ ዓሢ! ቤርታዲ ዋኣዎ ዑሽኮ ዓንዶና ካሃ ሙዎ ዓንዶናኮ ጋሮ ማሰኪ ጌኤሽ፤ ዬያይዴቶ ዓካሪ ዙሎ" ዛላ"ኣ ጌኤሽ ማዓንዳኔ።

27 «ዲንሢ ሃይ ዲሎ"ቱዋጥ ፔና ዲሎ"ኬ ጋዓ፥ ሙሴ ዋጎ ዔርዛ ዓሶና ፔርሴ ዓሳ! ዙሎ" ዛላ" ቦኑሪንቶና ሜኤቺ ሚዛጺሶናያ ጋራ ጋዓንቴ ሃይቄ ዓሲ ሜጌሢና ሌሲ"ና ኩሜ"ያ፥ ዱኡፒ ዲንሢ ማላሢሮ ዲንሢና ባዴዔቴ! 28 ዲንሢ ዙሎ"ና ዓሶም ጌኤሺ ማላኔ፤ ጋራ ዲንሢኩ ጋዓንቴ ሄርሺንቲና ፑርቱሞና ኩሜ"ያኬ።

29 «ዲንሢ ዲሎ"ቱዋጥ ፔና ዲሎ"ኬ ጋዓ፥ ሙሴ ዋጎ ዔርዛ ዓሶና ፔርሴ ዓሳ ዲንሢና ባዴዔ፤ ያኦሲ ማሊያ ኬኤዛ ዓሶኮ ዱኡፖ ኬልቄ ኮሺ" ኮሺ"፥ ሃሣ ጌኤዙ ዓሶኮ ዱኡፖ ፓልሚሲ ኮሺ" ኮሺ"፥

30 ኢ ዓደንሢ ዋድ"ናታቴ፥ ያኦሲ ማሊያ ኬኤዛ ዓሶ ዋዲያይዳ ኑ ጌላዓኬ» ዲንሢ ጋዓኔ። 31 ሃይሾ ሃሢ ዲንሢ ያኦሲ ማሊያ ኬኤዛ ዓሶ ዋዴ ዓሶኮ ናኦቶ" ማሊያ ዲንሢሮ ዲንሢ ማርካዳኔ።

32 ዬያሮ ዓደንሢ ዲንሢኮ ዓርቄ ዛኦሮ ዲንሢ ዑዑራዋቴ! 33 ሃይ ዲንሢ ሾኦዙ፥ ሾኦዙኮ ናኦታ" ዲንሢ ሃይ! ጋፒንያ ታሞ ዋጎይዳፓ ዋይቲ ዲንሢ ቶላ"ንዳይ? 34 ዬያሮ ያኦሲ ማሊያ ኬኤዛ ዓሶ፥ ዔሮ" ዓሶንታ ዔርዛ ዓሶ ዲንሢ ባንሢ ታ ዳካንዳኔ፤ ዔያቶይዳፓ

ፔቴ" ፔቴ"ሢ ዲንሢ ዋዴንዳኔ፤ ሃሣ ፔቴ" ፔቴ"ዘንሢ ዲንሢ ሱፃንዳኔ፤ ዓቴ"ዘንሢ ሃሣ ዲንሢኮ ቡኪንቶ ቤዘይዳ ዢራፓና ዲንሢ ጳርቃንዳኔ፤ ዔያቶ ዔዲ ፔቴ" ካታማ"ፓ ሜሌ" ካታማ ዲንሢ ዳውሲ ዳካንዳኔ፤ 35 ዬያ ዛሎ"ና ጌኤዙሢ ዓኦቤኤሌ ሃይሶ"ይዳፓ

ዓርቃ፤ ጌኤዙ ማኦሮና ያኦሲም ዲንጎ ባኮ ሺኢሾ ቤዘናኮ ባኦካ" ዲንሢ ዋዴ፥ ባራኪዮ ናኦዚ" ዛካሪያሴ ሃይሶ" ሄላ"ንዳኦና ሳያይዳ ሃይቄ ጌኤዙ ዓሶኮ ሱጉያ ዛሎ" ዲንጌንታ ሜቶ" ዲንሢ ዔካንዳኔ።

36 ጎኔ ታ ዲንሢም ጋዓኔ፤ ዬይ ሜታ" ሃሮ" ዋድ" ዓሶ ሄላ"ንዳኔ» ጌዔኔ።

ዬሩሳላሜም ላቲ" ኬኤዘና ባኮ

(ሉቃ. 13፥34-35)

37 ዬካፓ ዬሱሴ፦ «ዬሩሳላሜ! ኔኤኒ ያኦሲ ማሊያ ኬኤዛዘንሢ ዋዴዜሌ፥ ሃሣ ኔ ባንሢ ያኦሲ ዳካ ኪኢቶ" ዓሶ ሹጮና ዱዓዜሌ! ኮይዳ ፔኤኮ ጋኦዘ ዴማ" ናኦቶ" ቡኩሲ ዓርቃሢጉዲ ታኦኒ ኔ ናኦቶ" ፔቴ"ይዳ ቡኩሳኒ ሚርጌና ኮዔንቴ! ኔ ዬያ ዒፄኔ።

38 ዓካሪ ሃኦዛጉዋቴ፥ ያኦሲ ሃሺ"ም ዲንሢኮ ጌኤዙ ማኦራ ባዓ ማሲ ዓታንዳኔ። 39 ታ ዲንሢም ጋዓኔ፦ ሩካዳ ሱንፆና ሙካሢ ዓንጂንቴያኬ» ዲንሢ ጋዓንዳያ ሄላ"ንዳኦና ላሚ ዲንሢ ታና ዴንቃዓኬ» ጌዔኔ።

23:27 ዳኪ. ማዴ" 23፥3። 23:33 ማቴ. 3፥7፤ 12፥34፤ ሉቃ. 3፥7። 23:35

ማገፒ. ማፃ4፥8፤ 2ካኦቶ". ማ 24፥20-21። 23:38 ዔር. 22፥5። 23:39 ዓይኑ.

118፥26።

24

ጌኤዡ ማእራ ደዓንዳሢ ዩሱፊ ከኤዜሢ

(ማር. 13፡1-2፤ ሉቃ. 21፡5-6)

¹ ዩሱፊ ጌኤዡ ማእራፓ ከሰከ ዳንዳኣና ዒዛኮ ጊንፆ ሃንታ ናኣታ" ጌኤዡ ማእራ ማዢንቴ ጎይፆ ዳዋኒ ዒዛ ኮራ ሙከኔ።

² ዒዚ ጋዓንቴ፡- «ሓያ ዒንሢ ሲያ ዛጋ? ጎኔ ታ ዒንሢህም ጋዓኔ፤ ሓይ ሹጮና ከልቂንቴ ማዢንቴ ማእራ ፔቴ" ሹቺታፆ ዓቱዋንቴ ደዓንዳኔ» ጌዔኔ።

ዓጮ"ኮ ጋፒንፃ ማዓንዳ ባ-ኮ

(ማር. 13፡14-23፤ ሉቃ. 21፡20-24)

³ ዩሱፊ ዛይቶ ሪሚቶ ዱኮ"ይዳ ዴዒ ዓኣንቴ ዒዛኮ ጊንፆ ሃንታዞንሢ ሌሊ ዒዛ ኮይላ" ሙከፆ፡- «ሂንዳ ኑም ከኤዜ፤ ኔ ሃይ ጋዓ ባካ ሲያ ዓይዲ ማዓንዳይ? ኔኤኮ ማዒ ሙከፆና ዓጮ"ኮ ጋፒፆናኮ ማለታ ማዓንዳ ባካ ዓይጎዳይ?» ጌዔኔ።

⁴ ዩሱፊ ማሃፆ፡- «ፆኦኒያ ዒንሢ ዳቢሹዋጉዲ ዒንሢና ዔሩዋቴ፤ ⁵ ሚርጌሢ፡- «ታኣኒ ሜሲሔኤ!» ጌይሢና ታ ሱንፆ ዔከ ሙከ፤ ሚርጌሢ ዳቢሹንዳ። ⁶ ዒንሢኮ ዑከኔ ፆለንታ ፆልዚ ዒንሢ ዋይዘንዳ፤ ሃሃ ፆልዚኮ ሃይሴያ ዒንሢ ዋይዘንዳ፤ ዩይ ሲያ ማዓኒ ኮይሳያታሢር ዲቃቴፖቴ፤ ጋፒንፃ ጋዓንቴ ሃጊከ። ⁷ ዴራ" ዴር"፤ ካኣታ" ካኣቶ" ፆለንዳ፤ ዴማ ዴማ ዓጮ"ይዳ ናይዚና ሳዓ ዓጊፀሢና ማዓንዳ። ⁸ ጋዓንቴ ዩይ ሲያ ሹይቺኮ ቤርታ ቆፂ"ፆ ጉዴያከ።

⁹ «ዬኖ ዋዶ"ና ሜቶም ዓኣሢ ዒንሢ ዒንጎንዳ፤ ዋዲያ ዋዶንዳ፤ ታ ሱንፆር ዓሲ ሲያና ዒዒንቴያ ዒንሢ ማዓንዳ።

¹⁰ ዩያር ሚርጌ ዓሳ ዳቢንታንዳ፤ ሃሃ ፔቴ"ይ ባጋሢ ዓኣሢ ዒንጋንዳ፤ ዋሊ ዒዲያ ዒፃንዳ። ¹¹ ሚርጌ ሉኡቂ ፆኦሲ ማለሢ ከኤዛያ ማላ ዓሲ ዔቂ ሚርጌ ዓሶ ዳቢሹንዳ። ¹² ቸርቱም ሚርጋንዳሢር ሚርጌ ዓሶኮ ናሹማ ባይቃንዳ፤ ¹³ ዴንዲ ጋፒንፆ ሄላ"ንዳኣና ዶዴሢ ጋዓንቴ ዳቃንዳ። ¹⁴ ዴር" ሲያም ማርካ ማዓንዳጉዲ ሃይ ፆኦሲ ካኣቱም ኮዡ ሃይሳ ዓጮ" ሲያይዳ ከኤዚንታንዳ፤ ዩካፓ ዓጮ"ኮ ጋፒንፆ ሙከንዳ።» ጌዔኔ።

¹⁵ ዩካፓ ዩሱፊ፡- «ፆኦሲ ማለፆ ከኤዛ ዳኣኔኤሌ ከኤዜ ጎይፆና ካኣዡ ዒኢሳ፤ ሻኣካ" ባኣዚ" ጌኤዡ ቤዞይዳ ማዲንታንቴ ዒንሢ ዛጋንዳ፤ ዩያ ናባባሢ ጳቂሦንጎ። ¹⁶ ዩኖ ዋዶ"ና ዪሁዳይዳ ናንጋ

ዓሳ ደኩ" ባንሢ በቱዋቱ፤ ¹⁷ ሹጮና ማዠና ማእሮኩ ዑያይዳ ዓኣ ዓሲ ከኤፃፓ ዔኤቢ ዔካኒ ከደ"ፓ፤ ¹⁸ ጎዡ በዛ ዓኣሢያ ዓፒሎ ፔኤኮ ዔካኒ ማኣሪ ዓኣደፖ። ¹⁹ ዬኖ ዋደ"ና ጎጾ ዒንዳሢና ደንሢሣ ላኣሎናም ባዴዔ፤ ²⁰ ዒንሢኮ በቲፃ ባርጊና ሃሣ ዓይሁደኮ ሃውሾ ከሎ"ና ማዑዋጉዲ ሸኢቁዋቱ። ²¹ ዬኖና ዓጫ" ማዢንቴሢዳፓ ዬኖ ከሎ" ሄላ"ንዳኣና ማዒ በቂባኣ ባኣዚ" ሃሣ ዩካፓ ጊንያይዳኣ በቃያባኣ ሚርጌ ዴኤፒ ሚታ ማዓንዳኔ። ²² ዬንሢ ከሎ"ንሢ ቃሚቁባኣና ማዒቶ ዓሲ ቢያ ዓቲንዲዋያታንቴኬ፤ ደኣሪንቴዘንሢ ዛሎ"ሮ ዬንሢ ከሎ"ንሢ ቃሚቃንዳኔ።

²³ «ዬኖና ያኦኒያ ሃይሾ፣ ሚሲሔ ሃካ ዓኣኔ!» ሃሣ «ዩካ ሶ ዓኣኔ!» ዒንሢም ጌዔቶ ጎኔኬ ጌይፖቴ። ²⁴ ዓይጎር ጌዔቴ ኪሪሰቶሴቱዋ፣ ፔና «ኪሪሰቶሴኬ» ጋዓ ዓሲና ሉኡዙሞና ያኦሲ ማለሢ ከኤዛያ ማላ ዓሲ ከሰካንዳኔ፤ ዔያቶም ዳንዳዒንቴቶ ያኦሲም ታናኬ ጋዓ ዓሶ ዳበሻኒ ዴኤፒ ዓኪ ባኣዚ" ሃሣ ዲማ ዲማ ማላታኣ ማዲ ዳዋንዳኔ። ²⁵ ዬያሮ ሃያ ቢያ በርታሲ ታ ዒንሢም ከኤዛኣኬ፤

²⁶ «ሃሣ ጊንሣ ሃኣዛጉዋቱ፣ ኪሪሰቶሴ ዓሲ ናንጉዋ ዳውሎ"ይዳ ዓኣኔ!» ዒንሢም ጎያናቴ ዒኢካ ዳንዲፖቴ፤ ሃይሾ፣ ዓኣሺንቴ በሰካ ዓኣኔ!» ዒንሢም ጎያናቴያ ጎኔኬ ጌይፖቴ። ²⁷ ዓይጎር ጌዔቶ ዜኤሊንሢ ጫሪንቺዳ ዜኤሊንሢዎ ዓባ" ከሰካ ካራ"ፓ ዳንዲ ጌላ ካራ" ጴዳሢጉዲ ዓሲ ናዓሢኮ ሙኪዩ ያዲ ማዓንዳኔ። ²⁸ ዔኤቢ ሃይቄ በሰካ ቢያ ሃምፑራ ቡኪንታኔ» ጌዔኔ።

ኪሪሰቶሴኮ ላምዓንሢ ሙኮ

(ማር. 13፡24-27፤ ሉቃ. 21፡25-28)

²⁹ ሃሣ ዬሱሴ ከኤዛያ፡- «ዬንሢ ሜታሢ ከሎ"ንሢኮ ጊንፃ በዘማና ዓባ" ዳማንዳኔ፣ ዓጊናኣ ፖዓዓኬ፣ ዡኦጋሢያ ጫሪንጫፓ ዲኢናንዳኔ፣ ጫሪንጫ ማዢንታ ቢያ ዓጊፃንዳኔ። ³⁰ ዬኖ ዋደ"ና ዓሲ ናዓሢኮ ማላታ ጫሪንጫይዳ ጴዳንዳኔ፤ ዓጮ"ይዳ ዓኣ ዓሳ ቢያ ዩኤካንዳኔ፤ ዓሲኮ ናዓሢያ ጫሪንጫ ሻኣሮና ማዒ፣ ዴኤፒ ቦንቾና ሙካንቴ ዔያታ ዒዛ ዛጋንዳኔ። ³¹ ዓማ"ና ዒዛኮ ኪኢታንቾ ዴኤፒ ዛዬና ዓጮ"ኮ ቢያ ዛሎ" ዒ ዳኬም ዔያታ ዳንዲ ዒዛም ደኣሪንቴዘንሢ ዓጫ" ማዒ ካራ"ፓ ቢያ ቡኩሳንዳኔ» ጌዔኔ።

24:17 ሉቃ. 17፡31። **24:21** ዳኣኔ. 12፡1፤ ዮሐ. ፪፡14። **24:26**

ሉቃ. 17፡23-24። **24:28** ሉቃ. 17፡37። **24:29** ዒሲ. 13፡10፤ 34፡4፤ ሂዚ. 32፡7፤ ዒዬ. 2፡10፤ 3፡15፤ ዮሐ. ፪፡12-13፤ ዳኣኔ. 7፡13፤ ዛካ. 12፡10-14፤ ዮሐ. ፪፡1፤ 7፡።

ጎዳኮ ሙኪያ ዳዋ ማላቶ"

(ማር. 13፡28-31፤ ሉቃ. 21፡29-33)

³² ሄሊ "ሳዖ ዩሱስ፡- «በሌሶ ሚጻላ ማላታ ማዒ ዒንሢም ዒርዛያ ማዖንጎ፤ ዒዞኮ ካኒፓ ዒሊ፡ ዒላሺ ኬሳ" ዎዶ"ና ዖጎሢ ዑኬሢ ዒንሢ ዒራኔ፤ ³³ ዩያጉዲ ዩያ ባኮ ቢያ ዒንሢ ዛጋ ዎዶ"ና ዒዛኮ ሙካ ኮሺ" ዑኬሢ ዒንሢ ዒራንዳኔ። ³⁴ ጎኔ ታ ዒንሢም ጋዓኔ፤ ዩይ ጉቤ ማዓንዳያ ሄላ"ንዳኣና ሃይ ሾይንታ ዓኣዳዓኬ። ³⁵ ጫሪንጮና ሳዖና ዓኣዳንዳኔ፤ ታኣኮ ቃኣላ" ጋዓንቴ ፔቴ"ታዖ ዓኣዳዓኬ» ጌዔኔ።

ጎዳ ሙካ ኬሎ" ዖኣኒያ ዒራዋያ ማዒያ

(ማር. 13፡32-37፤ ሉቃ. 17፡26-30)

³⁶ ዩሱስ ሃሣ፡- «ዩኖ ኬሎ"ና ዎዶ"ና ጋዓንቴ ዓደይዳፓ ዓታዛ ጫሪንጮ ኪኢታንኹ ማዔቶዋ ናዓሢያ ዒራዋሴ። ³⁷ ዓዳ" ኖሄ ዎዶ"ና ማዔሢጉዲ ዓሲ ናዓሢኮ ሙኪያ ዒማዲ ማዓንዳኔ፤ ³⁸ ዩኖ ዎዶ"ና ባይሲንቶ ዋኣዖኮ ቤርታ ኖሄ ዋኣዖ ካኣሚላ ጌላንዳ ኬሎ" ሄላ"ንዳኣና ዓሳ ሙዒያ ሙዒ ዑሽኪ ሃሣ ሎዒያ ሎዒ ዒኪያ ዒኪ ጌዔኔ። ³⁹ ባይሲንቶ ዋኣዖ ሙኪ ጉቤሢ ሙዒ ጋፒሳንዳያ ሄላ"ንዳኣና ዒያታ ዒሪባኣሢጉዲ ዓሲ ናዓሢኮ ሙካ ያዲ ማዓንዳኔ። ⁴⁰ ዩኖ ዎዶ"ና ላምዖ ዓሲ ጎሽዲ ዎላ" ጎሽካያ ማዓንዳኔ፤ ፔቴ"ሢ ዒውቴም ባጋሢ ዓታንዳኔ። ⁴¹ ላምዖ ላኣሊ ዎንሢ ዎላ" ዎዳንዳኔ፤ ፔቴ"ዛ ዒውቴም ባጌላ ዓታንዳኔ።

⁴² «ዓካሪ ዒንሢኮ ጎዳሢ ሙካ ኬሎ" ዒንሢ ዒራዋኣሢሮ ጴጪ ካፑዋቴ። ⁴³ ኮሺ" ዒራዋቴ፤ ፔቴ" ማኣሪኮ ዓዴ ዲሚና ዉሲ ዎማ ዎዴ ሙካንዳቴያ ዒራያ ማዔቶ ገንዑዎዖ ካፒ፡ ዉዞና ማኣሮ ቦኣኪሲንዱዋያታንቴ ዒራዋ ዓቲዖና ዉዛ ማኣሪ ጌላሢጉዲ፤ ⁴⁴ ዓሲኮ ናዓሢ ዒንሢ ማሊባኣ ዎዴና ሙካንዳሢሮ ጌኢጊንቴ ናንጉዋቴ» ጌዔኔ።

ጉሙርቂንታያና ጉሙርቂንቱዋ ማዒ ማዳዘንሢ ኮኣኪንሦ

(ሉቃ. 12፡41-48)

⁴⁵ ዩሱስ ሃሣ ኬኤዛዖ፡- «ፔኤኮ ማኣሮ ዓሶም ኮይሳ ዎዶ"ና ሙዖ ዒንጋንዳጉዲ ማኣሮ ዓዳሢ ፔኤኮ ማኣሮ ዓሶ ዑዖይዳ ሱኡጋሲ ጌሣ፡ ጉሙርቂንታያና ጪንጮ ማዔ ማዳሢ ዖናዳይ? ⁴⁶ ዩማይዲ ማዳንቴ ማኣሮ ዓዴ ሙኪ ዴንቄቶ፡ ዩይ ማዳሢ ጋላቲንታያኬ። ⁴⁷ ጎኔ ታ ዒንሢም ጋዓኔ፤ ዩያ ማዳሢ ማኣሮ ዓዴ፡ ቢያ ባኮኮ

ዑይዳ ሱኡጋሲ ጌሣንዳኔ። 48 ጋዓንቴ ዬይ ማዳሢ ፑርታ ማዒ፡ ፔ ዒኖና ታ ጎዳሢ ኔጊ ሙካንዳኔ፤ ጌዒ ማላዎ፡ 49 ዒዛና ዋላ" ማዳ ዓሶ ጳዲ ዓርቄቶ ሃሣ ማሢንታ ዓሶና ዋላ" ሙዒ ዑሽካያ ማዒቴ፡ 50 ዬያ ማዳሢኮ ዓዳሢ ዒ ዒሪባኣ ዎዴና ኬሊ"ናይዳ ሙከ፡ 51 ዬያ ማዳሢ ተቂ ተቂ ኬኤራንዳኔ፤ ዒዛኮ ናንጎ ቤዘዋ ጌኤሽቱዋዎ ፔና ጌኤሽ ማሊሳ ዓሶና ዋላ" ማሐንዳኔ፤ ዒኢካ ዬኤኪ ሃሣ ሜታዲ ዓቺ ዒ ዳዓንዳኔ።»

25

ታጳ ወዲር ናኣቶ'ንሢ ኮኣኪንሦ

1 ዬካፓ ዬሱሴ፡- «ዬኖ ዎዶ"ና ጫሪንጮ ካኣቱማ ጌሊዖ ጎይዎ ዑኡታ ጎይሣ ዒካኒ ፖዒ ዒከ፡ ኬሰኪ ካፔ ታጳ ወዲር ናይሰከንሢ ሓይሴጉዲ ማዓንዳኔ። 2 ዬንሢዳፓ ዶንጎ ወዲር ናኣቶ'ንሢ ቦኣዛ፡ ዓቲ" ዶንጎንሢ ጨንጫኬ፤ 3 ቦኣዛንሢ ፖዎ ፖሲሰሢ ዒካዎ፡ ጋዓንቴ ጋፓዛ ዋሃኒ ኮይላ" ለምባሢ ዒከባኣሴ። 4 ጨንጫንሢ ጋዓንቴ ፖዎ ፖሲሰሢንታ ሃሣ ጋፓዛ ዋሆንዶ ለምባሢ ኮይላ" ዓርቄ። 5 ዑኡታሢ ኔጌም ቢያሢ ጊንዓ ባሼም ጊንዒ።

6 «ዬካፓ ሳዓ ጊዲሚሽ ማዓዛ <ዑኡታሢ ሙኬ፡ ዒካኒ ኬሰኩዋቲ!» ጋዓ ዒኤሊ"ሢ ዋይዚንቴ። 7 ዬማና ወዲር ናኣቶ'ንሢ ቢያ ዒቃዎ፡ ፖሲሶ ባኮ ጊኢጊሼ፤ 8 ዒማ"ና ቦኣዛንሢ ጨንጫንሢ ኮራ ሓ ፖዓ ሃይቃኒ ዎኦታሢ፡ ዒንሢኮ ለምባሰካፓ ኑም ዒንጉዋቲራ!» ጋዓዛ፡ 9 ጨንጫ ወዲር ናኣቶ'ንሢ ማሃዎ ሓኡኮ ዓኣ ለምባሢ ኦኡና ዒንሢናም ጊዲንዲዋኣሢ፡ ዴንዲ ሻንቻ ዓሶይዳፓ ዒንሢ ሻሻንቁዋቲ፤ ጌዒ። 10 ዬማና ዒያታ ለምባሢ ሻንቃኒ ዴንዳዛ ዑኡታሢ ሙኬም ጊኢጊ ዓኣ ወዲር ናኣቶ'ንሢ ዒፖ ሙዎ ቤዘ ዒዛና ዋላ" ጌላዛ ካራ" ዎዲንቴ።

11 «ዓቲ" ወዲር ናኣቶ'ንሢ ሃሣ ዳካ" ኔጊ ሙካዎ፡ ሓዳሢዮ! ካር" ኑም ቡሌ"» ጋዓዛ፡ 12 ዒዚ ማሃዎ ሓኔ ታ ዒንሢም ጋዓኔ፤ ታ ዒንሢ ዒሩዋሶ» ጌዒ።

13 ዬካፓ ሃሣ ዬሱሴ፡- «ዬይ ማዓንዳ ዎዶ"ና ኬሎ"ና ዒንሢ ዒሩዋኣሢ ጊኢጊንቲ ካቶዋቲ» ጌዒ።

ማዳ ሃይሦ ዓሲ ኮኣኪንሢ

(ሉቃ. 19፡11-27)

14 ሃሣ ዬሱሴ፡- «ዶኦሲ ካኣቱማ ማዳ ዓሶ ዒኤሊ"፡ ዓኣ ባኮ ሓጉዋቲ» ጌይ ሜሌ" ዓጪ ዓኣዴ ፔቲ" ዓሲ ማላኔ፤ 15 ዒዚ

ዓሳዳኒ ዓቃያ ፔቴ" ፔቴ"ሢሞ ዳንዳዓሢጉዲ ፔቴ"ሢሞ ዳንጎ ሺያ ሹቺ ቢራ፤ ባጋሢሞ ላምዎ ሺያ ሹቺ ቢራ፤ ዓቴ"ሢሞ ሃሣ ፔቴ" ሺያ ሹቺ ቢራ ዒንጊ ጎይያ ዓሳዳኒ። ¹⁶ ዳንጎ ሺያ ሹቺ ቢሮ" ዓኬ ዓሢ ሚኢሾ ኮርሚ ጊዳ" ዳንጎ ሺያ ሹቺ ቢራ ሾይዜኔ፤ ¹⁷ ዬያጉዲ ሃሣ ላምዎ ሺያ ዓኬ ዓሢ ጊዳ" ላምዎ ሺያ ሾይዜኔ፤ ¹⁸ ዓቴ"፤ ፔቴ" ሺያ ሹቺ ቢሮ" ዓኬሢ ጋዓንቴ ማእሮ ዓዶኮ ሚኢሾ ዓካዎ ዓቴ ቦኦኪ ዱኡኬኔ።

¹⁹ «ሚርጌ ዎዴ ዴዓዎ፤ ዬንሢ ማዳ ዓሶንሢኮ ማእሮ ዳዳሢ ሙኪ፤ ማዳዘንሢሞ ዒንጌ ባኮ ዛጊሢ ዓርቄኔ፤ ²⁰ ዳንጎ ሺያ ሹቺ ቢሮ" ዓኬሢ ጊዳ" ዳንጎ ሺያ ሹቺ ቢራ ቃሲ" ዓኪ ሙኪ ዒንጋዎ፤ ሳዳሢዮ! ዳንጎ ሺያ ቢራ ታኣም ኔ ዓርቄ ጌዒ ዒንጌንቴ ሃኣዛጌ ሃሢ ዳንጎ ሺያ ሹቺ ቢራ ጊዳ" ታ ሾይዜኔ፤ ጌዓኔ። ²¹ ማእሮ ዓዴያ ቃራ ኔ ማዴኔ፤ ኔኤኒ ኮዦ፤ ጉሙርቂንታ ማዳሢዮ! ዳካ" ባኣዚ"ዳ ኔ ጉሙርቂንቴያ ማዴሢሮ ሚርጌ ባኣዚ" ኔ ዎይሣንዳጉዲ ታ ኔና ማሃንዳኔ፤ ሃኒ ሙኪ ታኣና ዎዛዴ፤ ጌዓኔ።

²² «ዬያጉዲ ሃሣ ላምዎ ሺያ ሹቺ ቢሮ" ዓኬ ማዳሢ ሙካዎ፤ ሳዳሢዮ! ላምዎ ሺያ ሹቺ ቢራ ኔ ታኣም ዒንጌያታንቴ፤ ሃሢ ሃኣዛጌ ጊዳ" ታ ላምዎ ሺያ ሾይዜኔ፤ ጋዓዛ፤ ²³ ማእሮ ዓዴያ ቃራ ኔ ማዴኔ፤ ኔኤኒ ኮዦ፤ ጉሙርቂንታ ማዳሢዮ! ኔ ዳካ" ባኣዚ"ና ጉሙርቂንቴያ ማዴሢሮ ሚርጌ ባኣዚ" ኔ ዎይሣንዳጉዲ ታ ኔና ማሃንዳኔ፤ ሃኒ ሙኪ ታኣና ዎዛዴ፤ ጌዓኔ።

²⁴ «ጋፒንፃ ፔቴ" ሺያ ሹቺ ቢሮ" ዓኬ፤ ማዳሢ ሙካዎ ሳዳሢዮ! ኔኤኒ ዜርቂባኣ ቤሲዳፓ ጮኦራያ ሃሣ ዜርቂባኣዎ ታይዛያ ሜታሳ ዓሲ ኔ ማዴሢ ታ ዒራኔ፤ ²⁵ ዬያሮ ታ ዒጊጪ ኔ ዒንጌ ሹቺ ቢሮ" ዓኪ ዓሳዲ ሳይዳዱኡኪ ካፔሢሮ ሃሢ ሃኣዛጌ ጌዓኔ።

²⁶ «ማእሮ ዳዳሢ ማሃዎ ሃይ ኔ ፑርታ፤ ሃሣ ቤልፃ ማዴሢ ሃይ! ታ ዜርቂባኣዎ ጮኦራያና ሃሣ ዜርቂባኣዎ ታይዛሢ ኔ ዒራያ ማዴቶ፤ ²⁷ ሚኢሾ ታኣኮ ኮርሚ ሾይዢ ዓሶም ሄኤዶ ኔ ዒንጌም፤ ታ ሾይቺና ዓካንዳያታንቴኪ» ጋዓዎ፤ ²⁸ «ዒዛይዳፓ ሚኢሾ ዓኪጋፓ ታጾ ሺያ ዳንጎ ቢሮ" ዓኣሢሞ ዒንጉዋቴ። ²⁹ ዓይጎሮ ጌዓቶ ዓኣ ዓሶም ጊዳ" ቃሲ"ንቴም ሚርጋንዳኔ፤ ባኣሢዳፓ ጋዓንቴ ዳካ" ዓኣማታዎ ዓቲዎ ዒውታንዳኔ። ³⁰ ሃያ ፓሡዋ ማዳሢ ጋዓንቴ ዙላ" ዱማ" ኬሲ" ኬኤሩዋቴ፤ ዒኢካ ዒ ዬኤኪ ሃሣ ሜታዲ ዓቺ ዳዓንዳኔ። » ጌዓኔ።

ዓጮኩ ጋፒንዖና ዋጊነታንዳ ዋሳ”

31 ዬሳይያስ ይሉሉ:- «ዓሲኮናዓሢ ፔኤኮ ኪኢታንቸ ቢያሢና ዋላ”
 ቦንቹንቲ ሙኪ፡ ቦንቸ ካኣቱም ያይቶይዳ ዳዓንዳኔ፤ 32 ዴራ”
 ቢያ ዬማና ዒዛ ቤርታ ቡኪንታንዳኔ፤ ዒዚያ ሄንቃ ዓሲ ማራቶ
 ዋኣርይዳፓ ቁራሢ፡ ዴራ ቁሪ ዴማሳንዳኔ፤ 33 ዬሳይያስ ማራቶ
 ሚዛቆ ዛላ”፡ ዋኣር ሻዉሎ” ዛላ” ዒቁሳንዳኔ። 34 ዬሮ ዋዶ”ና
 ካኣታ”ሢ ዒዛኮ ሚዛቆ ዛላ” ዓኣዘንሢ፡- «ዒንሢ ታ ዓዴ ዓንጄ
 ዓሳ፡ ሃጊ ሙኩዋቲ፤ ሳዓ ማፒንቲሢዳፓ ዓርቃዖ ዒንሢም ጊኢኔ
 ካኣቱምይዳ ጌሉዋቲ፤ 35 ዓይጎር ጌዔቶ ታኣጊ ናይዴም ታና ዒንሢ
 ሙኡዜኔ፡ ዴኤቢንቲም ታና ዒንሢ ዑሼኔ፤ ሃሣ ሸኣቹንሢም ታና
 ዒንሢ ዒኬኔ፤ 36 ታ ካላ”ዴም ታና ዒንሢ ማይሴኔ፡ ሃርጊንቲም ታና
 ዒንሢ ማይሢኔ፡ ቱኡቲማኣ ታና ዒንሢ ያኦጩኔ።»

37 «ጌኤዢንሢም ማሃዖ ሳዳሢዮ! ኔኤጊ ናይዲንቲም ኔና ኑ ዛጊ
 ዓይዴ ሙኡዜይ? ሃሣ ዴኤቢንቲም ዛጊ ዓይዴ ኔና ኑ ዑሼይ?
 38 ጊንሢ ሸኣቹም ኔ ሙኬም ዓይዴ ዛጊ ኔና ኑ ሸኣቹንሢም?
 ካላዴማኣ ዓይዴ ዛጊ ኔና ኑ ማይሴይ? 39 ዬያጉዲ ሃሣ ሃርጊያ
 ሃርጊንቲ፡ ቱኡቲያ ኔ ቱኡቲም ዓይዲ ኔና ኑ ያኦጩይ?» ጌዔኔ።
 40 ካኣታ”ሢ ማሃዖ፡- «ጎኔ ታ ዒንሢም ጋዓኔ፤ ሃንሢ፡ ታ ዓሳንሢዳፓ
 ፔቲ” ላኣፓሢም ዒንሢ ማዴሢ ታኣም ዒንሢ ማዴሢጉዲኬ»
 ጋዓንዳኔ።

41 «ዬሳይያስ ዒዛኮ ሻዉሎ” ዛሎ”ና ዓኣዘንሢም ሃሣ «ዒንሢ
 ጋዳንቁንቲዘንሢዮ! ዓላሄና ዒዛኮ ኪኢታንቸናም ጊኢጊንቲ፡
 ናንጊና ባይቁም ተምይዳ ታ ኮራፓ ዓኣዲዋቲ፤ 42 ዓይጎር ጌዔቶ
 ናይዴም ታና ዒንሢ ሙኡዚባኣሴ፡ ዴኤቢም ታና ዒንሢ ዑሼባኣሴ፤
 43 ሸኣቹንቁ ታ ሙኬም ዒንሢ ታና ሸኣቹንሢባኣሴ፤ ካላ”ዴማኣ
 ታና ዒንሢ ማይሴባኣሴ፤ ሃርጊያ ሃርጊ፡ ቱኡቲያ ታ ቱኡቲንቲ ታና
 ዒንሢ ያኦጩባኣሴ» ጌዔኔ።

44 «ዒያታ ማሃዖ ሳዳሢዮ! ናይዲንቲ ሃሣ ዴኤቢንቲ፡ ሸኣቹያ
 ማዒ፤ ጊንሢ ካላ”ዴ፡ ሃርጊያ ሃርጊ፡ ቱኡቲያ ኔ ቱኡቲም ዛጊ ዓይዴ
 ኔና ኑ ያኦጩዋዖ ሃሼይ?» ጋዓንዳኔ። 45 ዒማ”ና ጎኔ ታ ዒንሢም
 ጋዓኔ፤ ሃንሢ ታ ዓሳንሢዳፓ ፔቲ”ሢም ዒንሢ ማዴባኣሢ ታኣም
 ዒንሢ ማዴባኣያኬ» ጋዓንዳኔ። 46 ዬንሢ ሂዚ ጋዓዘንሢ ናንጊና
 ጋፑዋ ሜቶይዳ፤ ዒሎ”ንሢ ጋዓንቲ ናንጎና ናንጎይዳ ጌላንዳኔ።»

26

ዩሱሴ ባይዛኒ ጌስቶና ጌሌሲ

(ማር. 14፡1-2፤ ሉቃ. 22፡1-2፤ ዮሐ. 11፡45-53)

¹ ዩሱሴ ዩንሢ ባኮ ከኤዚ ጋፔሢኮ ጊንፃ፡ ዒዛኮ ጊንፆ ሃንታ ናኣቶ"ሞ፡- ² «ለሞፆ ከሊ"ኮ ጊንፃፓ ዒይሁዳ ዓሶኮ ዑሣ ዓኣዲፆ ከላ" ቦንቹንታያ ማዕሢ ዒንሢ ዔራኔ፤ ዓሲኮ ናዓሢ ሱዒንታንዳጉዲ ዓኣሢ ዒንጊንታንዳኔ» ጌዔኔ።

³ ዩካፓ ቄሌሶኮ ሱኡጎና ዴሮ"ኮ ጨማ"፤ ቄሌሶ ቢያሢኮ ሱኡጋሢ ቃያፓ ማኣሮ ካሮ"ይዳ ቡኪንቴኔ። ⁴ ዒኢካ ዔያታ ዔርቱዋ ጎይሢና ዓርቂ ዩሱሴ ዎዳኒ ዎላ" ዘርቴኔ። ⁵ ጋዓንቴ ዔያታ፡- «ዴሮ"ኮ ባኣካ" ዘላ ዔቁዋጉዲ ቦንቾ ከሎ"ና ማፆፓ» ጌዒ ዎላ" ጌሶቴኔ።

ሳውቃ ቲዦና ዩሱሴ ቲሽኬ ላኣሌሎ

(ማር. 14፡3-9፤ ዮሐ. 12፡1-8)

⁶ ዒኢካ ዩሱሴ ቢታኒያይዳ ዑፃ ከሰካ ዶርዓሢ ዓርቄንቴ ፖዔ፡ ሲሞኦኔ ማኣራ ዓኣንቴ፤ ⁷ ፔቴ" ላኣሊስኬና ሹቺፓ ኮሾ"ና ቢልቃዳይዳ ሻንቾናቴ ሚርጌ ሚኢሼ ዔካንዳ ሳውቃ ቲሺ ከንሢ ዔኪ ሙካፆ፡ ዩሱሴ ሙፆሮ ዴዒ ዓኣንቴ ዒዛኮ ቶኦካ" ዎሄኔ። ⁸ ዒዛኮ ጊንፆ ሃንታ ናኣታ" ዩያ ዛጌ ዎዶ"ና ጎሪ"ንታፆ፡- «ሓያ ሳውቃ ቲዦ ጉሪ ላኣሎሢ ዓይጎሮዳይ! ⁹ ሃይ ሳውቃ ቲዦ ሚርጌ ሚኢሼሞ ሻንቹንቴ፤ ሚኢሻ ማንቆ ዓሶሞ ዒንጊንታንዳንቴኬ» ጌዔኔ።

¹⁰ ዩሱሴ ዩያ ዔያታ ጋዓሢ ዔራፆ፡- «ሃሮ" ላኣሌሎ ዒንሢ ዓይጎሮ ሜታሳይ? ዒዛ ኮሺ ባኣዚ" ታኣሞ ማዴኔ፤ ¹¹ ማንቆ ዓሳ ቢያ ዎዴ ዒንሢና ዎላ"ኬ፤ ታኣኒ ጋዓንቴ ቢያ ዎዴ ዒንሢና ዎላ" ማዓዓኬ። ¹² ሳውቃ ቲዦ ታ ዑፃ ዒዛ ዎሄሢ ታና ዴኡፖሞ ጊኢጊሻኒኬ፤ ¹³ ጎኔ ታ ዒንሢሞ ጋዓኔ፤ ሃይ ኮዦ ሃይሳ ከኤዚንታ ዓጮ" ቢያይዳ ዓንካ ማዕቶዋ ዒዛ ማዴ ባካ <ዒዛ ዩያይዴኔ ጌይንቲ ከኤዚንታንዳኔ» ጌዔኔ።

ዩሁዳኮ ዩሱሴ ዓኣሢ ዒንጊፆሮ ዓሶና ጌሰቲ ጊኢጊፆ

(ማር. 14፡10-11፤ ሉቃ. 22፡3-6)

¹⁴ ዩካፓ ታፅ ላሞፆንሢዳፓ ፔቴ"ሢ ማዔ፡ ዓሰቆሮንቶ ዩሁዳ ጌይንታሢ ቄሌሶኮ ሱኡጎ ኮራ ዓኣዳፆ፡- ¹⁵ «ታኣኒ ዒዛ ዓኣሢ ዒንሢሞ ዒንጌቶ ዒንሢ ታኣሞ ዓይጎ ዒንጋንዳይ?» ጋዓዛ፡ ዔያታ

ዲዛም ሃይሂታሚ" ሹቺ ቢራ ፓይዲ ዲንጌ። 16 ዩማፓ ዓርቃያ
ዪሁዳ ዩሱሴ ዓኣሢ ዲንጋኒ ጊኢጋ ኬሊ" ኮዓ፤።

ዩሱሴ ዓይሁደኮ ዑሣ ዓኣዲያ ቦንቾ ኬሎ" ካዋሢ ሙዒሢ
(ማር. 14፡12-21፤ ሉቃ. 22፡7-14፤ 22፡21-23፤ ዮሐ.
13፡21-30)

17 ዓይሁደኮ ላኦደ" ሙዒ ቦንቾሢኮ ቤርታሳ ኬሎ"፤ ዲዛኮ
ጊንያ ሃንታ ናኣታ" ዩሱሴ ኮራ ሙካዖ፡- «ዑሣ ዓኣዲያ ቦንቾ ኬሎ"
ካዋሢ፤ ዋካ ኔኤም ኑ ጊኢጊሻንዳጉዲ ኔ ኮዓይ?» ጌዒ ዲዛ
ዖኦጩ።

18 ዒዚ ማሃዖ፡- «ካታሞይዳ ናንጋ፤ ሃያ ማኣሪ ዴንዲጋፓ
ሴርዛሢ፤ ታኣኮ ዋደ" ዑኬሢር ታኣኮ ጊንያ ሃንታዞንሢና ዋላ"
ዑሣ ዓኣዲያ ቦንቾ ኬሎ" ካዋሢ ኔ ማኣራ ታ ሙዒ ቦንቾንዳ፤
ጋዓ፤፤ ጎዑዋቴ» ጌዒ።።

19 ዲዛኮ ጊንያ ሃንታዞንሢና ዒዚ ዓይሢሢጉዲ ዑሣ ዓኣዲያ
ቦንቾ ኬሎ" ካዋሢ ጊኢጊሹ።።

20 ዩካፓ ሳዓ ዓማዛ ዩሱሴ ታጶ ላምዖንሢና ዋላ" ሙዖር ዴዒ፤፤
21 ዒኢካ ዔያታ ሙዒያይዳ ዓኣንቴ ዩሱሴ፡- «ጎ፤ ታ ዒንሢም ጋዓ፤፤
ዒንሢዳፓ ፔቴ"፤ ታና ዓኣሢ ዲንጋንዳ፤፤» ጌዒ።።

22 ዩያር ዔያታ ሚርጌና ያያ ፔቴ" ፔቴ"ሢ፡- «ጎዳሢዮ፡
ታናቴዋሴ፤ ታናኬ ኔ ጋዓ?» ጌዒ።።

23 ዒዚ ዔያቶም፡- «ዒንሢዳፓ ዓኣሢ ታና ዒንጋንዳሢ ሃሢ
ታኣና ዋላ" ጎንጋ ኩጮ ዳካሢኬ፤ 24 ዓሲኮ ናዓሢ ዒዛ ዘሎ"
ፃኣፒንቴ ጎይያና ሃይቃንዳ፤፤ ጋዓንቴ ዓሲኮ ናዓሢ ዓኣሢ ዒንጋ
ዓሢም ባዴዒ! ዩይ ዓሢ ሾይንቲባኣያታቴ ኮሺታዖ ዓቴ"፤፤» ጌዒ።።

25 ዓኣሢ ዒዛ ዒንጋንዳ፤ ዪሁዳ ሃሢ፡- «ዔርዛሢዮ! ታናቴዋሴ፤
ታናኬ ኔ ጋዓ?» ጋዓዛ፤ ዩሱሴ ዒዛም፡- «ሂዮ፤ ኔ ጌዒሢጉዴያኬ»
ጌዒ።።

ጎዳ ማዶ" ካዋሢ

(ማር. 14፡22-26፤ ሉቃ. 22፡15-20፤ 1ቆር. 11፡23-25)

26 ዔያታ ካዋሢ ሙዒኣና ዩሱሴ ካሣ ዔኪ ጋላታ ሺኢጲሢ
ሺኢቃዖ፤ ቡንዒ ዒዛኮ ጊንያ ሃንታዞንሢም፡- «ሃኮቴ ሙዑዋቴ፤ ሃይ
ታናኬ» ጌይ ዲንጌ።።

27 ዩያጉዲ ሃሣ ዑሽኮ ባኮዋ ዔኪ ጋላታ ሺኢጲሢ ሺኢቃዖ፡-
«ቢያሢ ሃያይዳፓ ዑሽኮዋቴ፤ 28 ሃይ ሚርጌ ዓሶኮ ጎሞ ጌኤሻኒ

ለአሊንታንዳ ታኦኮ ዓኮ ጫክቁሞ ሱጉያኬ፤ 29 ታ ዓዶ ካክቱሞይዳ ዋይናፓ ኮሾ"ና ዓኮ ዑዠ ዓንሣና ዋላ" ታ ዑሽካንዳያ ሄላ"ንዳኣና ሃይካፓ ሴካ ሃሮ" ዋይናፓ ኮሾ"ና ዑዠሎ ላሚ ታ ዑሽካዓኬ ታ ዓንሣሞ ጋዓኔ» ጌዔኔ።

30 ዩካፓ ዔያታ ያኦሲ ቦንቾሞ ማዓ ዓይኑሞ ዓይናዳዎ፣ ዛይቶ ሪሚቶ ዱኮ" ኬሰኬኔ።

ጴጂሮሴ «ታ ዒዛ ዔሩዋሴ» ጋዓንዳሣ ሴርታዲ ኬኤዚንቴሣ (ማር. 14፥27-31፤ ሉቃ. 22፥31-34፤ ዮሐ. 13፥36-38)

31 ዩካፓ ዩሱሴ ዒዛኮ ጊንያ ሃንታዘንሣሞ፡- « <ሄንቃሣ ታ ዋዳንዳኔ፤ ማራታኣ ዣኣላንዳኔ፤ ጌይንቴ ፃኣፒንቴሣሮ ሃሮ" ዒባኒ ታ ዒንሣኮ ዱቆ ማዔም ዒንሣ ቢያሣ ታና ሃሺ" ዓኣዳንዳኔ፤

32 ጋዓንቴ ሃይባ"ፓ ታ ዔቁሣኮ ጊንያ፣ ጌሊላ ዒንሣ ቢሪ ታ ዓኣዳንዳኔ።»

33 ዒዛና ጴጂሮሴ ማሃዎ፡- «ሃንጎዋታ ቢያ ኔ ዛሎ"ና ዱቁንቴ፣ ሃሺ" ኔና ዓኣዳቶዋ ታኣኒ ፔቴ"ታዎ ኔና ሃሺ" ዓኣዳዓኬ!» ጌዔኔ።

34 ዩሱሴ፡- «ጎኔ ታ ኔኤም ጋዓኔ፤ ሃሮ" ዒባኒ ከይዳ ቁኢቃንዳሣኮ ሴርታ ሃይሣ ማይንቴ ኔ ታ ዒዛ ዔሩዋሴ» ጋዓንዳኔ» ጌዔኔ።

35 ጴጂሮሴ ጋዓንቴ፡- «ኔኤና ዋላ" ሃሃይቆቴያ ፔቴ"ታዎ ታ ኔና ታ ዒዛ ዔሩዋሴ» ጋዓዓ፣ ጋዓዛ፣ ሃንጎ ዒዛኮ ጊንያ ሃንታዘንሣ ቢያ ዒማዲ ጌዔኔ።

ዩሱሴኮ ጌኤቴሴማኔይዳ ሺኢጲያ (ማር. 14፥32-42፤ ሉቃ. 22፥39-46)

36 ዩካፓ ዩሱሴ ዒዛኮ ጊንያ ሃንታዘንሣና ዋላ" ጌኤቴሴማኔ ጌይንታ ቤሲ ዓኣዳዎ፣ ዔያቶም፡- «ታኣኒ ሴኬያ ዳንዲ ሺኢቃንዳኣና ዒንሣ ሃካ ዴዑዋቴ» ጋዓዎ፣ 37 ዒዛና ዋላ" ጴጂሮሴና ላምዎ ዜብዲዮሴ ናኣቶ"ንሣ ዔኪ ዳንዳዎ ያዪ ማሊሣ ዓርቄኔ፤ 38 ዩካፓ ዔያቶም፡- «ሼምፓሣ ታኦኮ ሚርጌ ያዪ ሃይቃኒ ዑኬኔ፤ ዒንሣ ታኣና ዋላ" ሃካ ዶዲ ዴዑዋቴ» ጌዔኔ።

39 ዒማ"ና ዔያቶይዳፓ ዳካ" ዶጫዎ፣ ባለቲና ሳዓ ሎኦሚ፡- «ታ ዓዳሣዮ! ኔኤም ዳንዳዒንታያ ማዔቴ ሃይ ሚታሣ ታና ያኦኮንጎ! ጋዓንቴኔ ጌዔሣጉዲ ማዓንዳኣፓዓቴም ታ ማሊያጉዲ ማዎፓ» ጌዒ ሺኢቁኔ።

40 ዩካፓ ዒ ማዒ ሃይሃ ዒዛኮ ጊንያ ሃንታዘንሣ ባንሣ ሙኪ፣ ዔያታ ጊንዒ ዓኣንቴ ዳንቃዎ ጴጂሮሴ ኮይላ"፡- «ታኣና ዋላ" ዳካ"

ዎዴታ? ዶዲ ዒንሢ ዴዒኒ ዳንዳዒባኣዓዳ? 41 ዳቢሻኒ ጌሾ ጌሺሢዳ ዒንሢ ጌሉዋጉዲ ዶዲ ሸኢቁዋቴ፤ ዓሲኮ ዓያና ቢያ ዎዴ ጌኢጌያኬ፤ ዓሸኪ ጋዓንቴ ላቤያኬ» ጌዔኔ።

42 ለሚ ሃሣ ዴንዳዮ፡- «ታ ዓዳሢዮ፡ ሃያ ታ ዔኩዋዎ ዓቱዋ ማቶ ማዔቶ ኔ ማሊዎ ኩዋንጎ» ጌዒ ሸኢቁኔ። 43 ለሚ ማዒ ሙካንቴ ጌንዓሢ ዔያቶ ኮሺ" ባሽሢሮ ጌንዒ ዓኣንቴ ዴንቃዎ፡ 44 ሃሣ ዔያቶ ሃሺ" ዴንዲ፡ ቤርታ ሸኢቁማ ጎይዎ ሃይሣሲ ሸኢቁኔ።

45 ዬካፓ ጌንዎ ሃንታዘንሢ ኮይላ" ማዒ ሙካዮ፡- «ሃሢ ሄላ"ዎ ዒንሢ ጌንዓሢዳዳ? ዓሲኮ ናዓሢ ጎዋ ዓሶም ዓኣሢ ዒንጌንታንዳ ዎዶ" ዑኬኔ፤ 46 ዓካሪ ዔቁዋቴ፡ ኑ ዓኣዶም፤ ሃይሾ ዓኣሢ ታና ዒንጋሢ ሙኬኔ!» ጌዔኔ።

ዬሱሴኮ ዓርቁንቴዎ

(ማር. 14፡43-50፤ ሉቃ. 22፡47-53፤ ዮሐ. 18፡3-12)

47 ዬሱሴ ዬያ ኬኤዛ ጎይሣ ዓኣንቴ ታጾ ለምዎንሢዳፓ ፔቴ"ሢ፡ ዪሁዳ ሙኬኔ፤ ዒዛና ዎላ" ጨንቻ ዓፓሮና ኮኦሎ"ና ዓርቁ ሚርጌ ዓሲ ሙኬኔ፤ ዔያታ ዳኪንቴ ሙኬሢ፡ ቄኤሶኮ ሱኡጎና ዴሮ"ኮ ጨሞናይዳፓኬ። 48 ዬሱሴ ዓኣሢ ዒንጋ፡ ዪሁዳ ዓሶም፡- «ዒንሢ ኮዓሢ፡ ታኣኒ ዒዛ ሄርቃንዳሢ ማዔሢሮ ዒዛ ዓርቁዋቴ» ጌዒ ቤርታ ኬኤዜያኬ።

49 ዒማ"ና ዪሁዳ ዑኬና ዬሱሴ ባንሢ ሙካዮ፡- «ዔርዛሢዮ! ኔ ኮሺዳ?» ጌዒ ሄርቁኔ።

50 ዬሱሴያ፡- «ታ ዒጊናሢዮ! ዓካሪ ኔ ሙኬ ማሊዎ ኩኩንሢ»* ጋዓዛ ዓሳ ዬሱሴ ባንሢ ሙኪ ዓርቃዎ ሱሲና ዒዛ ቱኬ"ኔ። 51 ዬማና ዬሱሴና ዎላ" ዓኣዘንሢዳፓ ፔቴ"ሢ ዓፓሮ ቱጋዮ፡ ቄኤሶ ቢያኮ ሱኡጋሢም ማዳሢኮ ዋዮ ቆዒ" ቱቄኔ። 52 ዬሱሴ ጋዓንቴ፡- «ዔዛ ሃይ፡ ጨንቻ ዓፓሮ ጎንጎና ዳኬ፤ ዓፓሮ ቱጋዘንሢ ቢያ ዓፓሮና ሃይቃንዳኔ። 53 ዎንዴያዲ ማዓኒ ኮይሳያ ማዔቴ ታዓዶ ታዎጎጎጎም ታጾ ለምዎ ቤሲ ፓቂንታ ፖኦሊሶይዳፓ ባሼ፡ ኬኢታንቻ ታኣም ዳኪንዲዋያ ኔኤም ማላ? 54 ዬይ ያዲ ማዔቶ ሃሣ ጌኤዢ ማፃኣፓ «ማዓንዳኔ» ጌዔ ባካ ዎይቲ ኩማንዳይ?» ጌዔኔ።

55 ዒማ"ና ዬሱሴ ዴሮ"ም፡- «ሱላ ዓርቃ ዓሲጉዲ ጨንቻ ዓፓሮና ኮኦሎ"ና ዒንሢ ዔኪ ታና ዓርቃኒ ሙኪያ? ቢያ ዎዴና ጌኤዢ ማኣሮይዳ ዴዒ ታዔርዛኣና ዒንሢ ታና ዓርቁባኣሲ፤ 56 ጋዓንቴ ሃይ ቢያ ማዔሢ ዎኦሲ ማሊዎ ኬኤዛ ዓሶ ማፃኣፓይዳ ኬኤዚንቴ ባካ

* 26:50 ፔቴ" ፔቴ" ሚናኣ ማፃኣፓይዳ «ታ ዒጊናሢዮ! ሃይካ ኔ ዓይጎሮ ሙኬይ?» ጋዓኔ። 26:55 ሉቃ. 19፡47፤ 21፡37።

ኩማንዳጉዲኬ» ጋዓዛ፡ ዒዛኮ ጊንያ ሃንታዞንሢ ቢያ ዒዛ ሌሊ ሃሺ" ፑኒንቴኔ።

ዩሱሴኮ ዋጎ ዋጋ ዓሶ ቤርቶ ሸኢኪያ

(ማር. 14፡53-65፤ ሉቃ. 22፡54-55፤ 22፡63-71፤ ዮሐ. 18፡13-14፤ 18፡19-24)

⁵⁷ ዬማ"ና ዩሱሴ ዓርቄ ዓሳ' ሙሴ ዋጎ ዔርዛ ዓሶንታ ደሮ"ኮ ጨሞንታ ቡኪንቴ ዓኣ ቤዘ፡ ቄኤሶ ቢያኮ ሱኡጋሢ፡ ቃያፓ ማኣሪ ዒዛ ዔኪ ዓኣዴኔ። ⁵⁸ ጋዓንቴ ጳጳሮሴ ዒዛኮ ጊንያ ሃኬ ሃኬ፡ ቄኤሶ ቢያኮ ሱኡጋሢ ማኣሪ ሄላ"ንዳኣና ዓኣዴኔ፤ ዒኣካ ጋሮ ጌሊ ማዲንታ ባኮ ቢያ፡ ጋፒንያ ሄላ"ንዳኣና ዘጋጌ ካፓ ዓሶና ዋላ" ደዔኔ። ⁵⁹ ዬማና ቄኤሶኮ ሱኡጎና ዓይሁዶ ዓሶኮ ዋጎ ዋጋ ዓሳ ቢያ ዩሱሴ ዋዲሻንዳ ሉኡዙሞ ማርካ ኮዓኔ፤ ⁶⁰ ሚርጌ ሉኡዙሞና ማርካዳ ማርካ ሸኢኬቶቶ፡ ሃይቃንዳጉዲ ዋጊሳ ማርካ ዔያታ ዴንቄባኣሴ፤ ጊንፃፓ ላምዖ ዓሲ ሙኪ፡- ⁶¹ «ሃይ ዓሢ ሩኤኩ ማኣሮ ሻሂ ሃይሦ ከሊ"ዳ ጊንሣ ታ ማዞኒ ዳንዳዓኔ ጌዔኔ» ጌይ ማርካዴኔ።

⁶² ዬሞና ቄኤሶ ቢያኮ ሱኡጋሢ ዔቃዖ፡- «ሃንሢ ዓሳ ኔ ጊዳ" ማርካዳ ባኮኮ ቢያ ማሂ ኔ ከኤዛ ባኣዚ" ባኣዓዳ?» ጌዔኔ። ⁶³ ዩሱሴ ጋዓንቴ ዚቴዮ ጋዓዛ፡ ቄኤሶ ቢያኮ ሱኡጋሢ፡- «ኔ ሜሲሔ ሃሣ ያኦሲ ናይ ማዒያ፡ ናንጊና ናንጋ ያኦዛሢ ሱንያና ጫኣቂ ታኣም ከኤዜ» ጌዔኔ።

⁶⁴ ዩሱሴ ማሃዖ፡- «ኔ ጌዔሢጉዲኬ፤ ጋዓንቴ ሃይካፓ ሴካ ዓሲኮ ናዓሢ ዴኤፖ ያኦዛሢ ሚዛቆ ዛላ" ዴዒ ዓኣንቴ ዒንሢ ዘጋንዳኔ፤ ዬያጉዲ ሃሣ ጫሪንጮ ሻኣሮና ማዒ ሙካንቴያ ዒዛ ዒንሢ ዘጋንዳኔ፤ ታ ዒንሢም ጋዓኣኬ» ጌዔኔ።

⁶⁵ ዬማና ቄኤሶ ቢያሢኮ ሱኡጋሢ ዓፒሎ ፔኤኮ ዳጋና ዳርዛዖ፡- «ሃይሾ ዒ ያኦሲ ጫሽኬኔ! ዒንሢያ ዬያ ጫዢ ዋይዜኔ፤ ሃይካፓ ሴካ ማይ ዓይጎ ማርካ ኮይሳይ? ⁶⁶ ዓካሪ ዒንሢም ዓይጎ ማሳይ?» ጋዓዛ፡ ዔያታ፡- «ዒ ሃይቃንዳያ ኮይሳኔ!» ጌዒ ማሄኔ።

⁶⁷ ዒማ"ና ዒዛኮ ዔያታ ዓኣፖ ካራ" ጩቲ"ያ ጩቲ"፡ ኩቺ ሙሊያ ዴላ"ዛ፡ ዛላ" ሃሣ ዒዛ ባዒ ባዒ፡- ⁶⁸ «ሜሲሔ! ያናዳይ ኔና ጳርቄሢ? ሂንዳ ያኦሲ ማሊሢ ኑም ከኤዜ!» ጌዔኔ።

ጳጳሮሴኮ ዩሱሴ «ታ ዔሩዋሴ» ጌይያ

(ማር. 14፡66-72፤ ሉቃ. 22፡56-62፤ ዮሐ. 18፡15-18፤ 18፡25-27)

69 ዩዛፓ ጳጳሮች ቄሳሳቱ ቢያ ሱሉጋሢ ዲሮ ጋራ ዳዊ ዓሳንቴ ፔቴ" ዉዲሮ ናይ ዒሊካ ማኣራ ማዳሰከና ዒዛ ኮይላ" ሙካዖ፡- «ኔኤኒያ ጌለላ ዓጮ" ዓሢ፡ ዩሱሴና ዋላ" ዓኣያኬ» ጌዔኔ።

70 ዒዚ ጋዓንቴ፡- «ኔኤኒ ዓይጎ ጋዓቴያ ታኣም ዔርቱዋሴ» ቢያሢ ቤርታ ጌዔኔ። 71 ዒዚ ከሰካኒ ማርሾ ካሮ" ባንሢ ዓኣዳንቴ ሃሣ ሜሌ" ማዳሰከና ዒዛ ዳንቃዖ ዒሊካ ዓኣ ዓሶም፡- «ሃይ፡ ናዚሬቶ ዓሢ፡ ዩሱሴና ዋላ" ዓኣያኬ» ጌዔኔ።

72 ዒዚያ ጫኣቂ ጫኣቂ፡ ቢያሢኮ ቤርታ፡- «ታ ዒዛ ዓሢ ዔሩዋሴ» ጌዔኔ።

73 ዩዛፓ ዳካ" ሃሣ ኔጋዖ ዒሊካ ዔቂ ዓኣ ዓሳ ጳጳሮች ኮራ ሙከ፡- «ኔኤኮ ጌኤዛፓ ዔርታሢሮ ጎኔና ኔኤኒ ዔያቶይዳፓ ፔቴ"ሢከ!» ጌዔኔ።

74 ዒማ"ና ጳጳሮች፡- «ታና ባይዘም» ጌዒ ጫኣቃዖ «ታ ዩያ ዓሢ ዔሩዋሴ!» ጌዔኔ። ዩማና ኮይዳ ቂኢቃዛ፡ 75 ጳጳሮች «ኮይዳ ቂኢቁዋንቴ ሃይሢ ማይንቲ ኔ ታና <ዔሩዋሴ> ጋዓንዳኔ» ዩሱሴ ጌዔሢ ጳቂሣዖ ካሮ" ከሰከ ዒናፓ ጎጋይቂ ዩኤከኔ።

27

ዩሱሴኮ ጳላዖሴ ቤርቶ ሸኢኪዖ

(ማር. 15፡1፤ ሉቃ. 23፡1-3፤ ዮሐ. 18፡28-32)

1 ዚሮ ጉቴሎ ጉቴ" ዓማ"፡ ቄሳሳኮ ሱሉጎና ዳሮ"ኮ ጨማኣ ቢያ ዩሱሴ ዋድንዶ ጎይዖ ዘርቴኔ፤ 2 ዩዛፓ ዩሱሴ ዔያታቴከ" ዔከ ሮሜ ዓጮ" ዋይሣ ጳላዖሴም ዓኣሢ ዒንጌኔ።

ዩሁዳኮ ሱዲንቲ ሃይቦ"

(ዳኪ. ማዶ" 1፡18-19)

3 ዩሱሴ ዓኣሢ ዒንጌ ዩሁዳ፡ ዩሱሴ ሃይቃንዳጉዲ ጌይንቲ ዋጊንቲሢ ሃይ ዋዶ"ና ዳቢንቲ ማዔሢ ዔሪ ሃይሢታም ሹጮ ቢሮ" ቄሳሳኮ ሱሉጎና ጨዋናም ዔከ ሙከ ማሂ ዒንጌ፡- 4 «ታኣኒ ጌኤሽ ዓሲ፡ ሃይቢም ዓኣሢ ዒንጌሢና ዳቤኔ» ጋዓዛ፡ ዔያታ፡- «ኦና ዓይጌ ሜቲይ? ኔ ዔራ ባኣዚ" ዋኦቴ!» ጌዔኔ።

5 ዩያሮ ዩሁዳ ቢሮ"ሢ ጌኤዢ ማኣራ ላኣሊ ከሰከ፡ ዳንዲ ሱዲንቲ ሃይቂኔ።

6 ቄሳሳኮ ሱሉጋ ዩንሢ ቢሮ"ሢ ዔካዖ፡- «ሃይ ሚኢሻ ሱጉሢ ሻንቸናዖ ማዔሢሮ፡ ጌኤዢ ማኣሮም ዒንጎ ሚኢሻና ዋላ" ሲኢራኒ ኑም ኮይሱዋሴ» ጋዓዖ፡ 7 ዔያታ ዋላ" ዘርቴ፡ ሹኦቲም ዱኡፒ ቤሲ

ማዕንዳጉዲ ፔቴ" ማኒሰኬያኮ ጎሺ ሻንቄኔ።⁸ ዬያሮ ዬና ቤዛ ሃኖ" ሄላ"ንዳኣና «ሱጉሢ ሳዓ» ገይንታኔ።

⁹ ዬያይዲያና ያኦሲ ማሊያ ኬኤዛ ዔርሚያሴ ዛሎ"ና፡- «ዒሰራዔኤሌ ናኣታ" «ዒዚ ሻንቸንታንዳማኬ» ገዒ፡ ዓርቄ ሃይሢታሞ ሹጮ ቢሮ" ዔያታ ዔኬኔ፤¹⁰ ያኣዛሢ ታና ዓይሢ ጎይያ ማናሢ ጎዡ ዛሎ" ዔያታ ጨጌኔ» ገይንቲ ኬኤዚንቲሢ ኩሜኔ።

ጲላያሴኮ ዬሱሴ ያኦጨያ

(ማር. 15፡2-5፤ ሉቃ. 23፡3-5፤ ዮሐ. 18፡33-38)

¹¹ ዒማ"ና ዬሱሴ ሮሜ ዓጮ" ወይሢ ጲላያሴ ቤርቶ ሺኢካዛ፡ ጲላያሴ፡- «ኔኤኒ ዓይሁዴ ካኣቲዳ?» ገይ ያኦጨኔ።

ዬሱሴ ማሃያ፡- «ኔ ታና ገዒሢ ጉዴያኬ» ገዒኔ።¹² ጋዓንቲ፡ ቄኤሶኮ ሱኡጎና ጨሞና «ዳቢንቲ ዓኣኔ» ገዒ ዴማ ዴማ ባኣዚ" ኬኤዛኣና ዬሱሴ ዓይጎሞ ገዒ ባኣሴ።

¹³ ዬማ"ና ጲላያሴ፡- «ኔና ዔያታ ወጎና ዓይሢሳኒ፡ ዓኣፒኒ ባኣዚ" ፓይዳቲያ ኔ ወይዙዋዓዳ?» ገዒኔ።

¹⁴ ዬሱሴ ጋዓንቲ ዬይ፡ ወይሢሢ ዲቃቲ ሄርሻንዳያ ሄላ"ንዳኣና ፔቴ" ባኣዚ"ታያ ማሃ ኬኤዚባኣሴ።

ዬሱሴ ሃይቃንዳጉዲ ወጊንቲሢ

(ማር. 15፡6-15፤ ሉቃ. 23፡13-25፤ ዮሐ. 18፡19-40፤ 19፡1-16)

¹⁵ ሮሜ ዓጮ" ወይሢሢ ሌዓ ሌዓ ዓይሁዴኮ ዑሣ ዓኣዲያ ቦንቾ ኬሎ"ና ዴራ" ዔያቶሞ ቡሊ"ንታንዳጉዲ ኮዓ፡ ቱቲ ዓሲ ቡሊ"ሢ ዔርቲያኬ።¹⁶ ዬኖና ፑርቱሞና ዔርቲ፡ ባርባኔ ገይንታ ዓሲ ቱቲ ዓኣኔ።¹⁷ ዴራ" ቡኪንታዛ ጲላያሴ፡- «ባርባኔና ሚሲሔ ገይንታ ዬሱሴናይዳፓ ያና ታ ዒንሢሞ ቡሊ"ንዳጉዲ ዒንሢ ኮዓይ?» ገዒኔ።¹⁸ ጲላያሴ ዬያ ገዒሢ ዔያታ ዒዛ ቂኢሩሞና ዓኣሢ ዒንገሢ ዔራያታያኬ።

¹⁹ ጲላያሴ ወጎ ቤዛይዳ ዴዒ ወጋንቲ፡ ዒዛኮ ማቻ፡- «ዬያ ዓሢ ዛሎ" ወጎንቲ ባውቲና ሚርጌ ሜታዴኔ፤ ዬያ ገኤዡ ዓሢ ዑፃ ዓይጎ ባኣዚ"ያ ኔ ማዲሞጉዲ» ጋዓ ኪኢታ ዒዛሞ ዳኬኔ።

²⁰ ጋዓንቲ፡ ቄኤሶኮ ሱኡጎና ጨሞና ባርባኔ ዔያቶሞ ቡሊ"ንቲሞ ዬሱሴ ሃይቃንዳጉዲ ዓሳ ያኦጨሞ ዴሮ" ዴሚና ገሻኔ።²¹ ዓጮ" ወይሢሢ፡- «ላሞንሢዳፓ ያኦኒ ዒንሢሞ ቡሊ"ንታንዳጉዲ ዒንሢ ኮዓይ?» ጋዓዛ፡ ዔያታ «ባርባኔ ቡሊ"ንቶንጎ!» ገዒ ማሄኔ።

22 ጲላዎሴያ፡- «ሂዳዎ ኪሪስቶስ ጌይነታ ዩሱስ ታዎድ"ንደይ?» ጋዓዛ፡ ቢያሢ «ሱዊንቶንጎ!» ጌዔኔ።

23 ጲላዎሴያ፡- «ዓይጎሮ? ዓይጎ ዒ ፑርታ ባኣዚ" ማዳይ?» ጌዒ ያኣጫዛ፡ ዔያታ ጋዓንቴ «ሱዊንቶንጎ!» ጌዒ ሃቺም ዒላቴኔ።

24 ዒዚ ማዳ ባኣ ዝሎ ዔቂሲሢ ማዓንዳኣፓዓቴም ማኣዳ"ንዳ ባኣዚ" ባኣሢ ጲላዎሴ ዔራያ፡- «ታኣኒ ሃያ ዓሢ ሱጉፃፓ ጌኤሺኬ፤ ሃይፓ ሴካ ማድንዶ ባኮ ዒንሢ ዔራኔ» ጌዒ፡ ዋኣሢ ዓይሢ ዴሮ" ቢያ ቤርታ ኩጮ ፔኤኮ ማሰቴኔ።

25 ዴሮ" ቢያ ዩማና፡- «ዒዛኮ ሱጉፃ ኑኡና ኑ ናኣቶ"ና ዑፃ ማዖንጎ!» ጌዔኔ።

26 ዩማና ጲላዎሴ ባርባኔ ዔያቶም ቡሊ"፤ ዩሱስ ጋዓንቴ ዝራፓና ጳርቂሲሢካ ጊንፃ ሱፃንዳጉዲ ዓኣሢ ዔያቶም ዒንጌኔ።

ፖኦሊሶኮ ዩሱስ ቦሂዖ

(ማር. 15፡16-20፤ ዮሐ. 19፡2-3)

27 ሮሜ ዓጮ" ፖኦሊሳኣ ዩሱስ ዔኪ ሮሜ ዓጮ" ዎይሢ ጲላዎሴ ማኣሪ ዓኣዲ ማርሾ ጋሮ ጌልዛዖ ፖኦሊሶ ቢያ ዒኣካ ቡኩሴኔ። 28 ዒኣካ ዔያታ ማኣዓሢ ዒዛኮ ጉሲ፤ ዲንኪ ዘቄ ዓፒላ ዒዛ ማይሴኔ። 29 ሃሣ ዓንጊሢ ማሪ ካኣቶ" ቶኣካ ዓጎ ባኣዚ" ማሊሲ ቶኣካ ዒዛኮ ዓጋዖ ዎኦሺጉዴ ሚሢ ኩጫ ዒዛኮ ዓይሢ፤ ቤርታ ዒዛኮ ጉምዓቲ ጉምዓቲ፡- «ዓይሁዴ ካኣቲዮ! ኮሺ ኔኤም ማዖንጎ!» ጌዒ ጌዒ ዒዛ ቦሂኔ፤ 30 ጨቴ"ያ ጨቴ"ኔ፤ ሃሣ ዎኦኸጉዴ ኮኣሌሎዎ ዒዛ ኩጫፓ ዔኪ ዒዛኮ ቶኣካ" ላሚ ላሚ ጳርቂኔ። 31 ዩያይዲ ዔያታኣ ዒዛ ቦሂሢኮ ጊንፃ ዲንኮ ዘቄ ዓፒሎ ኬሲ" ዒዛ ዓፒሎ ጊንሣ ማይሲ ሱፃኒ ዔኪ ዓኣዳኔ።

ዩሱስኮ ሱዊንቶ

(ማር. 15፡21-32፤ ሉቃ. 23፡25-43፤ ዮሐ. 19፡17-27)

32 ዔያታ ኬሰኪ ዴንዲቤቃ ጎይያይዳ ዓኣዖ ሲሞኦኔ ጌይነታ ቁሬና ዓጪ ዓሲ ዴንቂ ፑርቲሴ ዓሶ ሱዖ ሚዖ ሃልቄና ኬዲሴኔ። 33 ዩካፓ ዔያታ፡- «ቶኦኪ ሜጌሢ» ጌይነታ ጎልጎታ ሄሊ"ኔ። 34 ዓንጎና ጳርቂ ኪፃሶና ቤዛ ሃርጋሢ ማኣዳ"ንዳጉዲ ዎይኔይዳፓ ኮሾ"ና፤ ጨሼና ዎላ" ሲኢሪንቴ ዑሺ ዑሽካንዳጉዲ ዩሱስም ዒንጋዛ፡ ዒ ጋዓንቴ ዑኡቂ ዛጋዖ ዑሽካኒ ኮዒባኣሴ።

35 ዩሱስ ዔያታ ሱፃዖ ዒፃ ዓጊ ዓፒሎ ዒዛኮ ጊሸቲ ዔኬኔ።

36 ዒኣካ ሃሣ ዴዒ ዒዛ ዔያታ ካፓኔ። 37 ዳቢንቶ ዒዛኮ

ዔርዛንዳጉዲ ጌዲ «ሃይ፥ ዓይሁዳ ካኣቲ፥ ዩሱሴኬ» ጋዓ ፃኣፖና ባኣዚ" ዩሱሴ ሱዲንቴ ፑርቶ ዓሶ ሱዳ ሚያ ዑፃ ጌሄኔ። 38 ዔርዛና ዋላ" ለማዎ ሱላ ፔቲ"ሢ ዩሱሴኮ ሚዛቆ ዛላ"፥ ባጋሢ ሻውሎ" ዛላ" ማሂ ዔያታ ሱዲኔ።

39 ዔኢና ጎይዎ ዓኣዳ ዓሳ ሚርጌና ጫሽኪ ጫሽኪ ሃሣ ቦሂሢና ቶኦኮ" ፔኤኮ ዓገሢ ዓገሢ፡- 40 «ጌኤዢ ማኣሮ ሻሂ፥ ሃይሣ ኬሊ"ዳ ማዢሣ! ሂንዳ ኔና ዳቂሼ! ሂኖ ሂንዳ ያኦሲ ናይ ኔ ማዔቶ ፑርቶ ዓሶ ሱዳ ሚያፓ ኬዴ"!» ጋዓኔ።

41 ዩያጉዲ ቄኤሶኮ ሱኡጎንታ ሙሴ ዎጎ ዔርዛ ዓሶንታ ጨሞንታ ቢያ ቦሂ ቦሂ፡- 42 «ሜሌ" ዓሶ ዒ ዳቂሼኔ፤ ፔና ጋዓንቴ ዒ ዳቂሻኒ ዳንዳዑዋሴ፤ ሂንዳ ዒ ዒሰራዔኤሌ ካኣቲ ማዔቶ ሃሢ ፑርቶ ዓሶ ሱዳ ሚያፓ ኬዴ"ንጎ፤ ኦኡኒ ዒዛ ጎኔኬ ጌዲ ጉሙርቃንዳኔ። 43 ዒ ያኦሲና ጉሙርቃኔ፤ ሃሣ «ያኦሲ ናይኬ» ፔና ዒ ጋዓኔ፤ ሂንዳ ያኦሲ ዒዛ ናሽካቶ ዳቂሾንጎ!» ጌዔኔ።

44 ዩያጉዲ ዒዛና ዋላ" ሱዲንቴ ሱሎ"ንሢያ ዒዛ ጫሽካኔ።

ዩሱሴኮ ሃይሶ"

(ማር. 15፥33-41፤ ሉቃ. 23፥44-49፤ ዮሐ. 19፥28-30)

45 ዓባ" ሳዛ ማዓ ዎዳ"ፓ ዴንዲ ማሢ ዶምቦልጎ ዎዴ ሄላ"ንዳኣና ሳዓ ቢያ ደሜኔ። 46 ዩማፓ ማሢ ዶምቦልጎና ዩሱሴ፡- «ዔሎሄ! ዔሎሄ! ለማ ሳባቂታኒ» * ጌዲ ዴ"ጌዲ ዒላቴኔ። ዩኖኮ ቡሊ"ዓ «ታ ያኣዛሢኖ! ያኣዛሢኖ! ዓይጎሮ ኔ ታና ሃሼይ?» ጌይሢኬ።

47 ዒኢካ ዔቂ ዓኣ ፔቲ" ፔቲ" ዓሳ፡- «ሃይ ዒ ዔኤሊያሴ ዔኤላ"ኔ!» ጌዔኔ። 48 ዩማና ዔያቶይዳፓ ፔቲ"ሰኬይ ጳሽኪ ዴንዲ ዓፒላ ቱርጫጌዴ ባኣዚ" ዎይኔይዳፓ ኮሾ"ና ሶልኪ፥ ኮሽኮዎ ዑሺዳ ዓገ ዎኦሽጉዴ ሚሢና ዩሱሴ ዑሽካንዳጉዲ ዔኪ ዒንጌኔ።

49 ሃንጎ ዓሳ ጋዓንቴ፡- «ሃሹዋቴ፤ ሂንዳ ዔኤሊያሴ ሙኪ ዒዛ ዳቂሻቴ ኦ ዛጎም!» ጌዔኔ።

50 ዩሱሴ ለሚ ሃሣ ዴ"ጌዲ ዒላቴሰካፓ ሽምፓሢ ዒዛኮ ዴዴኔ።

51 ዩኖና ጌኤዢ ማኣሮኮ ዴማሲያሮ ጎኦቦና ዓፒላ" ሎፓ ሉሄሊ" ዳርዒ፥ ለማፓ ፓቂንቴኔ፤ ሓሣ ሳዓኣ ዓገፃም ላላ ፃሄኔ፤ 52 ዩማና ሚርጌ ዴኡፒ ቡሊ"ንቴም ያኦሲም ዴማዴያ ማዔ ሓይቂ ዓሲያ

27:39 ዓይኑ. 22፥7፤ 109፥25። **27:40** ማቴ. 26፥61፤ ዮሐ. 2፥19። **27:43**

ዓይኑ. 22፥8። * **27:46** ዔሎሄ ዔሎሄ ለማ ሳባቂታኒ፡- ጌይንቴዛ ዓራማይኬ ዓሲ፤ ሃሣ ዔብሬ ዓሲ ሙኡቺና ጌይንቴያኬ። **27:46** ዓይኑ. 22፥1። **27:48** ዓይኑ. 69፥21። **27:51** ኬሲ. ማፃ 26፥31-33።

ሃይባ"ፓ ዔቄኔ። 53 ዬና ዓሳ ዱኡፓፓ ኬስኪ፡ ዬሱሴ ሃይባ"ፓ ዔቄሢኮ ጊንፃ ያኦሲም ዱማዴ ካታሞ ጌሊ ሚርጌ ዓሲም ጴዴኔ።

54 ፄኤቶ ፖኦሊሶ ዓይሣሢና ዒዛና ዎላ" ዬሱሴ ካፓዘንሢ ሳዖኮ ዓጊዲያና ሃንጎ ማዔ ባኮሞ ቢያ ዛጋዖ፡ ሚርጌና ዒጊጩ፡- «ጎኔና ሃይ ያኦሲ ናይታዖኬ!» ጌዔኔ።

55 ዒማ"ና ጌሊላይዳፓ ሙኬዘንሢና ዬሱሴ ኮይሳ ባኦዚ"ና ቢያ ማኦዲ" ማዲ፡ ዒዛ ጊንፃ ሃንታ ሚርጌ ላኦሊ ዬያ ባኮ ሃኬ ዔቄ ዛጋኔ። 56 ዔያቶ ባኦካ" ሚግዴላ ዓጮ" ማይራማ፡ ያይቆኦቤና ዮሴፔናኮ ዒንዳ፡ ማይራማ፤ ሃሣ ዜብዲዮሴ ናኦቶ"ኮ ዒንዳኦ ባኦኔ።

ዬሱሴኮ ዱኡቲዖ

(ማር. 15፡42-47፤ ሉቃ. 23፡50-56፤ ዮሐ. 19፡38-42)

57 ሳዓ ዒማ"ዛ ዓርማቲያሴ ዓጪ ዓሲ ማዔ፡ ዮሴፔ ጌይንታ ፔቲ" ዖርጎቺ ዓሲስኬያ ሙኬኔ፤ ዒዚያ ዬሱሴ ጉሙርቁ፡ ዒዛ ዓሲ ማዔያኬ፤ 58 ዬይ ዓሢ ጰላዖሴ ኮይላ" ዓኦዳዖ ዬሱሴኮ ሌዘ ሺኢቃዛ፡ ጰላዖሴያ ሌዛ ዒዛም ዒንጊንታንዳጉዲ ዓይሣኔ። 59 ዬያር ዮሴፔ ሌዘ ኬይሲ ሱኡዲ፡ 60 ፔኤም ጌዒ ዶዶ ሹጮ ጰሊ"፡ ቦኦኪ ኮሾ"ና ቆኦፖይዳ ዱኡካዖ ጴቴ ሹቺ ቡምባልሲ ዔቶ" ካሮ" ዎዲ ዴንዴኔ። 61 ዬማና ሚግዴላ ዓጮ" ማይራምና ባጎ ማይራምና ዱኡፖኮ ቤርቶ ዛላ" ዴዒ ዓኦኔ።

ዬሱሴኮ ዱኡፖ ካፖናሢ

62 ዚሮ ጉቲ"ሎ ዓይሁዶ ዓሶኮ ሃውሾ ኬሎ"ና ቄኤሶኮ ሱኡጎና ፔርሴ ዓሶና ፔቱምና ጰላዖሴ ኮራ ዓኦዲ፡- 63 «ጎዳሢዮ! ዬይ ሉኡቃሢ ቤርታ ሳዛና ዓኦዖ ሃይሣ ኬሊ"ኮ ጊንፃፓ ሃይባ"ፓ ታ ዔቃንዳኔ» ጌዔሢ ኦም ጰቄኔ። 64 ዬያር ዒዛኮ ጊንፃ ሃንታዘንሢ ዴንዲ ዉኡቁ፡ ዴሮ"ም ሃሣ ሃይሾ ዒ ሃይባ"ፓ ዔቄኔ» ዔያታ ጎዑዋጉዲ፡ ዱኡፓ ሃይሣ ኬሊ" ሄላ"ንዳኦና ካፒንቶም ዓይሣ፤ ያዲ ማዒባኦያታቲ ጋፒንፃይዳ ዓሶ ዳቢሺዮ ቤርታኦስካፓ ባሼ ማዓንዳኔ» ጌዔኔ።

65 ጰላዖሴ፡- «ዒንሢኮ ፖኦሊሶ ዔኪ ዓኦዲ ካፒሱዋቲ» ጌዔኔ።

66 ዬካፓ ዔያታ ዴንዲ ዱኡፖ ካሮ" ሹጮይዳ ዖኦም ዔርዛ ማላቶ ጰርቁ፡ ፖኦሊሶና ካፒሲ ሃሼኔ።

28

ዩሱፊስ ሃይባ"ፓ ዔቂዖ

(ማር. 16፥1-10፤ ሉቃ. 24፥1-12፤ ዮሐ. 20፥1-10)

1 ዓይሁዶ ዓሶኮ ሃውሾ ከላ" ጋፓዛ ዚሮ ጉቴሎ ጉቴ ዓማ" ማግደላ ዓጮ" ማይራሞና ሐሣ ሃንጎ ማይራሞና ዋላ" ዩሱፊስ ዱኡፖ ዛጋኒ ዓኣዴኔ። 2 ዔያታ ሙኩዋንቴ ቤርታ ዔርቲባኣንቴ ሳዓ ዓገፃዛ፥ ጎዳኮ ከኢታንቻ ጫሪንጫፓ ከዱ"፥ ዱኡፖ ዔቶ" ካሮ" ዋዶና ሹጫሢ ቡሞባልሲ ዑፃ ዴዔኔ። 3 ዩያ ከኢታንቻሢኮ ዓኣፖ ካራ" ዜኤሊንሢፓ ደፓ ደፓ፤ ሃሣ ዓፒላ"ኣ ሻቺጉዲ ቦኦራያኬ። 4 ዱኡፖ ዔቶ" ካፓዞንሢ ከኢታንቻሢ ዒጊጪፃይዳፓ ዔቂያና ዲቃታዖ ሃይቂ ሌሲ"ጉዲ ማዔኔ፤

5 ከኢታንቻሢ ላኣሎንሢ ኮራ፡- «ዒንሢ ዒጊጪፖቴ፤ ሱዳንቴ ዩሱፊስ ዒንሢ ኮዓሢ ታ ዔራኔ፤ 6 ዒዚ ሃይካ ባኣሴ፥ ዒ ከኤዜሢፓ ደፓ ደፓ፤ ሃኒ ሙኪ ዒ ላሄ ቤዘ ዛጉዋቴ። 7 ሃሢ ሩኡሪ ዓኣዲጋፓ ዒዛኮ ጊንፃ ሃንታ ናኣቶ"ሞ ለሃይባ"ፓ ዒ ዔቂኔ፥ ጌሊላ ዒንሢ ዒ ቢሪ ዓኣዳንዳኔ፤ ዒኢካ ዒንሢ ዒዛ ዛጋንዳኔ፤ ጌዒ ከኤዜዋቴ፤ ዩያ ታ ዒንሢሞ ከኤዜያኬ» ጌዔኔ።

8 ዩካፓ ላኣሎንሢ ኮሺ" ዒጊጪሢና ሃሣ ዋዛና ዱኡፖ ቤዛፓ ዑከና ዒዛኮ ጊንፃ ሃንታዞንሢ ከኤዛኒ ጳሽኪ ዴንዴኔ።

9 ዒኢካ ቤዘማና ዩሱፊስ ዔያቶ ዴንቃዖ፡- «ዒንሢ ኮሺዳ?» ጋዓዛ ዔያታ ዩሱፊስ ባንሢ ሙካፃ ሂርኪ ጌይ ቶኮ" ዒዛኮ ዓርቂ ዒዛሞ ዚጌኔ። 10 ዩሱፊስ፡- «ዒንሢ ዒጊጪፖቴ፤ ዴንዲጋፓ ታ ዒሾንሢ ጌሊላ ዓኣዳንዳጉዲ ዔያቶም ከኤዜዋቴ፤ ዒኢካ ታና ዔያታ ዛጋንዳኔ» ጌዔኔ።

ዱኡፖ ካፓ ዓሶኮ ማርካዲዖ

11 ላኣሎንሢ ካታሞ ዓኣዲፃይዳ ዓኣንቴ ዱኡፖ ካፓ ፖኦሊሶንሢዳፓ ፔቴ" ፔቴ"ዞንሢ ካታሞ ዴንዳፃ ማዔ ባኮ ቢያ ቂኤሶኮ ሱኡጎም ከኤዜኔ። 12 ዩካፓ ቂኤሶኮ ሱኡጎና ጪሞና ዋላ" ቡኪንቴ ዘርቲሢኮ ጊንፃ ፖኦሊሶንሢሞ ሚርጌ ሚኢሾ ዒንጋዖ፡- 13 « ሩኡሪ ጊንዒ ዓኣንቴ ዩሱፊስ ጊንፃ ሃንታዞንሢ ሙኪ ዒዛኮ ሌዘ ዉኡቂኔ፤ ጌዒ ዴሮ"ሞ ከኤዜዋቴ። 14 ዓጮ" ዋይሣሢ ዩያ ዋይዜያ ማዔቶ ዒንሢዳ ሜቶ ዒ ሄሊ"ሱዋጉዲ ኦኡኒ ዒዛሞ ከኤዛንዳኔ» ጌዔኔ።

15 ዩያሮ ፖኦሊሶንሢ ዔያቶም ዒንጎና ሚኢሾ ዔካፃ ዔያቶም ከኤዚንቴሢፓ ደፓ ደፓ፤ ዩያ ሃሮ" ሄላ"ንዳኣና ዓይሁዶ ዓሳ ከኤዛኔ።

ዩሱፊስ ጊንዖ ሃንታዞንሂሞ ጴዲያ

(ማር. 16፥14-18፤ ሉቃ. 24፥36-49፤ ዮሐ. 20፥19-23፤ ዳኪ. ማዶ" 1፥6-8፤ 1ቆሮ. 15፥3-8)

16 ዩካፓ ዩሱፊስ ጊንዖ ሃንታ፥ ታጽ ፔቴ"ዞንሂሂ ዒዚ ዔያቶም ዓኣዳንዳጉዲ ኬኤዜ ጌለላይዳ ዓኣ ዱኮ" ዓኣዴኔ። 17 ዒኣካ ዒዛ ዔያታ ዴንቃ? ዒዛም ሂርኪ ጌዒ ዘጌኔ፤ ዛላ" ጋዓንቴ «ዒዛ ናንጋንዳ?» ጌዔኔ። 18 ዩማና ዩሱፊስ ዒዛኮ ጊንዖ ሃንታዞንሂ ኮራ ሙካዖ፡- «ቢታንቶ ቢያ ጫሪንጮና ሳዖናይዳ ታኣም ዒንጊንቴኔ፤ 19 ዩያሮ ዓኣዲጋፓ ዴሮ" ቢያ ዓዶ፥ ናዖ፥ ዓያኖ ጌኤዢናሮ ማዓንዳጉዲ ዋኣፆና ማሰኪ ማሰኪ ታ ዓሲ ማሁዋቴ፤ 20 ታ ዒንሂሂም ዓይሄሂ ባኮ ቢያ ዓሳ ካፓንዳጉዲ ዔያቶ ዔርዙዋቴ፤ ታኣኒያ ዓጮ"ኮ ጋፒንዖ ሄላ"ንዳኣና ቢያ ዋዴ ዒንሂና ዋላ"ኬ» ጌዔኔ።

ጌሌዝ ማግኒት

The Holy Bible in the Maale language of Ethiopia, using Ethiopic script

copyright © 2015 The Word for the World International and The Bible Society of Ethiopia

Language: Maale

Translation by: The Word for the World

Contributor: Bible Society of Ethiopia

Maale New Testament

by Bible Society of Ethiopia.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-12-29

PDF generated using Haiola and XeLaTeX on 11 Nov 2022 from source files dated 29 Jan 2022

bbcfb90a-3ae3-5452-983d-6c4c02375929